

ETID POU MESYE MARYE

LESON POU EDE W' BYEN JERE FWAYE OU

Etid pou Mesye Marye

Otè yo : Clair Schnupp, Jim Minor, David Hertzler

Desen yo : Monty Parks, Onntaryo ; Ajansman : Tracia Ropp ak Rachel Lee

Etid pou Mesye Marye se yon travay Northern Youth Ministries te pibliye pou premye fwa nan 1987.

Dwa kopi 2014 NYM Ministries, yon branch nan ministè Northern Youth Programs, Site 306, Box 1, R.R. 3, Dryden, Onntaryo P8N 3G2

© Copyright 2015, Christian Aid Ministries, Berlin, Ohio

Tout dwa rezèве. Pa gen okenn pati nan liv sa a ki dwe ni itilize, ni repwodwi, ni anrejistre nan yon sistèm stokaj, nan nenpòt fòm—li te mèt nan fòm papye, li te mèt nan fòm elektwonik—sòf si gen yon pèmisyon ekri ki sòti nan men konpayi ki pibliye liv sa a. Sèl bagay ki kapab repwodwi san pèmisyon se kèk ti sitasyon tou kout pou atik oubyen jounal.

ISBN: 978-1-943929-35-1



Christian Aid Ministries
P.O. Box 360
Berlin, OH 43832

TGS001381

ETID POU MESYE MARYE

TAB MATYÈ

I. Grandi Nan Lavi Espirityèl Ou

1. Yon Òm Selon Bondye
2. Sa Ki Dwe Pran Devan
3. Bi
4. Kòlè
5. Siveyans Espirityèl
6. Venk Dekourajman
7. Venk Move Lide Seksyèl
8. Venk Move Abitid Peche Nou Yo
9. Konviksyon
10. Konfesyon
11. Padon
12. E Si M' Gentan Fayi Deja ?
13. Traka Granmoun

II. Relasyon Mari Avèk Madanm

14. Plan Bondye Pou Maryaj
15. Valè Yon Fanm
16. Kite Manman Avèk Papa Nou
17. Ini Pou Lavi
18. Inyon Seksyèl
19. Kominikasyon
20. Yon Fanm Ki Okipe Kay Li Byen
21. Mari A—Yon Nèg Damou
22. Respekte Madanm Ou
23. Manyè Maryaj
24. Fè Kè Madanm Ou Kontan
25. Yon Lespri Brize
26. Bay Konsèy Madanm Ou Valè

III. Relasyon Papa Avèk Pitit

27. Pitit—Yon Kado Bondye Bay
28. Transmèt yon Benediksyon
29. Yon Papa—Yon Pwofesè
30. Peche Ki Devni Yon Eritaj
31. Korije Pitit Ou
32. Fason Tibebe Yo Fè Fèt
33. Bon Konprann Pou Jèn Yo
34. Bon Zanmi
35. Edikasyon
36. Ewo Timoun yo
37. Mizik
38. Sa Ki Pouse Timoun yo Rebèl
39. Granparan

IV. Reskonsabilite Familyal

40. Fanmi K'ap Brase Ansanm
41. Mari A Kòm Yon Lidè
42. Dirije Kòm yon Bèje
43. Pwoteksyon Espirityèl
44. Devosyon Familyal
45. Papa a—Yon Nèg Ki Reskonsab
46. Byen Jere Lajan
47. Ministè Familyal
48. Relasyon ak Fanmi Madanm Ou
49. Yon Papa K'ap Priye
50. Yon Papa Ki Koute
51. Pran Desizyon
52. Imanis—Yon Manti

PREMYE KOZE

Byenveni nan seri etid sa a sou kijan pou w' byen jere fanmi an.

Chak sijè nan seri sa a se yon leson de (2) paj ki kòmanse ak yon etid biblik. Apre sa, chak leson bay kèk devwa pou papa a fè pou kont li, ak madanm li, epi avèk timoun yo. Dezyèm paj la gen plis enfòmasyon pou agrandi leson an epi pou fè yon ti kòmantè sou leson an. Lèfini, chak leson fini ak yon ti istwa ki gen rapò ak leson an.

ETID POU MESYE MARYE pa sèlman bay bon konsèy, men li montre yon papa kijan pou l' devni yon papa ki ranpli wòl li byen. Li bay nou kèk bon etap byen defini sou kijan pou byen jere fwaye nou.

Etid sa a va dire yon ane depi nou fè yon leson chak semenn. Men kèk etap nou konseye w' pou w' swiv nan chak leson :

1. Kòmanse pa lapriyè. Mande Bondye sajès pou L' ede w' fè leson an.
2. Fè Etid Biblik la.
3. Li dezyèm paj la.
4. Fè Devwa yo. Devwa sa yo va ede leson an pi anrasine nan kè ou epi yo va ede w' mete l' ann aplikasyon olye pou w' kenbe l' nan tèt ou sèlman.

KÈK FASON OU KAPAB ITILIZE ETID SA YO :

1. Kòm yon devosyon pèsonèl.
2. Kòm yon liv Lekòl Dimanch.
3. Kòm yon kou nan lekòl oubyen nan lekòl biblik.
4. Kòm yon zouti pou fè etid, oubyen pou bay konsèy ak moun ki fiyanse oubyen ki marye.
5. Kòm yon èd pou w' konseye paran enkonvèti yo yon fason pou ede yo wè kijan yo bezwen Bondye nan lavi yo ak nan fanmi yo.
6. Kòm yon devosyon familyal.
7. Kòm yon resous pou etid ak mesaj.

Etid Pou Mesye Marye : Grandi Nan Lavi Espirityèl Ou

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 1

YON ÒM SELON BONDYE

BI LESON AN : Pou konprann kijan yon òm selon Bondye dwe viv.

Vèsè Kle :

1. **3 JAN 1.11** Yon òm selon Bondye se yon moun ki viv pou Bondye epi li va _____.
2. **2 Timote 3.16-17** Yon òm selon Bondye va konnen Pawòl Bondye a, epi se Pawòl la menm ki va ba li tout sa l' bezwen pou l' kapab _____.
3. **1 Wa 17.24** Madanm lan te konnen Eli se te yon òm Bondye ki te gen _____ (verite) nan bouch li.
4. **Danyèl 1.8** Danyèl te obeyi Bondye epi Bondye te rekonpanse li. Kijan Danyèl te obeyi Bondye ?


5. **Jozye 24.15** Jozye se te yon gason djamn ki te chwazi pou l' kanpe pou kont li pou Bondye. Kisa Jozye te di ki montre nou li te dakò kanpe tou sèl ?

Devwa Pou W' Fè



Pou Kont Ou

Gade lis la ki nan do fèy sa a epi bay tèt ou yon mwayen ant en (1) a senk (5) pou chak pwen. Senk (5) la pi bon, epi en (1) an pi mal. Apre sa, adisyonnen tout chif yo ansanm.



Avèk Madanm Ou

Mande madanm ou pou l' ba ou yon mwayen nan chak pwen sa yo tou. Konpare sa l' mete a avèk sa ou te mete, epi pale sou rezulta a. Sou ki pwen fèb ou dakò pou w' travay plis ?

Avèk Pitit Ou

Li istwa Etyèn lan ansanm avèk yo nan Travay chapit 7. Esplike yo kijan Etyèn se te yon òm selon Bondye malgre yo te touye l'.

YON ÒM SELON BONDYE

Lesson 1

Ak kisa yon òm Bondye sanble ? Yon òm selon Bondye toujou fyè, li genyen de-tèminasyon, epi li obeyisan devan Bondye. Nan 1 Timote 3.1-7, avèk Tit 1.5-9, Apòt Pòl te bay yon lis bagay chak lidè Bondye dwe genyen lakay li. Nou ta sipoze jwenn bagay sa yo kay chak papa tou.

MEN LIS BAGAY YO YON ÒM SELON BONDYE DWE DEVLOPE LAKAY LI :

1 TIMOTE 3.2 San repwòch

Yon sèl madanm, sa vle di li rete pwòp
Seryozite ; konn jije byen avèk yon panse ki fèm
Lòt moun respekte l' poutèt fason li viv byen
Resevwa moun byen
Konn anseye lòt moun

1 TIMOTE 3.3 Pa kite gwòg mennen l'

Pa nan kont ak lòt moun
Pasyans ak kè poze
Pa renmen lajan

1 TIMOTE 3.4 Mennen lakay li byen kote pitit li yo respekte epi obeyi li

1 TIMOTE 3.6 Toujou ap grandi chak jou

1 TIMOTE 3.7 Menm moun ki pa konvèti yo respekte l'

TIT 1.7 Pa chache fè tèt li plezi

Pa fè kòlè fasil
Pa brital ; konn kontwole aksyon l' yo
Renmen sa ki byen
Kontwole dezi l' yo
Pa fè peche

Ou pa ka devni yon òm Bondye konsa konsa. Okontrè, se yon bagay ki pran tan avèk efò. Se yon pwosesis kote n'ap grandi chak jou. Pandan yon òm ap vin pi sen, li kapab wè sa nan pwòp lavi li. Lòt moun kapab wè sa tou paske l'ap vin sanble Jezi pi plis chak jou.

...PRAN KOURAJ, PITIT MWEN ! METE GASON SOU OU ! SE POU OU FÈ TOU SA SENYÈ A, BONDYE OU LA, VA BA OU LÒD FÈ... (1 WA 2.2-3)

ANN GADE LAVI A

Yon jou apremidi, Pastè Toussaint te al' vizite yon fanmi ki te fenk antre nan katye a. Papa a pa t' la, men manman an te la ansanm avèk timoun yo. Pastè a te di li tapral tounen pita men timoun yo te di konsa : « Ou met fè yon ti tann. Papa ap vini toutalè. » Apre sa timoun yo te kòmanse pale byen cho sou papa yo epi yo t'ap di pastè a tout sa papa a konn fè. Apre yon ti tan papa a te vin antre. Pastè a te sezi. Dapre fason timoun yo t'ap pale, li te antann pou l' jwenn ak yon bèl potorik gason. Men se pa sa li te wè. Li te wè yon senp gason ki pa t' twò bèl. Si ou ta kontre avè l' nan lari a, menm salye ou pa t'ap salye l'. Malgre sa, fanmi an te respekte nèg la anpil epi lòt moun te respekte l' tou. Mesye sa a se te yon « òm selon Bondye » devan fanmi li.

**Lè yon òm obeyi
Bondye, sa fè
l' jwenn favè
devan Li.**

**Lè nou viv selon
Bondye, sa aji sou :**

- pwòpte moral nou
- relasyon nou yo
- bi nou yo
- karaktè nou

**Pou ou kapab devni yon
òm selon Bondye, sa
mande tan avèk efò.**



Etid Pou Mesye Marye : Grandi Nan Lavi Espirityèl Ou

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 2

Sa Ki DWE PRAN DEVAN

BI LESON AN : Pou montre papa yo kijan sa enpòtan pou yo renmen Bondye, madanm yo, ak pitit yo.

Vèsè Kle :

1. **DETEWONÒM 6.4-5** Kisa pèp Izrayèl la te dwe sonje anpremye ? _____

2. **Matye 22.36-37** Kisa Jezi te bay kòm pi gwo kòmandman an ? _____

3. **Kolosyen 3.19** Ki lòd Bib la pase mesye marye yo ? _____

4. **Efezyen 5.25** Kijan yon mari dwe renmen madanm li ? _____


5. **Efezyen 6.4** Lè Bib la fin montre mari yo kijan pou yo fè Bondye plezi ak kijan pou yo renmen madanm yo, li fè yo konnen kijan pou yo aji avèk _____ tou.

Devwa Pou W' Fè



Pou Kont Ou

Gade lavi ou. Èske ou pase plis tan ap pran plezi pase ou pran nan lapriyè, lekti nan Bib la, ak nan adorasyon ?



Avèk Madanm Ou

Chwazi yon jou nan semenn k'ap vini an epi byen kontwole konbyen tan ou pase ap pale avèk madanm ou. Kontwole anviwon konbyen minit ou te pale avè l' pandan jounen an.

Avèk Pitit Ou

Chwazi yon jou nan semenn k'ap vini an epi byen kontwole konbyen tan ou pase ap pale avèk pitit ou. Kontwole anviwon konbyen minit ou te pale avèk yo pandan jounen an.

SA KI DWE PRAN DEVAN

Lesson 2

PREMYÈMAN—RELASYON AVÈK BONDYE

Se relasyon yon nomm avèk Bondye ki pi konsekan pase tout lòt bagay nan lavi li. Relasyon sa a aji sou lavi k'ap vini an. Nonsèlman sa, men li aji sou lavi yon nomm sou tè a tou. Li aji sou fason yon moun aji avèk madanm li ansanm ak pitit li tou. Lè yon nomm mete Bondye anpremye nan lavi li, sa rann li eseye viv kòm yon mari ak yon papa ki fè Bondye plezi. Lè l' mete Bondye an premye posisyon, l'ap swiv egzanp Jezi a epi l'ap bat pou l' obeyi sa Jezi te di nan Matye 22.37 kote Li te di : « Se pou ou renmen Mèt la, Bondye ou, ak tout kè ou, ak tout nanm ou, ak tout lide ou. »

MATYE 16.26 ; MATYE 22.37–38

DEZYÈMMAN—RELASYON AVÈK MADANM OU

Sa ki nan dezyèm posisyon nan lavi yon nomm se relasyon li avèk madanm li. Apre Bondye, yon mari dwe renmen madanm li pi plis pase tout lòt moun ki genyen. Madanm lan pi enpòtan pase pitit li, travay li, paran l', ansanm avèk lòt moun. Mari a dwe fè tout sa l' kapab pou l' pran swen madanm li epi ede l' nan lavi li tou.

JENÈZ 2.24 ; EFEZYEN 5.28, 33 ; 1 PYÈ 3.7

TWAZYÈMMAN—RELASYON AVÈK PITIT OU

Apre relasyon yon nomm avèk madanm li, sa ki vin an twazyèm posisyon se relasyon li avèk pitit li. Yon papa dwe konnen epi renmen pitit li. Li dwe konnen santiman yo, rèv yo, sa yo renmen ak sa yo pa renmen, ansanm avèk dezolasyon yo. Yon bon papa chache konnen sa pitit yo bay valè ak kijan yo konprann lavi a. Fòk yon papa pran tan pou l' fè konesans avèk pitit li. Fòk li pran tan pou anseye yo sou Bondye, sou Pawòl Li, ak kijan pou yo viv pou Li. Nonsèlman sa, men fòk li pase tan ap jwe avèk yo tou. Apre Bondye avèk madanm li, pitit yon nomm dwe nan twazyèm posisyon nan lavi li.

DETIEWONÒM 6.7 ; PWOVÈB 22.6 ; EFEZYEN 6.4

YO OFRI TÈT YO BAY SENYÈ A ANVAN. (2 KORENT 8.5)

ANN GADE LAVI A

Yon bon jou Vladimi te fè pitit gason li, ki te gen douzan, konnen li tapral fè lapèch avèk li Samdi pwochèn. Byen bonè Samdi maten, patwon Vladimi an te rele l' epi te mande l' pou l' vin travay. Vladimi te blyie afè lapèch la epi li te reponn patwon an « Wi ! ». Lè tigason an te leve jou sa a, li pa t' jwenn papa li. Sa te fè l' tris anpil epi Vladimi pa t' janm mande pitit li eskiz.

Apre detwa zan, tigason an te vin fè rebèl kont paran l'. Tò sa a papa l' te fè l' la pa t' janm geri epi li te grandi tounen yon rebelyon. Sa Vladimi te gade pou piti, pitit li te gade pou gwo.

Papa te kòmanse pale avèk tigason an. Yo te vin eskize youn lòt. Vladimi te menm rive pran kèk jou konje nan travay li pou l' al' fè lapèch avèk pitit gason an. Tanzantan relasyon brize sa a te kòmanse geri.


Relasyon yon nomm avèk Bondye aji sou fason li aji avèk madanm li ansanm ak pitit li tou.

Relasyon yon mari avèk madanm li pi enpòtan pase :

- pitit
- travay
- paran
- lòt moun

Men sa yon papa dwe konnen nan lavi pitit li yo :

- santiman yo
- rèv yo
- sa yo renmen ak sa yo pa renmen
- dezolasyon yo



Etid Pou Mesye Marye : Grandi Nan Lavi Espirityèl Ou

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 3

B1

B1 LESON AN : Pou konprann kijan yon bi bon ak kijan pou n' etabli yon bi.

Vèsè Kle :


1. **FILIPYEN 3.14** Ki bi chak Kretyen dwe travay pou l' atenn ? _____
2. **Jan 2.6-8** Ou kapab konn bout yon bi. Ou va konnen lè ou fin atenn avèk yon bi. Konbyen ja Jezi te di sèvitè yo pou yo plen ? _____
3. **Jenèz 29.18** Pou atenn avèk yon bi, fòk nou gen yon plan. Ki plan Jakòb te genyen ? _____
4. **1 Samyèl 17.40** Nou dwe prepare nou si n' vle atenn avèk yon bi. Kijan David te prepare l' pou l' atenn avèk bi pa l' la ? _____
5. **Neyemi 2.17-18** Neyemi te gen yon bi. Kisa pèp la te di lè l' te fè yo konnen bi li te genyen an ? _____

Devwa Pou W' Fè



Pou Kont Ou

Defini yon bi ou vle atenn nan ane pwochen an. Dekri etap yo w'ap oblige swiv pou w' kapab atenn avèk bi sa a. Sonje pou w' ekri konbyen tan chak etap va pran, konbyen lajan w'ap bezwen pou chak etap, elatriye.



Avèk Madanm Ou

Ankouraje madanm ou nan bi li genyen yo. Fè yon ti koze avè l' sou ki plan li genyen pou chak semenn.

Avèk Pitit Ou

Bay timoun yo kèk travay pou yo fè chak jou. Pran yon fèy kaye epi make kèk bwat sou li. Chak fwa timoun lan fè travay la, mete yon kwa nan yon bwat. Bay l' yon prim lè l' rive ranpli tout bwat yo nèt.

Yon bi se yon bagay ou anvi atenn. Ou fè anpil efò pou sa kapab mache. Si pou l' yon vrè bi, fòk ou gen fason pou w' konnen lè w' atenn bi ou.

Yon bi diferan avèk yon rèv. Yon rèv se yon lide konsa konsa. Pa egzanp, ou kapab di : « Mwen vle devni yon bon papa. » Ou kapab defini yon bi. Pa egzanp, ou kapab di : « Mwen pral pase yon sware chak semenn lakay avèk fanmi mwen pandan rès ane a. »

Yon bi bon paske li ba ou yon chalè pou w' fè sa ou dwe fè a. Yon bi ede w' vize pi devan. Lè ou etabli yon bi, epi lè l' atenn avè l', sa rann ou santi ou fyè.

MEN KÈK ETAP POU ETABLISSE YON BI :

1. Panse sou kisa ou ta renmen reyalize nan lavi ou pi devan. Kisa ou ta renmen devni apre twa (3) mwa, ennan, dezan, oubyen apre senkan ? Priye sou sa epi mande Bondye kisa ou ta dwe devni.
2. Ekri bi ou yo sou yon fèy papye epi etabli yon dat kote ou vle atenn avèk chak bi. Ekri chak bi nan yon fason kote ou kapab konnen si w'ap fè pwogrè ou non.
3. Panse avèk kote ou vle rive a epi retounen sou kote ou ye kounyeya. Ki etap w'ap oblige pran pou w' atenn avèk bi ou a nan dat ou vize a ? Ekri tout etap yo.
4. Etabli yon dat pou chak etap. Dat sa yo va mennen ou nan dat final la ou te etabli pou tèmine avèk bi a.
5. Fè madanm ou, oubyen yon zanmi pwòch ou, konnen ki bi ou genyen. Konsa, l'ap ka mande ou kont pou wè si w'ap travay sou bi a ou non.

EFEZYEN 5.15-16 ; EBRE 12.1-2 ; 2 TIMOTE 4.7-8

**Yon bi toujou
mache avèk
yon plan sou
kijan ou kapab
atenn bi a.**

**Etap pou etabli
yon bi :**

- deside ki bi ou genyen
- ekri bi a sou yon fèy papye
- etabli kèk etap pou w' konnen kijan ou pral atenn avèk bi a
- chwazi yon dat pou fin atenn avèk plan an ansanm avèk bi a
- chwazi yon zanmi pou rann ou res-konsab

**MWEN FIN MENNEN BATAY LA BYEN MENNEN, MWEN RIVE NAN BOUT KOUS MWEN,
MWEN KENBE KONFYANS MWEN FÈM NAN BONDYE. (2 TIMOTE 4.7)**

Yon bi ede w' aji.

ANN GADE LAVI A

Wilyam te santi te gen yon pakèt bagay li te vle fè nan lavi li, men bagay sa yo pa t' janm mache. Wilyam te pran desizyon pou l' dekri tout bi li yo sou yon fèy papye pou l' planifye bi yo pi byen. Men kijan li te kòmanse bati fèy la :

KISA MWEN VLE
REYALIZE ?


Li tout Nouvo Testaman
an pou m' ka vin konnen
plis nan Bib la.

KIJAN M'AP KONNEN LÈ
M' REYISI ?

Lè m' fin li liv
Revelasyon an.

KILÈ MWEN DWE ATENN
AVÈK BI SA A ?

Nan fen ane a.



Etid Pou Mesye Marye : Grandi Nan Lavi Espirityèl Ou

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 4

KÒLÈ

B1 LESON AN : Aprann kijan pou w' kontwole kòlè ou.

Vèsè Kle :

- EFEZYEN 4.26** Lè ou santi kòlè moute ou, sa pa vle di ou fè peche poutèt sa. Men, kòlè a kapab fè ou fè _____.
- Jenèz 4.6-8** Bondye te fè Kayen obsèvasyon poutèt kòlè li. Men olye pou l' obeyi Bondye, kisa Kayen te fè ? _____
- Pwovèb 15.1** Ki kalite pawòl ki pouse kòlè ? _____
- Eklezyas 7.9** Fòk ou aprann kijan pou w' aji kont kòlè. Kisa yon moun fou fè avèk kòlè li ?


- Efezyen 4.31** Bondye pa vle pou w' viv avèk kòlè. Kisa Bib la mande w' pou w' fè avèk kòlè a ?

Devwa Pou W' Fè



Pou Kont Ou

Gen pafwa ou fè kòlè lè yon bagay pa mache jan ou te vle pou l' mache a. Panse avèk yon lè sa te rive ou. Èske ou te anvi twòp bagay ? Èske se nan Bondye ou te konfye pou fè bagay sa rive ?



Avèk Madanm Ou

Panse avèk yon okazyon kote ou te fè kòlè sou madanm ou. Si ou poko janm mande l' eskiz pou sa, al' mande l' eskiz. Apre sa, priye ansanm sou pwen sa.

Avèk Pitit Ou

Mande yo pou yo ekri senk (5) bagay ou konn fè ki fè yo fache. Pale avèk yo sou repons yo te bay yo.

KÒLÈ SE PWOBLÈM PA OU.

Kòlè se yon santiman tout moun konn genyen. Li pa ni byen, ni mal. Donk, se dapre sa ou fè lè ou ankòlè ki rann li bon oubyen pa bon. Fòk ou deside kisa ou pral fè avèk kòlè a. Ou pa ka di se lòt moun ki fè ou aji avèk kòlè. Si ou deside fè kòlè, fòk ou dakò asepte pran tò a pou tout sa ou fè ki mal pandan ou te ankòlè. Se poutèt sa Bondye te di : « Si nou ankòlè, veye kò nou pou kòlè a pa fè nou fè sa ki mal. » Fason ou demonstre ou ankòlè se desizyon pa w' li ye.

FASON POU W' JERE KÒLÈ.

Anpremye, fòk ou pran konsyans. Si ou gen kòlè, sa pa saj pou w' fè kòmsi se pa vre. Si w' pa jere kòlè a, sa kapab rann ou vin gen amètim epi li ka rann ou menm fè vyolans. Dezyèmman, fòk ou deside pou w' kontwole kòlè a. Twazyèmman, chache konn poukisa ou te fè kòlè. Gen anpil moun ki fè kòlè lè yo santi yon moun te vyole dwa yo. Lè ou renmèt tout dwa ou yo nan men Bondye, sa rann ou lib anba sa ki fè anpil mou fè kòlè. Katriyèmman, konfese kòlè a bay Bondye epi mande Li pou L' ede w' kontwole li. Senkyèmman, si w' te fè yon lòt moun tò, konfese peche sa a epi mande l' eskiz. Konsa tou, li bon pou w' pale avèk yon konseyè, oubyen yon zanmi ou fè konfyans, sou pwoblèm kòlè a. Konsa ou kapab jwenn èd pou w' ranje pwoblèm lan ki fè ou te fè kòlè.

PA SERE KÒLÈ NAN KÈ OU.

Gen kèk moun ki pale, oubyen ki aji avèk kòlè paske yo vle blese yon lòt moun. Gen kèk moun ki fè tèt yo mal paske yo sere santiman sa yo nan kè yo. Lè yon moun fè sa, sa ka vin ranpli kè l' ak kòlè, dezespwa, oubyen lide pou l' fè tèt li mal. Konsa tou, si li kite kòlè a pouse l' pou l' fè vyolans, sa vin kreye plis pwoblèm toujou.

Pwovèb 16.23, 19.11 ; Sòm 37.8 ; Kolosyen 3.8 ; Tit 1.7

PA FACHE, PA FÈ MOVE SAN. OU PA BEZWEN ENNÈVE! SA KAPAB FÈ OU FÈ SA KI MAL. (Sòm 37.8)

ANN GADE LAVI A

Wilyam te lakay ansanm avèk madanm li ak twa (3) jèn timoun. Li te kòmanse ta epi li te fatige. Lapli te tonbe pandan tout jounen an epi konsa timoun yo te oblige pase jounen an andan kay. Kounyeya, timoun yo te kòmanse batay epi Wilyam te kòmanse fache sou yo. Li te kenbe kòlè li pou yon tan, men apre sa, li te vin eklate. Gwo pawòl te kòmanse sòti nan bouch li epi li te kòmanse tire yon bann bagay sou timoun yo. Timoun yo te kouri al' kache anba tab la. Genyen ki te al' kache dèyè pòt la pou yo pa t' donmaje. Sibitman telefòn lan te sonnen. Se te pastè a. Touswit vwa Wilyam te vin janti e dou. Li te fè yon bèl ti dyalòg avèk pastè a. Wilyam te ka kontwole kòlè li lè l' te vle fè sa. Se li menm ki te deside lè pou l' eklate ak lè pou l' desann santiman kòlè a.

Nou pran desizyon :

- pou fè kòlè oubyen pa fè kòlè
- pou kontwole kòlè nou oubyen pou n' kite kòlè a pran pye sou nou

Si pou n' byen jere kòlè a, fòk nou :

- pran konsyans lè nou fè kòlè
- kontwole l'
- chache konn poukisa nou fè kòlè
- konfese l'
- chache konsèy

Fòk nou pa :

- sere kòlè a
- kite kòlè a eklate pou l' blese yon lòt



Etid Pou Mesye Marye : Grandi Nan Lavi Espirityèl Ou

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 5


SIVEYANS ESPIRITYÈL

BI LESON AN : Pou ankouraje papa yo pou yo siveye (rete sou prigad yo) kont danje espirityèl.

Vèsè Kle :


- EFEZYEN 6.18** Kwayan yo dwe _____ avèk pouvwa Lespri a. Yo dwe siveye, kenbe fèm, epi priye pou _____.
- 1 Pyè 4.7** Youn nan rezon ki fè ou dwe byen siveye se pou ou kapab _____.
- 1 Pyè 5.8** Kont kilès Pyè di nou dwe veye ? _____.
- Detewonòm 4.9** Bib la avèti ou pou ou siveye pou ou pa _____.
- 1 Korent 10.12** Ou jwenn avètisman pou byen siveye pou ou pa _____.

Devwa Pou W' Fè



Pou Kont Ou

Mete yon tan apa chak jou pou w' li Bib la epi pou w' priye. Li epi etidyé nan liv Sòm ak nan liv Pwovèb chak jou. Sa va ede w' rete sou prigad ou espirityèlman.



Avèk Madanm Ou

Mande l' si gen kèk bagay ki fè l' pè. Krent li yo kapab ede ou wè kèk danje espirityèl. Apre sa, ou kapab priye pou li pou Bondye kapab pwoteje l'.

Avèk Pitit Ou

Poze yo kesyon sou perèz yo genyen. Kèk nan perèz sa yo kapab yon perèz espirityèl. Perèz sa yo kapab sòti nan lekòl, nan lekti yo fè, nan mizik yo koute, nan televizyon, oubyen nan zanmi. Pale avèk yo sou kisa ou kapab fè pou pwoteje yo kont danje sa yo.

SIVEYANS ESPIRITYÈL

Lesson 5

Yon Kretyen toujou bezwen veye paske Satan toujou ap fè tout sa l' kapab pou detwi Kretyen yo.

PAPA A BEZWEN VEYE TWA (3) BAGAY.

TÈT LI

Fòk li veye pou nenpòt bagay ki kapab fè renmen li pou Bondye febli. Fòk li veye tou pou sa ki kapab anpeche li fè volonte Bondye a tou. Si pou yon papa rekonèt danje espirityèl yo, fòk li konprann kijan Bondye mande pou l' viv. Li kapab rive konprann sa atravè lekti ak etid biblik, lapriyè, dyalòg ak lòt kretyen, ak lòt bon lekti. Se lè sa a l'ap konnen lè yon ansèyman pa tonbe dakò avèk Pawòl Bondye a.

Yon lòt fason ou kapab veye pi byen se pou w' fè jèn epi pase tan nan lapriyè. Ou kapab aprann kèk vèsè biblik pa kè yon fason pou w' kapab resite yo lè ou nan bezwen. Jezi te fè toulede bagay sa yo pandan Satan t'ap tante L' nan dezè a. Pandan w'ap priye, fè jèn, etidye Pawòl la, epi sere l' nan kè ou. Lè sa a Sentespri a va ede w' veye pou wè danje yo. L'ap ede w' sonje sa ou dwe fè ak sa ou pa dwe fè.

MADANM LI

Men kèk bagay ki kapab pote danje kote yon mari dwe veye nan lavi madanm li :

Neglijans nan lekti Pawòl la	Televizyon
Move zanmi	Mòd abiman yo
Liv ak jounal	Santiman ki brize

PITIT LI

Men kèk bagay ki kapab pote danje kote yon mari dwe veye nan lavi pitit li :

Move edikasyon	Move zanmi
Televizyon	Move mizik
Move abitid	Pònografi

SÒM 39.1 ; TRAVAY 20.29–31 ; KOLOSYEN 4.2 ; 1 TESALONISYEN 5.6–8

SE SA K' FÈ, PIGA NOU DÒMI TANKOU LÒT YO. PA KITE DÒMI PRAN NOU. KENBE TÈT NOU ANPLAS. (1 TESALONISYEN 5.6)

ANN GADE LAVI A

Jak te okipe anpil chak jou nan siye bwa epi li te panse madanm li te dwe fòme jennfi yo a ki te gen kenz (15) ane sou tèt li. Men gen yon jou pitit fi yo a te sove kite lakay. Lè yo te resi jwenn li, yo te jwenn li te gentan plase avèk yon nèg.

Jak te vin konsyan kijan li pa t' veye pitit li jan l' te dwe fè sa. Li te manke priye pou li epi li te manke pase tan avèk li tou. Konsa, li te pran yon konje nan travay la pou l' al' pale avèk fi a. Li te rive konvenk li pou l' tounen lakay. Nan lòt ane ki te vini yo, Jak te toujou pran tan pou l' pase tan ak pitit li. Li te mennen fanmi an nan konferans kretyen epi li te mennen yo al' vizite lòt fanmi kretyen tou. Li te fè anpil efò pou pitit fi a te gen chans kontre avèk lòt jenn kretyen.

Yon jou te gen yon jenn gason kretyen ki te renmen avèk pitit fi Jak la epi li te mande l' maryaj. Ni Jak, ni madanm li te kontan pou yo reponn jenn gason an « Wi ! » .

**Chache
konnen Pawòl
Bondye a
pou w' kapab
rekonèt danje
espirityèl yo.**

**Lè ou kenbe kèk
vèsè biblik nan kè
w', epi lè ou fè jèn,
sa kapab ede ou
rete sou prigad
ou pi byen.**

**Siveye pou bagay
ki kapab aji
sou ou ak sou
pitit ou.**



Etid Pou Mesye Marye : Grandi Nan Lavi Espirityèl Ou

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 6

VENK DEKOURAJMAN

Bi LESON AN : Aprann kijan pou w' venk dekourajman.

Vèsè Kle :

- 1 SAMYÈL 30.6** David te twouble epi dekouraje akòz kanmarad li yo te leve kont li. Kisa li te fè pou l' venk dekourajman ? _____
- Sòm 42.11** Otè sòm sa a te tris epi twouble. Kisa li te deside pou l' fè pou l' sòti anba tristès li a ? _____
- 1 Wa 19.4-6** Lè Eli te fatige epi dekouraje, Bondye te kite l' _____, epi apre sa zanj lan te pote _____ bay li.
- Lamantasyon 3.21-22** Se akòz gran amou Bondye a ki rann nou pokò peri. Lè otè a te sonje sa, sa te bay li _____ .
- Ezayi 41.13** Lè w' santi ou pè epi dekouraje, sonje Bondye te di : « Nou pa bezwen _____. M'ap _____ ! »

Devwa Pou W' Fè



Pou Kont Ou

Lè ou ankouraje lòt moun, ou jwenn ankourajman tou. Chache ankouraje yon lòt moun jodi a. Fè moun sa konnen kisa ou apresye nan lavi li.



Avèk Madanm Ou

Apre timoun yo fin kouche, fè yon chòdyè te. Pandan n'ap bwè ansanm, mande l' pou l' pale sou tout sa k'ap fè l' mal oubyen k'ap bay l' pwoblèm.

Avèk Pitit Ou

Èske ou janm di yo konsa : « Ou fè kè m' kontan nèt. » Eseye fè sa. Montre yo sa sòti nan fon kè ou epi se pa bri sapat.

VENK DEKOURAJMAN

Lesson 6

Dekourajman se youn nan zouti Satan yo ki pi efikas. Li itilize dekourajman pou fè Kreyen yo pèdi espwa ak konfyans. Lè yo dekouraje, sa rann yo pè twòp pou yo kontinye mache. Sa rann yo plenn sò yo. Gen anpil fwa se akòz peche, mepri, tripotay, oubyen lè yon moun pa reyisi ki rann yon moun dekouraje. Men kèt etap nou kapab pran pou n' venk dekourajman.

CHACHE DEBARASE W' AVÈK KILPABILITE. Satan pral itilize fòt nou te fè yo pou fè nou santi nou koupab. Si ou vrèman koupab, konfese sa epi repanti. Sa va rann ou pa santi ou koupab ankò. Lè sa a, Satan pa ka itilize bagay sa a pou rann ou dekouraje.

ABIYE W' AVÈK LAFWA. Ou kapab vin santi ou dekouraje lè w' kwè nan manti Satan yo. Li conn di kèt bagay tankou : « Bondye lage w'. » oubyen « Bagay sa a pral fini avè w'. » oubyen « Mwen pa vo anyen. » Aprann kèt vèsè biblik pa kèt ki montre nou verite a anfas manti sa yo. Apre sa, lè Satan mete move lide nan tèt ou, panse ak vèsè sa yo. Konsa, w'ap abiye w' avèk lafwa.

DEBARASE W' AVÈK LÒGÈY. Gen pafwa ou pa vle di lòt moun si w' dekouraje. Ou vle pou yo panse ou se yon nèg ki djanm. Santiman sa a sòti nan ògèy. Lè w' ònèt epi w' pataje bezwen w' avèk lòt moun, lè sa a ou kapab jwenn èd. Konsa tou, lòt moun kapab santi yo ankouraje lè yo konprann gen lòt moun ki conn dekouraje tou.

REMÈSI EPI LOUWE BONDYE. Sonje benediksyon Bondye yo, epi remèsi Li pou sa L' fè. Nou jwenn pouvwa espirityèl lè nou louwe Bondye awotvwa.

LI ISTWA GWO KRETYEN YO. W'ap twouve gen anpil nan bon zanmi Bondye yo ki te pase nan kèt dekourajman tou. Ou kapab tire anpil lesion atravè lavi yo.

PA ESEYE PRAN GWO DESIZYON LÈ OU SANTI OU DEKOURAJE.

2 KORENT 1.4 ; EBRE 12.1-3 ; SÒM 69.30, 32 ; GALAT 6.9

MEN, TOUT MOUN KI METE KONFYANS YO NAN OU, FÈ KÈ YO KONTAN. SE POU YO CHANTE SAN RETE TÈLMAN YO KONTAN. W'AP PWOTEJE MOUN KI RENMEN OU. OU FÈ YO CHANTE POU OU TÈLMAN YO KONTAN. (SÒM 5.11)

ANN GADE LAVI A

Pandan Jak t'ap panse avèk lavi li, li te vin dekouraje anpil. Kay la te vye epi li te nan movèz eta. Pitit li yo pa t' respekte l'. Jak preske pa t' pale avèk madanm li menm. Okontrè, li te sòti pou l' al' bwè avèk zanmi li yo. Malgre Jak te renmen fanmi li, li te vle bay legen poutèt pwoblèm li te genyen yo. Li te anvi viv nan tan lontan lè tè a te bay ase manje pou mesye yo te ka pran swen fanmi yo.

Jak te vle sove pou l' chape anba pwoblèm li yo. Men olye pou l' fè sa, li te al' vizite pastè a. Yo te pale ansanm epi te priye ansanm. Yo te remèsi Bondye pou sa L' te fè epi yo te louwe Li tou. Yo te pale ansanm sou tout bon bagay yo Jak te genyen nan lavi li. Se konsa Jak te rive venk dekourajman li a epi li te jwenn kouraj pou l' kontinye nan wout la toujou.

Satan itilize dekourajman pou l' fè Kreyen yon mal.

Lè ou santi ou koupab pou bagay ki gentan pase dejà, sa ka rann ou dekouraje.

Itilize verite Bondye a pou w' reponn fasa manti Satan yo.

Ouvri kè ou epi mande lòt moun pou ede w' kote ou fèb.

Gen pisans espirityèl nan lapriyè.



Etid Pou Mesye Marye : Grandi Nan Lavi Espirityèl Ou

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 7

VENK MOVE LIDE SEKSYÈL

BI LESON AN : Pou konprann kijan pou n' venk move lide seksyèl nou yo.

Vèsè Kle :



- MATYE 5.27-28** Jezi te di yon move _____ rann ou koupab menm jan avèk yon move aksyon.
- Kolosyen 3.5** Vèsè sa a avèti w' pou w' chase tout move dezi ki sòti nan _____.
- Pwovèb 6.32** Si yon mesye tonbe nan peche seksyèl avèk yon fanm, se detwi l'ap detwi _____.
- Women 6.6, 11** Akòz vye chè nou klouwe sou kwa a, nou dwe gade tèt nou kòm moun ki _____.
- Filipyen 4.8** Nou dwe _____ sou bagay ki bon, ki merite lwanj : bagay ki vre, ki kòrèk, ki dwat, ki bèl, ki p'ap fè nou wont.

Devwa Pou W' Fè



Pou Kont Ou

Aprann Women 6.6, 11 pa kè. Mete yon foto madanm ou nan bous ou epi nan plas kote ou travay la.



Avèk Madanm Ou

Chache plizyè fason pou fè l' konnen kijan li bèl devan ou.

Avèk Pitit Ou

Pale pitit ou yo sou kijan ou renmen manman yo. Montre yo kijan ou renmen epi jwi nan prezans li.

VENK MOVE LIDE SEKSYÈL

Leson 7

Gen anpil gason ki santi yo dekouraje akòz yo pa ka venk move lide yo. Yo santi se pèdi y'ap pèdi lagè a.

Pou w' genyen gè sa a, fòk ou antann pou w' genyen. Espwa sa a baze sou viktwa a Kris te genyen sou lakwa. Apre sa, si ou pèdi kèk batay pandan jounen an, sa pa vle di ou pèdi gè a nèt. Bondye kapab pran defèt sa yo pou moutre ou sa k' fè ou te pèdi. Si w' tire leson nan defèt sa yo, lè sa a ou kapab vin pi fò.

Move panse se yon bagay serye. Move panse sa yo kapab mennen move abitid. Lè w' kontwole panse w', sa ede w' kontwole aksyon ou yo tou. Men kèk fason ou kapab venk move lide.

VEYE JE OU YO. Yon fason pou w' kontwole panse ou se pou w' kontwole je w'. Sa vle di gen kèk liv, kèk pwogram televizyon, kèk jounal, ansanm ak kèk sit entènèt ou p'ap gade. Si kò yon moun kale devan w', ou p'ap gade. Okontré, w'ap fèmen je w' pou w' priye pou moun sa a. Fòk ou antrene je w' pou w' wè sa Bondye wè nan yon moun. Pa gade kalite bagay k'ap fè w' gen move panse.

2 SAMYÈL 11.2-4 ; PWOVÈB 4.23, 25

RANPLASE FOTO SA YO OU SERE NAN LIDE W'. Gen anpil move panse ki sòti nan « foto » sekrè sa yo ou sere nan panse w'. Gen ladan yo ki la depi byen lontan. Lè w' tonbe anba tantasyon, ou konn rale foto sa yo pou w' reflechi sou yo. Yon fason ou kapab ranplase move imaj sa yo se pou w' vize Kris pandan Li te pandye sou kwa a poutèt peche pa ou yo. Mete « foto » sa a nan plas lòt move foto yo ou te konn sere nan kè w'.

WOMEN 6.6 ; SÒM 51.2 ; FILIPYEN 4.8

DEBARASE W' AVÈK BAGAY YO NAN LAVI W' KI KAPAB LAGE W' ATÈ. Satan kapab itilize kèk bagay pou fè w' tonbe ki pa konn bay lòt moun pwoblèm. Petèt se kèk aktivite, zanmi, foto, mizik, fim, liv, oubyen kèk lòt bagay. Fòk ou konnen kisa ki kapab lage w' nan tantasyon. Lè w' retire bagay sa yo nan lavi w', sa se yon fason ou kapab kanpe kont dyab la pou fè l' kouri kite w'.

JAK 4.7 ; WOMEN 13.14 ; EBRE 12.1

FAVÈ BONDYE A MANDE NOU POU NOU KITE MOVE LAVI NOU T'AP MENNEN AN ANSANM AK TOUT MOVE LANVI KI NAN LEMONN... (TIT 2.12)

ANN GADE LAVI A

Natan te gen yon djòb ap siye bwa. Apre yon tan, li te jwenn yon chans pou l' al' travay nan yon biwo. Madanm li pa t' vle pou l' al' travay nan biwo a akòz te gen kèk fi ki te travay la epi li te krent pou Natan pa tonbe damou pou yo.

Natan pa t' koute konsèy madanm li epi li te dakò djòb la. Pa lontan, li te kòmanse gen move panse sou yon fi ki te travay nan biwo a. Li te kòmanse koze avèk li, epi finalman yo te plase ansanm.

Apre yon tan, fi a te kite l' epi Natan te retounen al' jwenn madanm li ak pitit li. Kounyeya, li gen anpil pwoblèm avèk fanmi li poutèt sa l' te fè a. Li vin regrett anpil akòz li pa t' venk move lide yo ki te mennen l' nan adiltè.

Antann pou w' genyen.

Move abitid sòti nan move panse.

Yon pati enpòtan pou n' kontwole panse nou se pou n' kontwole je nou yo.

Vize Kris pandye sou kwa a.

Pa kenbe bagay Satan kapab itilize pou tante ou.



Etid Pou Mesye Marye : Grandi Nan Lavi Espirityèl Ou

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 8


VENK MOVE ABITID PECHE NOU YO

BI LESON AN : Pou aprann plan Bondye a pou n' venk move abitid nou yo.

Vèsè Kle :


- WOMEN 6.16, 19** Abitid fè nou tounen esklav. Nou kapab venk yon move abitid lè nou devlope yon bon abitid pou mete nan plas li. Olye pou n' lage kò nou nan peche, nou dwe lage kò nou nan _____.
- Women 7.15, 19** Vèsè sa yo fè nou konnen kijan move abitid peche yo vrèman fò. Menmsi nou ta vle fè sa ki bon, anpil fwa nou _____.
- Women 6.21, 23** Move abitid mennen nou nan _____. Men Bondye anvi bay ou yon kado gratis ki se _____.
- Women 6.11** Ou dwe gade tèt ou kòm yon moun ki mouri annegad peche men ki gen yon nouvo lavi nan _____.
- Women 8.13-14** Si ou pou Bondye, ou tou gen èd _____ pou ede w' venk move abitid peche yo.

Devwa Pou W' Fè



Pou Kont Ou

Aprann Women 6.12-15 pa kè. Vèsè sa yo montre nou kijan pou n' venk peche. Lè w' fin aprann yo, ou kapab site vèsè sa yo lè w' tonbe anba tantasyon.



Avèk Madanm Ou

Mande madanm ou pou l' ede w' priye pou w' kapab pèsevere jiskaske ou rive venk move abitid ou genyen an. Fè l' konnen ou va chache yon zanmi ou kapab fè konfyans ki kapab ede w' venk move abitid sa a.

Avèk Pitit Ou

Panse avèk yon move abitid yo genyen ou ta renmen pou yo kite. Panse sou ki fason ou kapab fè pou ankouraje yo epi sou ki rekonpans ou kapab bay yo chak jou yo pa demontre move abitid sa a.

VENK MOVE ABITID PECHÉ NOU YO

Lesson 8

Bondye pa vle pou move abitid peche yo pran pye sou yon Kretyen. Li vle pou chak Kretyen viv yon bon lavi lib. Libète sa a sòti nan Sentespri a. Malgré sa, anpil Kretyen twouve yo avèk yon bann move abitid k'ap mare yo. Yo anvi kite abitid sa yo men yo santi yo pa kapab. Men kèk etap nou kapab swiv. Etap sa yo pral ede nou venk move abitid peche nou yo.

APRANN WOMEN CHAPIT 6 AK CHAPIT 8 PA KÈ. Chapit sa yo montre nou kijan pou n' venk peche. Lè ou mete vèsè sa yo nan tèt ou, lè sa se grandi w'ap fè fwi Lespri a grandi nan lavi w' (Galat 5.22-23). Fwi espirityèl sa a va ede w' venk move abitid peche ou yo.

SÈVI AVÈK LEKRITI A POU EDE W' PRIYE. Pa egzant, kisa Women 6.1-2 vle di ? Èske nou dwe kontinye ap fè peche pou nou ka jwenn plis padon ? Non, janmen ! Okontrè, nou mouri annegad peche. Pandan w'ap itilize panse sa yo kòm yon priyè, panse avèk move abitid la ou anvi kite. Itilize mo sa a nan plas mo « peche » a ki nan vèsè 2. Pa egzant, si w' gen abitid pou w' plenyen, itilize vèsè sa a pou w' priye. Ou kapab di : « Kisa n'a di ? Èske mwen mèt kontinye plenyen toujou... ? »

DEBARASE W' AVÈK BAGAY KI KONN MENNEN W' NAN TANTASYON. Sa kapab mande w' pou w' debarase w' menm avèk bagay ki sanble ak sa ki mennen w' nan tantasyon. Si pa egzant ou gen yon move abitid pou w' gade move imaj, sa kapab mande pou w' pa gade okenn imaj menm jiskaske ou venk move abitid ou a.

MANDE YON ZANMI POU L' SWIV PWOGRE OU. Mande madanm ou, pastè a, oubyen yon zanmi Kretyen ki genyen matirite pou l' fè yon swivi sou pwogrè ou chak semenn pou l' wè si w'ap kite move abitid ou a ou non. Fè moun sa byen konnen ki abitid w'ap bat pou w' kite epi fè l' konnen ki kesyon li dwe poze ou.

KOUTE VWA SENTESPRI A EPI OBEYI LI.

WOMEN 6.1-4, 19 ; WOMEN 8.2 ; GALAT 2.20 ; KOLOSYEN 3.1-3

**Aprann Pawòl
Bondye a
pa kè.**

**Itilize Pawòl Bondye
a pou ede w' priye.**

**Retire tout bagay ki
kapab sèvi yon tan-
tasyon pou ou.**

**Etabli yon lè pou
yon moun kapab fè
swivi sou ou.**

**SI N'AP VIV DAPRE EGZIJANS KÒ A, N'A MOURI. MEN, SI OKONTRÈ, PA POUVWA LESPRI
BONDYE N'AP SWIV LA, NOU FÈ EGZIJANS KÒ A MOURI, N'A VIV. (WOMEN 8.13)**

ANN GADE LAVI A

Wobè te gen yon move abitid kote li te toujou koute yon seri move mizik. Li te santi bagay sa a te mare l'. Apre li te fin aprann Women chapit 6 pa kè epi te itilize l' kòm priyè li, bagay yo te kòmanse chanje. Li te santi li te lib anba esklavaj move mizik sa a epi li te gen yon jwa ki t'ap jayi nan kè l'. Li pa t' konn genyen yon dezi pou l' koute mizik sa a ankò. Li te boule tout CD yo ki te gen mizik sa a sou yo, epi li te efase tout chan sa yo sou òdinatè li ak sou telefòn li tou. Wobè vin pa sibi tantasyon nan lavi li menm jan ankò. Menm nan kèk lòt pwen nan lavi li, tantasyon yo vin diminye. Wobè santi yon nouvo libète nan lavi espirityèl li depi li te kite move abitid sa a.



Etid Pou Mesye Marye : Grandi Nan Lavi Espirityèl Ou

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 9

KONVIKSYON

BI LESON AN : Pou konprann sa k' rele konviksyon ak rezon ki fè yon mesye dwe genyen konviksyon.

Vèsè Kle :

1. **WOMEN 4.18-21** Yon konviksyon se yon kwayans ki fèm. Se tankou konfyans Abraram te gen nan Bondye lè li te kwè Bondye te ka fè sa L' te pwomèt la. Ki pwomès Bondye te fè Abraram ?

2. **Travay 5.29-30** Pyè ak Jan te konnen yo te dwe obeyi Bondye paske yo te wè kijan Bondye te fè sòti vivan nan lanmò.

3. **Danyèl 11.8** Konviksyon va ede w' pran bon desizyon. Danyèl te deside pou l'
_____.
4. **Danyèl 3.16-18** Yo te mande twa (3) mesye sa yo pou yo adore yon lòt moun nan plas Bondye a. Tèlman yo te kwè nan Bondye yo te dakò
_____.
5. **Sòm 119.2** Kisa sila yo ki obeyi Bondye, epi ki sèvi Li avèk tout kè yo, va jwenn ?

Devwa Pou W' Fè



Pou Kont Ou

Èske ou gen konviksyon ou tèlman kwè ladan yo, kote ou pa gen okenn dout sou pwen sa a ? Site twa (3). Pale yon lòt moun sou konviksyon sa yo.



Avèk Madanm Ou

Pale avèk li sou twa (3) pi gwo konviksyon ou gen nan lavi ou. Kijan konviksyon sa yo gen rapò avè l' ansanm ak fanmi an ? Pale avè l' sou sa.

Avèk Pitit Ou

Pale avèk timoun yo sou twa (3) pi gwo konviksyon ou gen nan lavi ou. Pran Bib la pou montre yo sa k' fè ou gen konviksyon sa yo.

Si pou ou reyisi, fòk ou genyen konviksyon. Yon gason ki pa gen konviksyon se yon gason ki tou fèb. Si pou yon mesye reyisi nan lavi kretyen an, nan maryaj li, oubyen nan fanmi li, fòk konviksyon yon nonm sòti nan Bib la.

Yon konviksyon ki sen pa sòti nan opinyon lèzòm, ni nan sa yon moun renmen. Okontré, yon konviksyon vini lè yon moun kwè nan yon verite ki nan Pawòl Bondye a. Tèlman moun lan kwè nan verite sa a, l'ap dakò kenbe konviksyon sa a kèlkeswa sa sa va koute li. Kwayans sa a tou chanje fason moun lan t'ap mennen lavi li.

Yon papa dwe pran devan nan afè konviksyon. Apre li fòme konviksyon pa li, fòk li anseye konviksyon sa yo bay fanmi li. Men sèt (7) konviksyon ki sòti nan Bib la. Chak papa dwe gen konviksyon sa yo epi li dwe anseye fanmi li sou yo tou. Konviksyon sa yo va ede l' pwoteje fanmi li kont move dezi, fo doktrin, ansanm avèk tantasyon Satan.

1. Bib la se Pawòl Bondye a epi nou dwe mennen lavi nou dapre Pawòl la.
2 TIMOTE 3.16 ; MATYE 4.4 ; SÒM 119.9
2. Nou dwe panse sou bagay ki nan syèl la olye pou n' panse sou bagay ki sou tè a sèlman. MATYE 6.19–20 ; KOLOSYEN 3.2 ; MATYE 6.31–33
3. Pi gwo bi yon moun dwe genyen se pou l' renmen Bondye avèk tout kè li epi pou l' baze lavi li sou Bondye tou. DETEWONÒM 6.5 ; FILIPYEN 3.8 ; MAK 12.30
4. Maryaj se yon angajman ou te pran avèk madanm ou pou lavi.
MATYE 19.6 ; WOMEN 7.2–3 ; 1 KORENT 7.10–11
5. Pitit yon nonm se pou Bondye yo ye epi li reskonsab pou l' anseye yo sou Bondye.
DETEWONÒM 6.6–7 ; SÒM 127.3
6. Kò yon moun se tanp Bondye a li ye epi li pa dwe sal li avèk peche.
1 KORENT 3.16–17 ; MAK 7.21–23 ; 1 PYÈ 2.11
7. Jezi se Pitit Bondye a epi Li se sèl chemen Sali.
JAN 14.6 ; JAN 17.7–8 ; JAN 3.16

Lè ou devlope konviksyon, epi pandan ou obeyi yo, Bondye va beni ou avèk fòs espirityèl. Li va beni pitit ou yo tou. Si w' pa obeyi konviksyon ou yo, sa p'ap aji sou ou menm avèk fanmi pa ou sèlman, men sa pral aji sou pitit pitit ou yo tou (Egzòd 20.5–6)

.ALA BON SA BON POU MOUN KI KENBE PRENSIP LI YO, POU MOUN K'AP CHACHE OBEYI L' AK TOUT KÈ YO ! (SÒM 119.2)

ANN GADE LAVI A

Alens te granmoun epi li te gen yon konviksyon. Li te kwè lajan se yon bagay Bondye prete lòm. Li te kwè li dwe travay pou l' fè kòb, epi jere kòb sa a jan Bib la mande l' pou l' fè sa. Li te travay di epi li te gen yon bon biznis. Lè li te gen ase laj pou l' pran pansyon, li te vann biznis li epi li te gen anpil kòb. Li te deside pou l' sèvi lajan sa a nan lèv Senyè a. Li te bay kòb pou l' batì yon legliz nan yon zòn ki pa t' twò lwen avèk lakay li. Li te bay yon zanmi Kretyen kòb pou l' te ka ale nan yon lekòl biblik. Li te bay yon lidè Kretyen kòb pou kouvri depans li yo pandan li t'ap vwayaje pasipala nan travay Senyè a.

Konviksyon yo Alens te genyen konsènan lajan te ede l' sèvi avèk lajan an yon fason pou bay Bondye lwanj.

Konviksyon :

- baze sou Bib la
- pa chanje fasil
- egzije nou pou n' obeyi yo
- chanje fason n'ap viv


Yon konviksyon pa :

- sòti nan sa ou renmen
- sòti nan opinyon ou

Etabli konviksyon konsènan :

- Bib la
- byen
- bi pou lavi ou
- maryaj
- pitit
- kò ou
- Jezi

**Yon
konviksyon
va aji sou pitit
nou yo ak pitit
pitit nou yo.**



Etid Pou Mesye Marye : Grandi Nan Lavi Espirityèl Ou

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 10

KONFESYON

BI LESON AN : Pou konprann ki enpòtans ki gen pou n' konfese lè n' fè yon bagay ki pa bon.

Vèsè Kle :

- 1 JAN 1.9** Vèsè sa a pwomèt nou Bondye va padone nou si nou _____ peche nou ak fòt nou yo.
- Lik 15.21** Ti gason pwodig la te konfese bay papa l' kote li te di : « Papa mwen _____ kont ou. »
- Jak 5.16** Jak montre nou kijan yon moun dwe _____ lè l'ap priye pou gerizon.
- Travay 19.18** Anpil moun ki te kwè nan Jezi Kris te _____ move bagay yo t'ap fè yo.
- Pwovèb 28.13** Zafè yon moun k'ap _____ peche li p'ap janm mache. Sa pi bon lontan pou _____ peche ou epi _____ ou.

Devwa Pou W' Fè



Pou Kont Ou

Mande Bondye pou l' montre ou si gen yon moun ou te ofanse san ou pa t' mande moun lan padon. al' jwenn moun sa a epi fè yo konnen ou te mal aji epi tou mande li eskiz.



Avèk Madanm Ou

Pale avè l' sou nenpòt move santiman ki genyen nan relasyon nou. Kote ou fè sa k' pa bon, prese konfese fòt ou.

Avèk Pitit Ou

Li istwa ti gason pwodig la nan Lik 15.11-32 ansanm avèk yo. Esplike yo kijan ti gason an te vrèman regrett move bagay li te fè yo, ak kijan li te konfese devan papa li.

Sa t'ap bon nèt si apre de (2) moun te fin marye yo t'ap toujou viv byen youn avèk lòt. Men, se pa konsa bagay yo ye. Konn gen konfli ant yon mari avèk madanm li. Si nou pa byen jere konfli sa yo, sa ka lakòz santiman nou yo vin brize. Lè santiman yon moun fin brize, sa ka fè li fè kòlè. Lè kòlè met pye nan lavi yon moun, sa rann moun lan vin gen amètim, epi kenbe moun nan kè. Li vle pou lòt moun lan soufri menm jan avè l'. Sa toujou angrave pwoblèm lan. Lè nou reyaji konsa, sa pa fè Bondye plezi. Okontrè, Li mande nou pou n' konfese santiman brize nou yo ak amètim nou an.

YON RELASYON KI BRIZE SE YON PECHE LI YE. Nan Matye 5.21–24 Jezi te di kòlè kont yon lòt moun se yon peche li ye. Yon moun ki kenbe kòlè nan kè li kont yon frè tou koupab devan Bondye. Jezi menm fè konnen yon moun ki panse, oubyen ki di yon move bagay kont frè li fè peche tou. Yon moun ki rele frè li « moun fou » gen pou l' ale nan Lanfè a.

CHACHE BYEN ANKÒ. Jezi te pale byen klè nan vèsè sa yo nan Matye chapit 5. Li te di si yon moun nan wout pou l' al' legliz pou l' ofri yon bagay devan Bondye, li dwe sonde lavi li pou wè si li gen okenn kont ant li menm ak yon frè.

Si gen yon bagay ki pokò rezoud ki ka rann li pa gen lapè, lè sa a Bondye p'ap asepte ofrann nan men moun sa a. Fòk moun sa a ale pou l' regle pwoblèm lan avèk frè li anvan. Apre sa, li mèt tounen epi Bondye va asepte ofrann li lè sa a.

Nan ansèyman sa a, Jezi pa montre nou kilès ki te antò. Okontrè, men sa Jezi vle di : « Si ou konnen gen yon pwoblèm ant ou menm ak yon frè ki rann nou pa byen, fòk ou al' pale avèk frè sa a. » Rezolisyon pwoblèm lan gen plis valè pase kilès ki antò. Petèt se ou menm ki antò. Petèt se frè ou ki antò. Petèt se nou toulede ki gen tò. Sa ki esansyèl se pou n' pale ansanm sou pwoblèm lan epi chache rezoud li. Se lè sa a Bondye ka jwenn glwa epi lòt Kretyen yo kapab ankouraje tou

KONFESYON MENNEN BENEDIKSYON. Nan Jak 5.16, Bib la ankouraje nou pou n' konfese fòt nou yo youn bay lòt. Bondye pwomèt pou L' beni sila yo ki konfese. Kretyen ki konfese peche yo youn bay lòt, epi ki priye youn pou lòt, va jwenn gerizon pou maladi kò ansanm ak maladi emosyonèl tou. Bondye pwomèt konfesyon ak lapriyè yon moun ki jis devan L' gen anpil pouvwa.

MATYE 18.15–17

LÈ SA A, MWEN REKONÈT PECHE M' YO DEVAN OU, MWEN PA T' KACHE OU SA M' TE FÈ KI MAL. MWEN DI : M'AP RAKONTE SENYÈ A TOUT BAGAY. APRE SA, OU TE PADONNEN TOUT PECHE M' YO. (SÒM 32.5)


ANN GADE LAVI A

Yon jou swa Maga te kwit yon chodyè diri. Awòl te kòmanse plenyen. Li te di manje a manke sèl. Maga te vin fache epi jouré met pye. Finalman, Maga te kouri antre nan kay la ak dlo nan je l'. Awòl te chita pou kont li pou yon ti tan. Li te rekònèt li te gen tò epi te dwe mande madanm li eskiz. Li te konnen vrè pwoblèm lan se te atitud li anvè Maga. Gen anpil fwa Awòl te engrà, epi li te konn konpare Maga avèk manman l'. Li te bezwen konfese move atitud sa yo. Lè Awòl te fin mande madanm li eskiz pou move atitud li yo, Maga te padone li ! Apre sa, yo te viv pi byen youn ak lòt.

**Jezi te
anseye nou
pou n' konfese
lè nou kenbe
yon moun nan
kè, ak lè
santiman nou
yo brize.**

**Sa ki pi enpòtan
pase pou w' jwenn
kilès ki te antò, se
pou w' chache
rebyen ankò.**

**Yon Kretyen ki
konfese fòt li yo va
jwenn benediksyon
nan men Bondye.**



Etid Pou Mesye Marye : Grandi Nan Lavi Espirityèl Ou

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 11

PADON

B1 LESON AN : Pou demontre enpòtans padon.

Vèsè Kle :



- MATYE 18.22** Pyè te mande Jezi si sa te kont pou l' padone frè li pandan sèt (7) fwa. Jezi te di li dwe padone frè li _____ fwa.
- Efezyen 1.7** Se atravè lanmò Jezi ak san Li te vèse a ki rann ou _____.
- Kolosyen 3.13** Menm jan Jezi te padone ou, se konsa ou dwe _____.
- Efezyen 4.32** Bib la di nou dwe _____ epi _____ youn ak lòt.

Devwa Pou W' Fè



Pou Kont Ou

Semenn sa a, chwazi de (2) vèsè nan lis sa a pou w' aprann pa kè. Vèsè sa yo pale sou afè padon : Mak 11.25 ; Lik 17.4 ; Efezyen 4.32 ; Kolosyen 3.13.



Avèk Madanm Ou

Pran tan pou w' byen panse sou relasyon w' avèk madanm ou. Èske gen yon bagay, kit nan tan pase a, kit nan tan preznan an kote ou poko padone l' pou sa ? Si gen yon bagay, pale avèk Bondye sou sa epi mande Li pou L' ede w' padone li.

Avèk Pitit Ou

Li istwa mesye a ki pa t' padone zanmi li malgre li te jwenn padon pou tèt pa li. W'ap jwenn istwa sa a nan Matye 18.21-35. Pale avèk yo sou kijan yo kapab aplike leson yo ki nan istwa sa a nan pwòp lavi pa yo.

KISA MO PADON AN VLE DI ?

Padon se lè ou efase dosye yon moun. Kèlkeswa sa moun lan te fè w', moun sa pa dwe ou anyen ankò. Lè ou vrèman padone, sa vle di ou gentan renmèt dosye sa a nan men Bondye. Lè yon moun renmèt santiman amètim li avèk santiman revandikasyon li yo bay Bondye, lè sa li kapab blye tò a paske li pa reskonsab pou bagay sa a ankò. Lè ou padone yon moun, ou ouvri kè ou ba li menm jan ou te konn fè oparavan.

PADONE LEZÒT YO.

Lè gen yon santiman ki brize ant de (2) moun, fòk bagay sa a rezoud. Men, kèk fwa moun ki antò a pa konn kijan pou l' mande eskiz, oubyen petèt li pa konn sa l' fè a, oubyen ankò sa pa fè l' anyen. Nan Matye 18-15-35, Jezi te montre nou kijan pou n' padone :

- Fè lòt moun lan konnen sa l' te fè. Pa fè kòmsi bagay sa a pa t' rive vre.
Pa di konsa : « Bon. Sa pa fè m' anyen. Sa pa t' anyen. »
- Montre moun lan ou padone li menm jan Bondye padone ou. Fòk nou montre moun lan nou padone li, men sa gen plis fòs lè nou di l' sa tou.
- Padone chak fwa yo fè w' tò. Pa mete yon limit sou konbyen fwa ou va padone.
- Padone ti fòt yo menm jan Bondye padone gwo fòt ou yo

PADON BAY LIBÈTE.

Lè ou padone yon moun, sa montre kijan w'ap grandi kòm yon ptit Bondye. Padon rann chak moun lib pou yo kapab swiv plan an Bondye genyen pou lavi yo. Padon rann ou kapab aji avèk madanm ou oubyen avèk lòt moun nan yon fason total. Lè ou padone ou pa kenbe anyen an resèv. Gen libète pou w' grandi epi pou w' viv.

JENÈZ 50.15-21 ; MAK 11.25-26 ; MATYE 6.14-15 ; MATYE 18.15-35

OKONTRÈ, SE POU NOU AJI BYEN YONN AK LÒT, SE POU NOU GEN BON KÈ YONN POU LÒT, POU NOU YONN PADONNEN LÒT, MENM JAN BONDYE TE PADONNEN NOU NAN KRIS LA. (EFEZYEN 4.32)

ANN GADE LAVI A

Anpil ane pase, te gen yon chèf Endyen ki te rete nan zòn lwès Ozetazini. Chè sa a te rele Maskepetoun. Tout tribi yo ki te rete nan zòn lan te rekonèt mesye kòm youn nan pi gwo, epi pi vanyan sòlda ki te janm genyen. Li te fè plizyè batay avèk lènmi tribi pa l' yo epi li te toujou genyen. Pandan Maskepetoun te kòmanse gramoun, li te vin pa enterese sou afè batay ankò. Li te plis enterese nan afè lapè olye pou l' kraze brize.

Yon jou, pandan li t'ap fè lachas, lènmi l' yo te antre nan kan an epi te touye papa mesye a, ansam avèk detwa lòt moun nan tribi a. Maskepetoun te tris anpil, men li pa t' kouri dèyè lènmi l' yo pou l' revandike. Apre detwa mwa, menm lènmi sa yo t'ap pase toupre kan Maskepetoun lan. Li te mande yo pou yo siyen yon kontra lapè ansam avè l' epi li te envite yo pou yo patisiye nan yon fèt lakay li. Pami lènmi sa yo, mesye ki te touye papa Maskepetoun lan te preznan. Tout moun te panse Maskepetoun tapral touye mesye a. Men, olye pou l' fè sa, Maskepetoun te bay mesye a pi bèl rad li te genyen an, youn nan pi bon chwal li yo, avèk pi bon plas nan fèt la. Mesye a te sezi anpil.


Miskepetoun te di lènmi l' konsa : « Apatide jodi a, ou pral pran plas moun ou te touye a. Se ou ki va papa m' ! » Miskepetoun te padone, epi li te blye sa k' te pase a. Nan langaj Endyen sa yo, mo padon an vle di : « Blye sa nèt. » Se sa Miskepetoun te fè. Kalite padon sa a te geri yon fòt ant de (2) moun epi menm ant de (2) kan ki te lènmi.

Padon vle di :

- Efase dosye yon moun
- Renmèt dosye a nan men Bondye

Si pou w' blye yon tò, fòk ou padone dabò.

Padon rann ou kapab viv avèk lòt moun pi alèz.



Etid Pou Mesye Marye : Grandi Nan Lavi Espirityèl Ou

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 12

E SI M' GENTAN FAYI DEJA ?

BI LESON AN : Pou aprann kijan li pa janm twò ta pou w' viv dwat.

Vèsè Kle :

- Ezayi 61.3** Bondye pa vle pou w' toujou viv avèk yon santiman dezespwa kote ou tou tris lè ou fayi. Li vle ba ou _____ nan plas lapenn.
- 1 Korent 15.9** Nan tan pase a, Pòl te fè kèk gwo erè. Dapre temwanyaj li, kisa li te fè apre sa ?

- Galat 1.23** Dapre pasaj sa a, kisa Apòt Pòl t'ap fè malgre tout erè yo li te fè nan tan pase a ?

- Ezekyèl 18.21-23** Senyè a di lè yon moun kite move jan li t'ap viv la epi kòmanse fè sa ki dwat, li va _____.
- 1 Jan 1.9** Lè yon moun konfese peche li devan Bondye, li kapab sèten Bondye va _____.

Devwa Pou W' Fè



Pou Kont Ou

Èske ou te santi ou pa t' vo anyen apre ou te li repons pitit ou yo nan lesон 4 ? Swiv lesон 3 pou w' etabli kèk bi ki va ede w' viv pi byen sou pwen sa yo.



Avèk Madanm Ou

Mande l' pou l' esplike kijan ou te ye lè ou te fenk marye. Mande li pou l' esplike w' poukisa li te renmen avè w'.

Avèk Pitit Ou

Timoun konn fayi tou—nan lekòl, nan jwèt, nan zanmitay, elatriye. Pale avèk timoun yo sou kijan yo santi dapre fay sa yo. Pale avèk yo sou sa ou gentan aprann akòz fay pa ou yo.

E SI M' GENTAN FAYI DEJA ?

Leson 12

Gen anpil papa ki santi sa tèlman fè yo mal lè yo reflechi sou tan pase a epi yo wè tout fòt yo te fè yo. Yo vin santi yo pa gen espwa paske yo santi li twò ta pou yo ranje koze sa yo.

Èske li konn twò ta vre ? Non ! Li pa janm twò ta depi ou dakò pou w' korije fòt ou te fè yo. Si gen yon fòt ou te fè ou pa ka ranje vre, pa rete ap panse sou li twòp. Okontré, panse sou fòt ou gentan ranje yo.

KISA YON FÒT YE MENM ?

Yon moun ki fè fòt kapab ranje, men yon moun ki pa gen espwa se yon moun ki :

- Blanmen lòt moun epi ki pa dakò admèt si yo fè fòt
- Bay legen epi tou deside li pa ka fè anyen pou ranje fòt li yo

REKÒMANSE MALGRE FÒT FAMILYAL OU GENTAN FÈ YO.

Si yon papa gentan fayi nan zafè familyal, fòk li dakò admèt sa dabò epi mande Bondye padon. Apre sa, avèk èd Bondye, li kapab al' pale avèk madanm li ak pitit li pou esplike yo kijan li te fayi. Li kapab mande yo eskiz epi eseye ranje fòt li yo. Lè sa a, kote l'ap konfese fòt li yo epi ap bat pou l' ranje yo, sa tou sèvi egzant pou pitit li yo. Konsa, yo ka pa fè menm erè a yo menm.

Yon papa dwe repare tout domaj fòt li yo te kreye. Souvan, peche yon papa repeste nan lavi pitit li yo tou. Yo ka pa parèt menm jan, men anpil fwa y'ap la kanmenm. Timoun toujou swiv egzant paran yo. Lè yon papa pale sou fòt li yo epi mande padon pou yo, sa rann fanmi li fè plis atansyon pou wè si peche sa a preznan nan lavi yo tou. Lè sa a yo kapab korije. Sa ede w' repare nenpòt domaj ki genyen akòz fòt ou yo. Apòt Pòl se yon bèl egzant sou kijan Bondye vle pou w' repare sa ou te detwi nan tan pase a. Pòl te fayi lè li te pèsekite Kretyen yo. Apre li te repanti, li te viv lavi li yon fason pou bati legliz la.

Nan ansèyman sa a, Jezi pa montre nou kilès ki te antò. Okontré, men sa Jezi vle di : « Si ou konnen gen yon pwoblèm ant ou menm ak yon frè ki rann nou pa byen, fòk ou al' pale avèk frè sa a. » Rezolisyon pwoblèm lan gen plis valè pase kilès ki antò. Petèt se ou menm ki antò. Petèt se frè ou ki antò. Petèt se nou toulede ki gen tò. Sa ki esansyèl se pou n' pale ansanm sou pwoblèm lan epi chache rezoud li. Se lè sa a Bondye ka jwenn glwa epi lòt Kretyen yo kapab ankouraje tou.

JEREMI 30.17A ; EZEKYÈL 18.31-32 ; SÒM 23.3 ; SÒM 51.10-13

**POU M' BAY MOUN KI NAN LAFLIKSYON YO KÈ KONTAN NAN PLAS LAPENN YO,
KONTANTMAN NAN PLAS KÈ SERE YO A. M'AP METE NAN BOUCH YO CHANTE
REMÈSIMAN NAN PLAS CHANTE PLENYEN. (EZAYI 61.3)**

ANN GADE LAVI A

Klawens te gen yon pitit fi kenzan ki te rele Kawòl. Yon jou yo te tonbe jour. Finalman, Klawens te di Kawòl pou l' bay kay la blanch. Li te fatige akòz li te toujou nan diskisyon avèk manmzèl. Kawòl te sòti vre, epi li te al' rete avèk mennaj li. Lè kòlè Klawens te fin pase, li te chagren pou sa ki te passe a. Li te pase detwa jou san manje ap priye. Pandan li t'ap priye Bondye, Bondye te montre li kèk tò li te fè pitit li. Klawens te al' jwenn Kawòl epi te konfese fòt li yo. Kawòl te padone li. Sa pa t' pran yon mwa anvan Kawòl te kite nèg la epi te repanti devan Bondye.

**Ou kapab
ranje yon fòt.**


Yon vrè fòt se lè ou :

- blame yon lòt
- bay legen

**Pou w' kapab
rekòmanse, fòk ou :**

- admèt kote ou te fayi
- mande padon
- fè koreksyon

**Apòt Pòl te ede legliz
Kretyen an malgre li te atake l' oparavan.**



Etid Pou Mesye Marye : Grandi Nan Lavi Espirityèl Ou

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 13

TRAKA GRANMOUN

BI LESON AN : Pou konprann poukisa gen anpil gason k'ap antre nan laj ki chaje avèk pwoblèm emosyonèl, espirityèl, ansanm ak pwoblèm moral.

Vèsè Kle :

- Sòm 77.5-10** Otè sòm sa a t'ap antre nan laj epi li te tris paske li te santi Bondye _____.
- Eklezyas 7.10** Pandan moun ap antre nan laj, gen anpil fwa yo anvi « tan lontan an ». Kisa otè liv Eklezyas la di sou sa ? _____
- 2 Samyèl 11.1-5** Èske ou panse sa te bon pou Wa David te rete lavil Jerizalèm pandan sòlda li yo te al' batay ? _____ Esplike repons ou te bay la _____.
- 1 Wa 19.14-16** Eli te santi li te dekouraje poutèt tan pase a ansanm avèk avni an. Ki nouvo bi Bondye te bay Eli ? _____
- Sòm 40.1-3** David te santi li te pi alèz apre li te pase nan kèk traka gramoun. Li te santi kòmsi li te _____.

Devwa Pou W' Fè



Pou Kont Ou

Mande yon doktè yon konsèy sou kijan ou kapab kenbe kò ou an sante. Sa va ede ou santi ou fyè menm lè ou kòmanse antre nan laj.



Avèk Madanm Ou

Bwè yon ti ji avè l' aswè a pandan w' pale avè l' sou leson sa a. Konsa, lè traka sa yo tonbe sou ou, l'ap konprann epi l'ap ka ede w'.

Avèk Pitit Ou

Pase tout yon jounen ansanm avèk yo. Sa pral ranfòse ou epi l'ap ede w' bati pi bon relasyon avèk fanmi ou.

TRAKA GRANMOUN

Lesson 13

Yon mesye k'ap antre nan laj kapab twouve yon pakèt pwoblèm. Se nan laj sa a anpil mesye kòmanse chache yon lòt kalite travay, yo twouve pwoblèm nan maryaj yo, yo kòmanse fache fasil, yo dekouraje, yo fristre, epi yo menm konn fè rebèl. Sa k' fè pwoblèm sa yo konn rive lè yon gason kòmanse antre nan laj ?

SA K' FÈ GENYEN TRAKA GRANMOUN.

Lè yon moun rive nan laj trannsenk (35) pou senkantsenk (55), se kòmsi li rive sou tèt yon mòn nan lavi li. Li kapab reflechi sou lavi li ak sou sa li gentan fè. Pandan l' reflechi konsa, li kòmanse poze tèt li kesyon tankou : « Èske se sa m' vle fè avèk lavi m' ? Èske m' santi m'ap viv ? Èske mwen vrèman atenn yon bagay nan lavi m' ? » Fason l' santi sou tan pase a kòmanse aji sou avni a. Se lè sa a anpil gason kòmanse bat pou yo reyisi nan avni an plis pase nan tan pase a. Yo kapab chache yon lòt travay pou yo fè lè sa. Fason l' reflechi sou tèt pa l' kapab lakòz li sibi anpil traka.

TRAKA TRAVAY.

Lè yon gason kòmanse antre nan laj, gen plizyè bagay ki kòmanse aji sou li anmenmtan. Li kòmanse santi kò l' manke anfòm. Lanmò sanble l' pi pre pase lè l' te jenn. Epi, gen moun k'ap di l' lavi a manke sans kou w' rive sou karantan. Tout sa vin aji sou fason l' gade tèt li. Li kòmanse santi li manke gason pase oparavan. Finalman, li kòmanse wè tan an kout. Tout sa li te anvi reyalize « yon jou » dwe fèt touswit, paske li pa lwen mouri.

E BONDYE MENM ?

Yon mesye ki kòmanse antre nan laj kapab bay Bondye tò pou pakèt traka yo li santi nan lavi li. Li kapab menm vire do bay Bondye. Men, se pa fòt Bondye. Lè w' vire do bay Li, se pi mal w'ap vin pi mal. Lè sa a, ou p'ap ka santi ou alèz menm. Okontrè, se nan epòk sa a w'ap bezwen Bondye plis pou w' an sekirite. Fòk ou gen espwa nan Bondye kòm yon lank k'ap kenbe w' djanm epi pou dirije w' nan desizyon yo w'ap pran pou pi devan. Lè yon mesye tonbe dakò ak kiyès li ye, lè sa l'ap ka antre nan laj avèk èd Bondye epi li ka mennen lavi li pi byen ki posib.

SÒM 55.4-8 ; SÒM 62.1-2 ; SÒM 94.17-19

M'AP CHONJE TAN LONTAN, WI, M'AP CHONJE LANNE PASE ANWO YO. (SÒM 77.5)

ANN GADE LAVI A

Wilyam se te yon bon pastè epi yon bon mari ki te kòmanse antre nan laj. Men, gen yon jou nan sezon prentan kote li te dekouraje anpil. Dekourajman sa a te rete nan lavi li pou rès ane a nèt. Li te konn chita je kale san l' pa t' wè anyen. Li te tou prèt pou l' kite tout reskonsabilite li te genyen yo. Li te konn anvi moute yon bato pou l' vwayaje nan yon peyi byen lwen kote pèsonn pa t' rekonèt li. Bondye te sanble tèlman lwen epi sanble Bondye te bliye l' nèt.

Wilyam te pataje santiman l' yo avèk madanm li ansanm avèk kèk zanmi konfidan. Yon jou swa, pandan li te kouche nan kabann li, li te santi li te ba nèt. Li te rete je kale ap panse sou kijan li tapral pati pou l' rekòmanse ankò. Se lè sa Bondye te pale avè l'. Li te di : « Wilyam, poukisa ou pa ka fè m' konfyans pou m' soutni w' nan pwoblèm sa a olye pou w' kouri sove ? » Wilyam te deside pou l' rete kanmenm epi li te tonbe dòmi alèz. Bondye te ede li nan jou ki te vini apre sa, epi li te kite traka granmoun yo dèyè pou l' mennen yon lavi plen kontantman avèk fwi.

Traka yon gason k'ap antre nan laj parèt kòm :

- pwoblèm familyal
- dekourajman
- pwoblèm travay
- rebelyon

Lè ou kòmanse antre nan laj, ou kapab sou tèt yon mòn kote ou kapab :

- reflechi sou tan pase a
- panse ak tan ki rete a

Traka yo parèt onivo :

- fizik
- sosyal
- panse
- tan

Pa vire do bay Bondye.



Etid Pou Mesye Marye : Relasyon Mari Avèk Madanm

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 14

PLAN BONDYE POU MARYAJ

Bi LESON AN : Pou konprann pi gwo bi yon maryaj.

Vèsè Kle :

- JENÈZ 2.18** Premye maryaj la te kreye yon fason pou gason an pa _____.
- Jenèz 1.27-28** Yon lòt bi ki gen nan maryaj se pou fè pitit. Premye kòmandman Bondye te bay Adan ak Ev se pou yo te _____.
- Jenèz 2.24** Maryaj egziste pou mare de (2) moun ansanm. Lè yon gason ak yon fi marye, yo _____.
- Mak 10.6-9** Bondye vle pou yon maryaj dire. Lòm pa dwe _____ sa Bondye mete ansanm.

Devwa Pou W' Fè



Pou Kont Ou

Drese yon lis twa (3) benefis ou jwenn atravè maryaj ou.



Avèk Madanm Ou

Mande madanm ou pou l' ekri de (2) bagay li santi ki kapab ede nou jwi yon pi bon relasyon ansanm. Planifye ansanm avè l' sou kijan ou kapab fè de (2) bagay sa yo.



Avèk Pitit Ou

Etabli yon « Sware Familyal » chak semenn kote nou travay oubyen jwe ansanm.

PLAN BONDYE POU MARYAJ

Lesson 14

Maryaj se yon plan Bondye te etabli pou gason an pa santi li tou sèl. Se yon lye kote de (2) moun kapab viv ansanm, travay ansanm, epi fè ptit ansanm. Anpil moun kapab reponn : « Bon. Mwen kapab jwenn tout sa san m' pa oblige marye. » Si se konsa, poukisa maryaj si enpòtan ?

MARYAJ SE YON RELASYON ESPESYAL.

Bondye te etabli l' ni pou plezi pa Li, ni pou plezi lèzòm. Pa gen yon relasyon lèzòm fè ki kapab bay kontantman menm jan ak yon maryaj. Yon maryaj selon plan Bondye a va ranpli bezwen fizik, santimantal, avèk bezwen yon gason genyen nan lespri li tou. Maryaj demonstre lemonn kijan Bondye renmen pèp Li (Efezyen 5.25). Bondye pwomèt nou lè nou rive nan syèl la nou va selebre yon « resepsyon maryaj » ansanm avè L'.

MARYAJ SE YON PWOMÈS ESPESYAL.

Lè Bondye te « marye » ansanm avèk pèp Jwif la, Li te fè yo pwomèsa : « Mwen p'ap janm lage nou, Mwen p'ap janm kite nou pou kont nou » (Detewonòm 31.6). Bondye vle pou yon maryaj ant yon gason ak yon fi baze sou yon pwomèsa konsa tou. Yon pwomèsa konsa va ede ou santi ou an sekirite kote w' pa bezwen pè pou avni an.

GEN YON SEREMONI ESPESYAL POU MARYAJ LA.

Se yon lè pou w' fè fanmi w' ak zanmi w' ou yo konnen ki angajman nou pran ansanm. Se yon lè ni fanmi ou, ni zanmi ou kapab beni maryaj la tou. Se yon lè kote ou resevwa dwa nan men leta pou w' etabli yon fanmi. Se yon lè pou w' jwi yon manje espesyal avèk fanmi ou epi avèk zanmi ou. Se yon lè gran kontantman. Yon maryaj ki kòmanse avèk yon seremoni konsa p'ap kraze fasil.

Maryaj espesyal paske li se yon :

- relasyon
- pwomèsa
- seremoni

M'AP KENBE PWOMÈS MWEN, W'AP POU MWEN NÈT. KONSA, W'A KONNEN KI MOUN MWEN MENM, SENYÈ A, MWEN YE. (OZE 2.20)


ANN GADE LAVI A

Jak avèk Beti te renmen youn lòt epi yo te anvi viv ansanm. Men, yo te santi sa pa t' vo pou yo te marye. Yo toulede te gen lòt zanmi ki te fè yon bon ti tan nan plasaj san yo pa t' marye. Konsa, yo te deside fè sa tou.

Nan kòmansman yo te renmen sa, men apre yon tan yo te kòmanse jwenn pwoblèm. Yo te vin gen yon ptit. Non kilès ptit la tapral pote ? Jak te kòmanse pase lòt fi vizit. Beti te fè jalouzi epi te kòmanse joure l'. Apre sa, Jak te kòmanse fache epi te kòmanse bat li. Yo te fè lide separe, men yo toude te anvi rete ansanm.

Yo te al' vizite yon konseyè kretyen. Li te montre yo de (2) rezon yo te gen pwoblèm konsa. 1) Yo pa t' pran yon angajman devan Bondye pou yo swiv Li. 2) Yo pa t' pran yon angajman maryaj youn ak lòt pou yo rete fidèl youn ak lòt kèlkeswa sa k' rive.

Jak ak Beti te tonbe dakò ak konsèy sa a. Lè yo te rive marye, pwoblèm yo pa t' fini yon sèl kou, men yo te kòmanse twouve fason pou yo rezoud pwoblèm yo kòm mari avèk madanm



Etid Pou Mesye Marye : Relasyon Mari Avèk Madanm

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 15

VALÈ YON FANM

BI LESON AN : Pou konprann kijan Bondye bay fanm anpil valè.

Vèsè Kle :

1. **Pwovèb 31.10** Bondye respekte fanm yo. Yon bon fanm vo _____ .
2. **1 Pyè 3.4** Dapre Bondye, yon fanm ki gen yon karaktè dou epi poze _____ .
3. **Pwovèb 12.4** Yon bon madanm se yon _____ pou mari li .
4. **Ebre 11.11** Ki fanm nou jwenn ki mansyone pami gwo zotobre lafwa yo ? _____

Devwa Pou W' Fè



Pou Kont Ou

Aji dousman epi byen janti avèk madanm ou. Ou dwe sousye pou santiman l' yo. Ekri yon bon bagay ou vle di l' denmen.



Avèk Madanm Ou

Mete yon tan disponib kote ou kapab chita pou kont ou avèk madanm ou pou w' fè yon bon ti koze avè l'.

Avèk Pitit Ou

Pale avèk pitit ou yo sou kèk bagay ou te wè nan manman an ki te fè ou te anvi marye avè l'.

Apres Bondye te kreye gason an, Li te wè kreyasyon an te toujou manke yon bagay. Adan te tou sèl. Lè sa, Bondye te kreye yon fanm ki te rele Ev. Li te kreye Ev pou l' te ka ede Adan. Akòz Adan se te yon gason, pandan Ev se te yon fi, te gen diferans nan kò yo. Men, se pa kò medam yo ase ki diferan. Diferans yo ale pi lwen toujou. Alò, ki distenksyon yon fi genyen menm ?

EMOSYON L' AK SANTIMAN L' YO FÒ ANPIL.

Pi souvan, bezwen li santi li gen nan emosyon l' yo pi fò pase dezi seksyèl li yo. Yon fanm anvi jwenn sekirite ak bon relasyon avèk lòt moun k'ap dire. Lè yon fi vrèman santi renmen, se lè gen konfyans avèk zanmitay youn ak lòt ant li menm avèk mari li. Anpil fwa, li kapab santi perèz avèk enkyetid.

BEZWEN KOZE.

Yon gwo bezwen yon fi genyen se pou l' byen koze. Li toujou renmen pataje tout sa k'ap pase nan lavi li, ansanm avèk sa ki nan tèt li, avèk yon moun li renmen. Li toujou renmen sa lè moun lan pale avè l' tou.

REPONN LÈ W' MANYEN L' AVÈK BON JAN SANTIMAN.

Yon fanm abitye reponn vit lè yon moun manyen l'. Yon gason pi fokis sou sa li wè. Nan yon maryaj, madanm lan renmen sa lè mari a montre jan li renmen l' nan fason li manyen l' pandan jounen an. Li renmen lè ou bay l' akolad, epi lè ou fè ti bo pou li pandan jounen an.

SANTIMAN YON MANMAN.

Pifò fi anvi fè pitit. Yo santi yo alèz epi ap viv lè yo fè pitit. Anpil fi ki pa ka fè pitit toujou santi yo fristre.

YON VI KI BAZE SOU LAKAY.

Yon fanm ki marye epi ki pa gen lòt travay deyò lakay la pase pifò tan l' lakay. Li vin santi li renmen lakay epi li sousye pou fason l' parèt nan tout ti detay. Fason kay la parèt, ak tout sa k' fèt nan kay la, gen anpil enpòtans devan l'.

SA PA FASIL POU MOUN JWENN YON BON MADANM. LÈ LI JWENN LI, LI GEN PLIS VALÈ PASE YON BOUL LÒ. (PWOVÈB 31.10)

ANN GADE LAVI A

Yon jou Dimanch apres legliz, Patrik t'ap pale avèk frè yo sou travay legliz la. Madanm li te vin kanpe bò kote l' pou yon ti tan, men Patrik pa t' di l' anyen menm. Yon ti kadè, madanm lan te al' fè wout li. Lè mesye yo te fin pale, Patrik te al' chache madanm li. Li te jwenn li chita pou kont li ak dlo nan je l'.

Patrik te mande li : « Sa w' genyen ? »

Madanm li te reponn : « Mwen pa konnen. Pandan ou t'ap pale avèk mesye yo, mwen te santi plas mwen pa t' la. Mwen konnen ou gen bagay enpòtan pou w' regle. Mwen pa vle pou w' sispann pale avèk yo pou w' ka pale avè m', men menmsi se yon ti souri ou te fè avè m', oubyen te sèlman salye m' epi te kenbe men m', lè sa a mwen t'ap santi m' alèz. Mwen t'ap konnen ou panse avè m' . »

Patrik te di : « Mwen konprann. M'ap bat pou m' sonje sa pi devan. »

Kreyasyon an te manke konplè san fi a.


Medam yo anvi sekirite avèk relasyon k'ap dire.

Medam yo renmen fè bèl koze pwofon.

Medam yo renmen lè ou manyen yo dousman.

Pifò medam anvi fè pitit.

Medam yo vle pou kay yo parèt bèl epi konfòtab.



Etid Pou Mesye Marye : Relasyon Mari Avèk Madanm

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 16

KITE MANMAN AVÈK PAPA NOU

BI LESON AN : Pou konprann kisa sa vle di pou yon gason kite manman l' ak papa l' lè l' marye.

Vèsè Kle :

- JENÈZ 2.24** Lè yon gason marye, se kite li kite _____.
- Mak 10.7-8** Jezi te di yon gason dwe _____ pou l' viv avèk madanm li.
- Efezyen 5.31** Lè yon gason marye, fòk li kite papa l' avèk manman l' epi _____.
- Detewonòm 24.5** Lwa pèp Izrayèl yo te egzije yon gason ki fenk marye pou l' mete premye ane a apa epi dedye tan sa a pou _____.
- Jenèz 24.67** Lè Izarak te marye, li te jwenn _____ Sara a pou l' rete ladan l' ansanm avèk Rebeka.

Devwa Pou W' Fè



Pou Kont Ou

Petèt ou santi ou gen pwoblèm poutèt kèk bagay ki te rive w' pandan ou te timoun kay paran w'. Petèt bagay sa yo rann ou pa vrèman « kite lakay paran w' ». Bat pou w' regle pwoblèm sa yo.



Avèk Madanm Ou

Pale avè l' sou sijè sa a. Èske nou toulede gentan kite paran nou vrèmanvre ? Si non, bati yon plan sou kijan nou kapab fè sa.

Avèk Pitit Ou

Voye timoun yo nan yon kan biblik pou yon semenn. Pale avèk yo anvan yo ale, epi pale avèk yo lè yo retounen. Mande yo kijan yo santi lè yo pa lakay pou yon ti tan konsa.

KITE MANMAN AVÈK PAPA NOU

Lesson 16

« SE POUTÈT SA, GASON AN VA KITE PAPA L' AK MANMAN L' POU L' METE TÈT LI ANSANM AK MADANM LI, POU TOUT DE FÈ YON SÈL. » JENÈZ 2.24

Bondye te pale konsa sou afè maryaj depi nan kòmansman. Pawòl sa yo te tèlman enpòtan nou jwenn yo twa (3) fwa ankò nan Bib la : **MATYE 19.5 ; MAK 10.7-8 ; EFEZYEN 5.31**

Se si, menm jan li enpòtan pou yon gason kite avèk paran l', se konsa sa enpòtan pou fi a fè sa tou. « Kite » vle di de (2) bagay pou yon koup :

KITE FIZIKMAN Lè yon moun kite lakay li fizikman, sa vle di moun sa a etabli pwòp fwaye pa l' ki pa atache avèk fwaye paran nou. Petèt w'ap ale lwen kay paran ou, petèt l'ap nan menm zòn lan, men kanmenm, fòk gen yon separasyon. Sa toujou bon yon koup genyen pwòp kay pa yo.

Lè ou kite fizikman, sa vle di gen yon separasyon nan afè finans tou. Mari a vin reskonsab tout afè madanm li. Yon novo koup pa dwe depan sou paran yo, ni pou lajan, ni pou bezwen yo genyen yo. Gen pafwa, menmsi se pa espre yo fè, gen paran ki itilize lajan avèk kado pou kontwole maryaj pitit yo. Sa vin pote pwoblèm nan maryaj la. Lè yon koup kite manman avèk papa yo, sa vin ranfòse mari a kòm vrè lidè fwaye pa l' la.

KITE EMOSYONÈLMAN Lè yon koup kite paran yo emosyonèlman, sa vle di yo toulede dakò nan sans yo te kite kay paran yo. Yo dwe kite kay paran yo avèk otorizasyon paran yo ansanm avèk benediksyon paran yo tou. Fòk yo te regle tout move santiman ki te genyen ant yo menm avèk paran yo. Apre sa, fòk yo dakò relasyon maryaj la pi enpòtan pase relasyon yo genyen avèk fanmi yo.

Kite paran nou pa vle di nou blyie yo nèt. Yon koup toujou dwe byen avèk fanmi yo epi toujou mande yo konsèy. Yo kapab ede paran yo, men fòk yo rekonèt yo te kòmanse yon lòt lavi ansanm nan fwaye pa yo. Sa va ede yon maryaj rete djanm. Sa va ede etabli yon relasyon kote paran yo kapab bay konsèy san yo pa ka dirige lavi pitit yo. Sa etabli mari a kòm sèl lidè ki reskonsab pou konble bezwen fanmi li.

SE POUTÈT SA, GASON AN VA KITE PAPA L' AK MANMAN L' POU L' METE TÈT LI ANSANM AK MADANM LI, POU TOUT DE FÈ YON SÈL. (JENÈZ 2.24)

ANN GADE LAVI A

Alfrèd te gentan genyen sèt (7) ane maryaj avèk Mari. Lè yo te apenn marye yo te rete lakay manman avèk papa Mari. Men toudenyèman te tèlman gen yon pakèt diskisyon ant Alfrèd avèk madanm li yo te anvi kite.

Yo te al' pale avèk yon pastè epi te esplike l' ki pwoblèm yo te genyen. Pastè a te sjere pwoblèm sa yo te rive akòz yo te rete lakay paran toujou. Paran Mari yo te toujou anvi ede yo, men anpil fwa sa te bay pwoblèm lè Alfrèd te eseye dirige fwaye pa l'. Li te di li t'ap pi bon pou Alfrèd al' rete yon lòt kote avèk madanm li.

Touswit apre sa, Alfrèd te bwote nan yon lòt zòn avèk fanmi li. Menm jan pastè a te di, bagay yo te kòmanse mache pi byen nan fwaye Alfrèd la lè yo te etabli pwòp fwaye pa yo.

**Pandan kat (4)
fwa Bib la di
konsa : << Yon
gason dwe kite
papa l' avèk
manman l'. >>**

Kite fizikman :


- **yon lòt kay**
- **pwòp mwayen pa l'**

Kite emosyonèlman :

- **jwenn otorizasyon paran pou maryaj la**
- **bay relasyon maryaj la premye plas**

Yon koup dwe :

- **byen avèk paran yo**
- **mande paran yo konsèy**



Etid Pou Mesye Marye : Relasyon Mari Avèk Madanm

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 17

INI POU LAVI

BI LESON AN : Pou konprann kijan de (2) moun fè yon sèl pou tout lavi yo nan yon maryaj.

Vèsè Kle :

- MATYE 19.5-6** Lè yon gason ak yon fi ini ansanm, yo fè _____.
- Mak 10.7-9** Maryaj se pou lavi. Sa Bondye _____ lèzòm pa dwe _____.
- Pwovèb 5.18, 20** Vèsè sa yo di w' pou w' kontan avèk _____
epi pa _____.
- Malachi 2.15-16** Bondye rayi _____.

Devwa Pou W' Fè



Pou Kont Ou

Priye Bondye epi renouvre kontra a ou genyen
avèk madanm ou.



Avèk Madanm Ou

Fè kòmann liv la ki rele : « Maryaj Kretyen An ».
Se LIFE Literati ki pibliye liv sa a. Li l' ansanm
epi diskite sou li anssam.

Avèk Pitit Ou

Mande pitit ou yo pou yo ede w' planifye
yon sware espesyal pou ou avèk madanm
ou. Fè yo konnen kijan sa te pase.

Pandan twa (3) fwa Bib la fè konnen gason an va « fè yon sèl avèk madanm li ». Kisa sa vle di ?

Pou fè yon mèb, chapant la kole plizyè planch ansanm avèk yon kòl. Li mete kòl la sou toude pyès yo epi li mare pyès sa yo ansanm byen di. Lè kòl la fin chèch, ou p'ap ka separe yo san ou pa domaje planch yo.

Se konsa Bondye vle pou yon maryaj mache. Se pou yon mari tèlman kole avèk madanm li, anyen pa ka separe yo. Fason pou nou genyen yon maryaj konsa rete nan yon sèl mo. Mo sa a se—angajman.

ANGAJMAN VLE DI :

- Yon bon jan pwomès ki fèt devan Bondye avèk plizyè temwen
- Priye chak jou pou madanm ou
- Yon kontra avèk je ou pou w' pa gade yon lòt fanm avèk yon dezi
- Swa yon kado, yon akolad, oubyen « Mwen renmen ou » chak jou
- Jwenn tan pou ri epi jwe ansanm
- Pase plis tan ansanm lè gen maladi oubyen soufrans nan fanmi an
- Bon jan koze lè l' ta, menmsi ou ta anvi dòmi pito
- Pou pi pitit, yon apèl chak jou lè ou oblige sòti

ANGAJMAN PA VLE DI :

- Se eseye n'ap eseye viv ansanm epi nou ka separe si sa pa ta mache
- Nou kapab divòse si nou anvi chape anba pwoblèm ki genyen nan maryaj nou
- Bay travay, espò, pitit, oubyen lòt fi plis priyorite pase madanm ou
- Nou toulede dakò nou kapab koze avèk yon lòt moun pafwa
- Yon relasyon dimwatye kote nou chak pa fè plis pase sa pou n' tonbe dakò

Yon mari avèk yon madanm ki vrèman angaje yo youn ak lòt, va ini pou lavi nan kò yo, nan lide yo, nan kè yo, ak nan lespri yo tou.

JENÈZ 2.24 ; JÒB 31.1 ; JENÈZ 26.8-9 ; WOMEN 7.2-3

...SE POUTÈT SA, GASON AN VA KITE PAPA L' AK MANMAN L' POU L' METE TÈT LI ANSANM AK MADANM LI. YO TOUDE VA FÈ YON SÈL KÒ. (MATYE 19.5)

ANN GADE LAVI A

Lè Djonni te marye, youn nan pi gwo bi li te genyen se te pou l' genyen pwòp fwaye pa l'. Papa l' te bay l' dwa pou l' rete nan yon ti joupa ki pa t' twò lwen avèk lakou paran l'. Djonni te travay anpil pou l' ranje ti joupa a epi li te fè yon bèle ti kay pou li menm avèk madanm li.

Djonni ak madanm li te vle rete kole ansanm yon fason pou yo pa kite anyen separe yo. Apre detwa ane, Djonni te jwenn mwayen pou l' fè yon lòt kay. Kay sa a te bay madanm li avèk pitit li yon bèle kote konfòtab.


Yo te genyen yon fanmi ki te kontan ansanm. Yo te travay ansanm, ri ansanm, priye ansanm, epi te pataje ansanm. Maryaj yo a byen djanm paske li baze sou yon angajman.

**Se angajman ki
fè yon maryaj
kapab dire.**

**Angajman...
anpil tan avèk
swen « nan bon tan
ak nan move tan » .**

**Angajman se pa...
kite pòt la ouvri yon
fason pou w' kapab
chape poul ou devan
maryaj la.**

**Èske desizyon ou yo
avèk aksyon ou yo
mare nou ansanm,
oubyen èske yo
divize nou ?**



Etid Pou Mesye Marye : Relasyon Mari Avèk Madanm

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 18

INYON SEKSYÈL

B1 LESON AN : Pou konprann kijan li bon pou fè bagay lè ou marye.

Vèsè Kle :

- JENÈZ 1.27-28** Bondye te kreye ni _____ ni _____ epi Li te di yo pou yo fè pitit.
- Pwovèb 5.18-19** Bondye te òdone relasyon seksyèl pou fè lòm plezi. Yon mari dwe rete bò kote madanm li epi li dwe ranpli avèk _____ poutèt lamou li.
- 1 Korent 7.2-5** Akòz tantasyon an vrèman fò pou yon moun tonbe nan imoralite, li vrèman enpòtan pou yon mari avèk yon madanm sèvi avèk kò yo pou yo _____ youn lòt.
- Kantik 2.6** Yon madanm anvi pou mari a rete bò kote li epi aji avè l' avèk tandrè. Li vle pou mari a _____ avèk men dwat li.
- Ebre 13.4** Bondye pini peche imoralite yo avèk enfidelite, men Li respekte _____ .

Devwa Pou W' Fè




Pou Kont Ou

Li liv Kantik de Kantik la nèt. Chache tout fason yo mesye a te itilize pou fè kè madanm li kon-tan onivo seksyèl.



Avèk Madanm Ou

Mande li sa ki fè li plis plezi nan relasyon ou ansanm avè l'. Byen petèt se pa sèks menm ! Men kanmenm, si w' kapab satisfè bezwen l' yo, lè sa a w'ap twouve relasyon seksyèl nou an va pi bèl tou.



Avèk Pitit Ou

Bay madanm ou akolad epi fè ti bo pou li devan timoun yo. Sa va ede yo genyen bon santiman konsènan relasyon seksyèl andedan relasyon maryaj la.

Petèt ou konnen kijan sa ye pou w' ini avèk madanm ou nan kò nou men pou toujou rete byen lwen nan lespri nou avèk santiman nou yo. Kò a jwenn yon ti plezi ki dire pou yon ti tan, men apre sa, chagren an tounen epi ou santi ou tou sèl.

Se pa konsa Bondye vle pou yon maryaj mache. Li vle pou inyon sa dire epi pou l' satisfè nou. Li kapab konsa depi nou konprann...

INYON SE YON BAGAY TOTAL. Se pa kò nou sèlman ki pou ini ansanm, men fòk nou ini nan lespri nou avèk nan nanm nou tou. Nou ini lespri nou yo anssam lè nou li Bib la, priye, epi chante anssam. Lè nou pale anssam sou bagay espirityèl, sa ede nou konprann youn lòt pi byen. Nanm nou yo ini anssam pandan nou travay, jwe, ri, epi kriye anssam, epi pandan nou pale anssam sou sa nou renmen ak sa nou pa renmen, sou bi nou avèk rèv nou yo tou. Lè nou santi nou kole anssam nan lespri nou ak nan nanm nou, lè sa a w'ap santi ou ini plis nan relasyon seksyèl nou tou.

BEZWEH SEKSYÈL NOU YO PA MENM. Yon fanm pa fasil santi chalè lè l' gade kò yon moun menm jan avèk yon gason. Fi a plis reponn devan jantiyès, tandrè, avèk bon jan komunikasyon. Li reponn lè mari a pale avè l', bay l' ti kado, epi rete kole anssam avè l'. Yo renmen konn sa ki nan panse mari a. Pou yo rive cho, sa kapab pran plizyè èdtan, oubyen menm tout jounen an nèt. Yon mari ki konprann sa kapab kòmanse chofe madanm lan depi byen bonè pou lè yo pral kouche anssam lannwit.

SA EDE LÈ OU BYEN KONPRANN. Èske ou konprann kijan kò ou fonksyonne ? Èske ou konnen kijan santiman seksyèl madanm ou yo pral chanje pandan l'ap pase nan règ li ? Èske li pè pou l' pa ansent ? Èske ou konn kijan pou w' retire perèz sa yo ? Èske ou konprann kijan maladi, ansent, epi gwosè fi a, oubyen kèk chanjman nan lavi pral afekte l' nan dezi seksyèl li ? Ou kapab aprann sou bagay sa yo atravè kèk ti bwochi ou kapab jwenn kay doktè. Ou kapab aprann sou bagay sa yo tou lè ou byen kontwole madanm ou, lè ou koute l', epi lè ou sonje sa ou wè ak sa nou tande.

KANTIK 1-8 ; JENÈZ 26.8 ; 2 SAMYÈL 12.24

Men sa ki fè pati vrè inyon seksyèl :

- lespri
- nanm
- kò

Yon mari ki konprann madanm li kapab ede l' avèk dezi seksyèl li.

Yon fi santi chalè lè genyen :

- pawòl dou
- swen ki tann
- tan nou passe anssam

BONDYE KREYE MOUN...LI KREYE YO GASON AK FI...LI DI : « FÈ PITIT, FÈ ANPIL ANPIL PITIT METE SOU TÈ A. » (JENÈZ 1.27-28)

ANN GADE LAVI A

Istwa Izarak avèk Rebeka nan Jenèz chapit 24 ak 25 se yon vrè istwa lamou. Abraram, ki se te papa Izarak, te voye sèvitè li te pi konfyé a tounen nan peyi li pou l' al' chache yon madanm pou Izarak. Sèvitè a te jwenn yon bèl jennfi ki te rele Rebeka, epi li te mennen l' ale nan peyi kote Abraram avèk Izarak t'ap viv.

Premye fwa je Izarak te tonbe sou Rebeka se te nan jou maryaj la. Malgre se Abraram ki te chwazi madanm Izarak, Izarak te dakò pou l' pran Rebeka kòm madanm li epi li te renmen l' anpil.

Malgre yo te jwi nan relasyon seksyèl yo a anssam, Rebeka pa't fè pitit. Akòz Izarak te renmen Rebeka, li pa t' voye l' jete pou l' al' pran yon lòt madanm—malgre se konsa koutim peyi a te ye alepòk. Okontrè, Izarak te priye Bondye pou Rebeka te ka ansent. Bondye te tande priyè Izarak epi anvan lontan li te vin fè de (2) ti jimo—se te Jakòb avèk Ezaou.



Etid Pou Mesye Marye : Relasyon Mari Avèk Madanm

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 19

KOMINIKASYON

BI LESON AN : Pou wè kijan bon jan komunikasyon obligatwa pou yon bon maryaj ak yon bon vi familyal.

Vèsè Kle :

- Sòm 78.4** Bondye vle pou pèp Li a pale avèk pitit yo. Li vle pou yo _____ Senyè a devan yo epi fè yo konnen _____.
- Pwovèb 16.24** Bon pawòl bon pou _____ epi yo _____ pou nanm ou.
- Pwovèb 10.31-32** Bon pawòl sòti nan yon bon kè. Yon moun k'ap _____ konn _____.
- Malachi 3.16** Senyè a va _____ moun ki gen krentif pou Li epi k'ap _____ ansanm youn ak lòt (gade yon Bib Fransè si sa pa fin klè).
- 1 Korent 13.1** Yon bann pawòl sanble ak _____ si ou pa gen _____ lè w'ap pale.

Devwa Pou W' Fè



Pou Kont Ou

Itilize yon telefòn pou anrejistre fason w' pale avèk madanm ou ansanm ak pitit ou. Koute sa ou te anrejistre a. Kijan vwa ou ye ? Èske ou te kontan, fache, oubyen dekoraje ? Eseye pran swen fason ou pral pale avèk fanmi ou apre sa.



Avèk Pitit Ou

Konbyen tan sa genyen depi ou te kenbe madanm ou pandan ou t'ap pale avè l' ? Eseye fè sa aswè a.



Avèk Madanm Ou

Konbyen tan sa genyen depi ou te kenbe madanm ou pandan ou t'ap pale avè l' ? Eseye fè sa aswè a.

Bon jan komunikasyon bati maryaj ki byen solid. Yon mank komunikasyon kreye pwoblèm nan yon maryaj. Yon koup ki pa kominike ansanm rete kòm de (2) etranje nan yon sèl kay.

Anpil koup ki genyen pwoblèm nan maryaj yo pa vle l' konsa vre. Yo anvi viv byen youn ak lòt. Sepandan, lè pwoblèm antre, koup sa yo pa konn kisa pou yo fè paske yo pa fin konnen kòz pwoblèm lan. Anpil nan pwoblèm sa yo sòti nan yon mank komunikasyon.

Bon jan komunikasyon vle di plis pase pale ansanm. Komunikasyon vle di koute epi konprann tou. Si ou pale epi lòt moun lan pa konprann, sa vle di nou pa t' vrèman kominike. Si lòt moun lan pale epi ou pa koute, pa gen komunikasyon la

GENYEN DE (2) KALITE KOMINIKASYON :

Awotvwa : Sa fèt atravè pawòl. Gen kat (4) nivo komunikasyon nan kalite komunikasyon sa a. Tout nivo sa yo enpòtan nan yon fason oubyen yon lòt.

Premye nivo : Kòmansman. Men kèk egzanp : « Kijan ou ye ? » « Mwen trè byen. »
« Kijan lapèch la te ye jodi a ? » « Ase byen. »

Dezyèm nivo : Pataje donnen yo. Pa egzanp : « Sanble ou te kenbe kèk pwason. »
« Non. Se frè m' ki te kenbe sa yo. Kote m' te ye a mwen pa t' kenbe anyen menm. »

Twazyèm nivo : Lide ak refleksyon pèsonèl. Pa egzanp : « Èske li pral fè lapli jodi a ? »
« Mwen kwè sa. Van an ap vante sòti nan lès la. » « Wi, granpapa m' te toujou anvi fè lapèch lè yon van lès t'ap vante. »

Katriyèm nivo : Pataje santiman ou—pa sèlman montre santiman ou dapre aksyon ou (se sa ki rele komunikasyon san pale). Lè ou pataje santiman ou se lè ou di kijan epi poukisa ou genyen tèl santiman. Egzanp : « Ou te fache akòz mwen pa t' kenbe yon gress pwason—pa vre ? » « Wi. Men sa ki te fè m' fache plis se paske mwen te panse yon malè te rive ou. »

SAN PALE : Kalite komunikasyon sa a se sa ou di avèk je ou, men ou, wotè vwa ou, kò ou, epi espresyon ki sou figi ou. Ou kapab menm kominike nan sans sa lè ou rete sou silans. Kalite komunikasyon sa a montre sa ki nan kè yon moun pi byen pase sa ou di. Lè sa ou pa di a tonbe dakò avèk sa ou di, lè sa a moun yo va konprann epi kwè sa ou di.

Nan toude kalite komunikasyon sa yo, li enpòtan pou w' koute menm jan li enpòtan pou w' pale. Tèlman li enpòtan pou w' koute, va gen tout yon leson ki baze sou sa (Leson 50)

PWOVÈB 15.23–24 ; JAK 1.19 ; PWOVÈB 12.14 ; PWOVÈB 25.8–14

BON PAWÒL SE SIWO MYÈL. YO BON POU SANTE OU, YO DOUS POU NANM OU. (PWOVÈB 16.24)

ANN GADE LAVI A

Jak te nan yon reyinyon ansanm avèk madanm li yon jou swa. Pandan yo t'ap pale avèk zanmi yo apre reyinyon an, Jak te fè yon lòt fi konpliman pou bèl rad li te mete a.

Madanm Jak te apenn achte yon nouvo wòb men Jak pa t' di l' anyen sou sa. Madanm lan te santi sa te frape l'. Li te panse se renmen Jak pa t' renmen abiman l' yo. Pandan yo t'ap tounen lakay, madanm lan pa t' di anyen menm. Jak te fouye pou l' konnen ki pwoblèm li epi finalman madanm lan te devwale santiman l' yo. Jak te vin konprann kòman sa te ofanse madanm lan akòz li pa t' konn fè l' konpliman sou abiman l'. Avèk dlo nan je, Jak te mande madanm li eskiz pou fayit sa a. Madanm lan te santi sa te sòti nan kè Jak epi li te espere bagay yo tapral mache pi byen apre sa.

**Kominikasyon
bati maryaj ki
solid.**


Kominikasyon sòti nan :

- **fason nou kenbe kò nou**
- **koute**
- **konprann**

Kat (4) nivo komunikasyon :

- **ti dyalòg**
- **pataje donnen yo**
- **lide ak refleksyon pèsonèl**
- **pataje santiman**

Sa ki pi enpòtan pou genyen bon jan komunikasyon se renmen nan kè.



Etid Pou Mesye Marye : Relasyon Mari Avèk Madanm

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 20

YON FANM KI OKIPE KAY LI BYEN

BI LESON AN : Pou montre mari yo kijan yo kapab ede madanm yo reyisi nan tach yo lakay.

Vèsè Kle :

1. **EFEZYEN 5.25-26** Yon mari dwe renmen madanm li menm jan Kris te renmen legliz la. Li te _____ legliz la epi Li te mete l' apa pou tèt pa Li.
2. **1 Pyè 3.3-4** Yon mari kapab bay madanm li valè lè li peze plis sou _____ olye pou l' gade sou bèlete fizik li.
3. **1 Timote 2.9-10** Lòt moun yo dwe rekonèt yon fi kretyen ki fidèl pou fason li _____ .
4. **Pwovèb 31.27-28** Lè yon fanm okipe bezwen fanmi li, lè sa a pitit li avèk mari li va _____ li.

Devwa Pou W' Fè




Pou Kont Ou

Ekri yon bagay madanm ou konn fè ou vrèman renmen (pa egzanz : fè manje, koud, oubyen chante). Apre sa, ekri twa (3) bagay ou kapab fè nan mwa sa a pou ede l' fè sa pi byen toujou.



Avèk Pitit Ou

Ankouraje timoun yo pou yo montre manman yo apresyasyon. Pa egzanz, ou kapab montre yo kijan pou yo di manman an « Mèsi » chak fwa yo fin manje yon manje manman an te kwit pou yo.



Avèk Madanm Ou

Mande madanm ou kijan orè li ap mache. Fè l' konnen w'ap disponib pou pale sou sa tou. Si l' bezwen yon ti tan pou l' rive atenn yon bagay li vrèman anvi fè, fè l konnen w'ap dakò pou w' voye je sou timoun yo pandan l' al' fè sa.

YON FANM KI OKIPE KAY LI BYEN

Leson 20

Gen yon vèsè nan Pwovèb ki di yon nonm ki jwenn yon madanm tou jwenn yon bon bagay (Pwovèb 18.22). Yon bon madanm se yon benediksyon Bondye bay. Gen anpil bagay yon mari kapab fè pou ede madanm li devni yon fi ki konn okipe kay li byen.

RENMEN (Efezyen 5.25) Yon mari ki renmen madanm li va eseye ede l' reyalize tout sa k' posib epi li va ede l' jwi nan wòl li kòm yon madanm ak yon manman.

LWANJ (Pwovèb 31.28-29) Yon mari ki saj va apresye tout bon bagay yo madanm li fè epi l'ap di l' sa tou. Lwanj konsa va ede l' fè plis toujou. Yon mari konsa va aprann timoun yo pou yo fè lwanj manman yo tou.

KONFYANS (Pwovèb 31.11) Konfyans yon mari va rann madanm lan lib pou l' kreye epi pou l' devlope abilite li.

KOMINIKASYON (Pwovèb 31.10-31) Yon mari ki saj va sousye pou ki kote madanm lan ye ak sou sa l'ap fè pandan jounen an. Mari a va fè madanm lan konnen ki kote l' ye, ak kisa l'ap fè tou. Yo abitye pale souvan sou sa y'ap fè, epi yo planifye ansanm sou sa tou. Mari a dwe ankouraje madanm lan nan sa l'ap fè. Konsa, l'ap cho nan aktivite li paske li konnen mari li dakò ak sa l'ap fè.

YON VI KI SANTRÉ SOU LAKAY (Pwovèb 31.10-22) Yon madanm k'ap reyisi se yon madanm ki santré sou lakay. Se vre, li konn al' nan mache. Se vre, li konn ede lòt moun nan kominote a. Malgre tout sa, se fwaye a, ak fanmi an li renmen pi plis. Bon zèv li konn fè yo sòti nan yon vi ki santré sou lakay. Pou l' kapab ankouraje madanm li fè sa, mari a dwe sansib pou lakay tou.

**Yon bon mari
ede madanm li
pou l' rive
satisfè ak sa l'
fè a.**

**Kèk kle pou twouve
satisfaksyon :**

- **lwanj**
- **konfyans**
- **kominikasyon**
- **renmen**


YON FANM KI GEN KONPRANN, SE SENYÈ A ASE KI KA FÈ OU JWENN SA. (PWOVÈB 19.14)

ANN GADE LAVI A

Janèt te santi lavi a pa t' gen sans. Se kòmsi sèl sa li te fè se fè mennaj, fè manje bay timoun yo, lave vesò, epi lave rad. Janèt te al' mande mari li pou yon ti èd.

Mari li te konsyan li pa t' byen aji avèk madanm li. Li te kòmanse amelyore sityasyon an. Li te fè anpil efò pou l' toujou renmèsyé Janèt chak fwa li te fè manje. Li te kòmanse anseye timoun yo pou yo fè menm jan tou. Li te pase tan chak semenn pou l' ede Janèt bati yon orè pou semenn lan. Epi, li te menm mete yon sware apa chak semenn pou l' pran swen timoun yo pandan Janèt te mache nan yon kou pou l' aprann koud—kòm Janèt te anvi fè sa depi byen lontan.

Avèk ankourajman sa a, Janèt te kòmanse fè kèk ti bagay tou. Li te aranje avèk yon vwazen pou yo chak pran yon jou chak semenn pou okipe timoun youn lòt. Konsa, Janèt te jwenn tan pou l' rann kèk sèvis nan kominotè a. Konsa tou, li te twouve sa pi fasil pou l' voye je sou timoun yo epi pou l' pran swen kay la akòz li te genyen kèk bi nan lavi li. Konsa, tout fanmi an te pi kontan.



Etid Pou Mesye Marye : Relasyon Mari Avèk Madanm

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 21

MARI A—YON NÈG DAMOU

Bi LESON AN : Pou dekòtike vrè renmen ak kijan yon mari dwe renmen madanm li.

Vèsè Kle :

1. **Efezyen 5.28-29** Yon mari dwe renmen madanm li menm jan li renmen _____.
2. **Efezyen 5.25** Yon mari ki renmen madanm li tankou Kris renmen legliz la va _____.
3. **Kolosyen 3.19** Renmen yon mari pou madanm li pa gen _____ ladan l'.
4. **1 Korent 13.4-8** Vèsè sa yo dekòtike vrè renmen. Drese yon lis sou sa renmen ye, epi drese yon lis sou sa li pa ye :

Devwa Pou W' Fè



Pou Kont Ou

Li vèsè yo nan 1 Korent 13.4-8 ankò. Mete non pa ou nan chak plas kote li pale sou « renmen ». Èske se konsa ou ye vre ?



Avèk Madanm Ou

Bat pou w' devlope yon abitid kote ou di l' « Mwen renmen ou ! » omwen yon fwa chak jou.

Avèk Pitit Ou

Anseye yo pou yo fè manman yo konnen souvan kijan yo renmen li.

MARI A—YON NÈG DAMOU

Leson 21

Pandan kat (4) fwa nan Bib la, Bondye pase mari yo lòd pou yo renmen madanm yo. Bondye p'ap pale sou kalite renmen lemonn lan genyen. Moun lemonn yo fò anpil nan afè renmen seksyèl. Yo konnen afè renmen familyal ak renmen ant zanmi tou—sa se yon lòt kalite renmen. Men renmen Bondye ap pale a se yon renmen ki pwofon—yon renmen espirityèl.

Bondye dekri kalite renmen sa nan 1 Korent 13.4–8. Yon nonm ki gen kalite renmen sa va gen pasyans, l'ap gen bon kè, li p'ap fè moun wont, epi l'ap renmen verite a. Li p'ap fè jalouzi, li p'ap ògèye, epi li p'ap ofanse fasil. Yon mari ki gen kalite renmen sa a kapab sèvi madanm li avèk tout sa l' ye.

Nan Efezyen chapit 5, Bondye bay de (2) fason nou kapab konnen si nou vrèman genyen renmen espirityèl sa a.

1. MENM JAN KRIS TE RENMEN LEGLIZ LA Efezyen 5.25—Mo « legliz » la vle di tout moun k'ap swiv Kris. Tèlman Jezikri te renmen ou Li te vese san L' sou lakwa a. Li te pran penn pa ou la epi Li te mouri nan plas ou. Bezwèn ou yo te vo plis pou Li pase pwòp dezi ak santiman pa L'. Li te pale souvan sou afè renmen epi Li te aji avèk renmen tou.

Konsa tou, yon mari dwe di madanm li souvan kijan li renmen l'. Men, fòk li montre renmen sa a tou dapre fason li nye pwòp dezi li, dwa li, avèk enterè pèsonèl li pou l' fè kè madanm li kontan. Yon mari ki gen kalite renmen sa a va tou prêt pou l' bay lavi li pou madanm li si okazyon an ta rive pou l' fè sa.

2. TANKOU TÈT PA OU Efezyen 5.33 Ou konnen kijan ou sousye pou kò ou. Ou toujou bat pou vant ou plen, pou w' gen rad, epi pou blesi ou yo geri byen. Lè gen yon pati nan kò ou ki blese, tout kò w' fè w' mal.



Yon mari ki vrèman renmen madanm li va bay l' manje ak rad. Konsa tou, l'ap bat pou l' swen bezwen emosyonèl li yo tou. L'ap eseye konprann santiman l' yo yon fason pou l' kapab kriye epi ri ansanm avè l'. Anmenmtan, l'ap fè tout sa l' kapab pou l' swen bezwen espirityèl li yo, yon fason pou l' ede l' jwenn lapè avèk Bondye. Lè yon madanm santi mari li sousye pou bezwen li yo onivo emosyonèl, ak onivo espirityèl, l'ap reponn pi fasil nan yon fason seksyèl. Ni bezwen seksyèl mari a, ni bezwen seksyèl madanm lan, toude va satisfè lè mari a renmen madanm lan nèt—kò li, nanm li, avèk lespri li.

JENÈZ 24.67, 29.20 ; EFEZYEN 5.25–33 ; 1 PYÈ 3.7

SE POU CHAK MARI RENMEN MADANM YO TANKOU YO RENMEN TÈT PA YO... (EFEZYEN 5.33)

ANN GADE LAVI A

Vrè renmen ant yon mari avèk madanm li va ini lespri yo, nanm yo, avèk kò yo.



**Yon bon mari
ede madanm li
pou l' rive
satisfè ak sa l'
fè a.**

**Kèk kle pou twouve
satisfaksyon :**

- Iwanj
- konfyans
- komunikasyon
- renmen

**Yon mari dwe
demontre renmen
nan fason li aji.**

**Bezwèn madanm li
vo plis pase sa li vle.**

Li pataje pwoblèm
avèk lajwa madanm li.

Li renmen l' nèt.

Etid Pou Mesye Marye : Relasyon Mari Avèk Madanm

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 22

RESPEKTE MADANM OU

BI LESON AN : Pou wè kijan sa vrèman enpòtan pou yon mari respekte madanm li.

Vèsè Kle :

1. **1 Pyè 3.7** Kijan yon mari dwe aji avèk madanm li ? _____

2. **Pwovèb 31.28-29** Kisa yon mari kapab di pou fè lwanj madanm li ? _____


3. **Pwovèb 31.23** Yon madanm santi respè lè mari li se youn nan _____.
4. **2 Wa 4.22-24** Mari sa a te respekte madanm li nan fason li te _____ desizyon li.

Devwa Pou W' Fè



Pou Kont Ou

Ekri yon ti powezi, oubyen fè yon lis sou bon kalite madanm ou genyen yo. Lèfini, renmèt madanm ou sa ou te ekri a.



Avèk Madanm Ou

Fè lwanj madanm ou devan timoun yo.

Avèk Pitit Ou

Ankouraje yo pou yo renmèsyé manman yo pou tout sa li fè pou yo. Ankouraje yo pou yo fè lwanj li tou.

RESPEKTE MADANM OU

Leson 22

Yon mari dwe sèvi avèk pozisyon li kòm mèt fwaye a pou l' ankouraje, fè lwanj, epi sipòte madanm li. Li ta dwe ede l' devlope kalite karaktè a li vle genyen lakay li. Men kèk fason ou kapab obeyi kòmandman an nan Bib la ki di pou w' respekte madanm ou :

CHACHE ATENN AVÈK RÈV LI YO—Mande madanm ou kisa li ta renmen akonpli nan lavi li. Ki kote li ta renmen al' vizite ? Èske gen kèk bagay li vle aprann ? Èske gen bagay nan kay la li ta vle chanje ? Kisa li ta renmen pou w' achte pou li ? Pale avè l' sou rèv li, epi deside kòman nou kapab atenn objèktif sa yo.

TI AKSYON LAMOU—Chache kèk ti flè nan raje a pou w' bay li. Ekri l' yon ti nòt, epi fè l' konnen sa ou apresye nan li menm. Pran swen tibebe a. Lave vesò yo chak Dimanch. Ti aksyon lamou sa yo va ale lwen.

KOUTE L'—Koute vle di plis pase pou w' tande pawòl li yo senpman. Sa ladan l', men koute vle di ou konprann sa l' vle di, epi menm rive konprann sa li pa ka eslike a tou. Koute l' vle di ou konnen lè l' pa santi l' byen, ak lè l' bezwen w' plis. Li vle di ou konnen lè l' fyè poutèt yon bagay li resi fè, ak lè ou dwe fè lwanj li. Koute vle di w'ap swiv sa madanm ou vle kominike avè w'—kit nan aksyon, kit nan pawòl.

ANKOURAJE L' PAMWAYEN LWANJ—Fè lwanj madanm ou nan plizyè sans. Di l' konsa : « Se ou ki pi bon... Sa te bon nèt... Se sèl ou menm ki ka fè sa... Mèsi... Mwen apresye jan ou... » Fè lwanj li devan timoun yo ak devan zanmi ou yo. Sere pi bon pawòl yo pou lè nou pou kont nou ansanm.

RANFÒSE CHERI OU A—Gen yon pwovèb ki di : Dèyè chak bon gason, gen yon bon madanm. Pwovèb sa a fè nou konnen se poutèt fidelite ak sipò madanm yo ki rann anpil gason reyisi nan lavi a. Lekontrè a dwe konsa tou : « Dèyè chak bon madanm, genyen yon bon mari. » Yon mari dwe itilize plas li kòm lidè nan fwaye a pou l' ede madanm li grandi epi devlope nan karaktè li. Kòm yon lidè, li reskonsab pou l' « ranfòse cheri doudou li a » .

PWOVÈB 16.24 ; PWOVÈB 15.23

YON BON MADANM SE YON LWANJ LI YE POU MARI LI. (PWOVÈB 12.4)

ANN GADE LAVI A

Gen yon lè yon madanm te al' wè pastè a ansanm avèk mari li. Madanm lan te di li te santi l' dekoraje. Li te santi li pa t' vo anyen. Mari li pa t' janm konn renmèsyé li pou travay li te fè nan kay la.

Pastè a te mande mari a pou l' tounen pou kont li pita. Lè mari a te vini, pastè a te montre li kijan sa te enpòtan pou l' renmèsyé madanm li pou tout ti travay li konn fè nan kay la tankou : fè manje, lave rad, fè mennaj, elatriye. « Ba li sa ki pou li a. Lè y'a wè sa l' fè, se pou tout moun fè lwanj li » (Pwovèb 31.31).

Lè mari a te kòmanse fè sa, madanm li te kòmanse pi kontan epi te santi li te pi fyè akòz mari a te demontre apresyasyon pou li.

Respekte rèv
madanm ou nan :

- kote li vle ale
- sa l' anvi aprann
- sa l' ta renmen
achte

Ti aksyon lamou yo
prale lwen.

Koute sa l' di w' san
l' pa pale.

Fè lwanj li.
Renmèsyé li.

Dèyè chak bon
madanm,
genyen yon
bon mari.



Etid Pou Mesye Marye : Relasyon Mari Avèk Madanm

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 23

MANYÈ MARYAJ

BI LESON AN : Pou aprann kijan bon manyè kapab ede evite pwoblèm nan maryaj.

Vèsè Kle :

- 1 Pyè 3.8** Vèsè sa a ankouraje ou pou w' renmen youn lòt _____ .
- Efezyen 4.32** Bon manyè se yon bagay ki ede nou _____ youn lòt.
- 1 Korent 15.33** Move manyè kapab sòti nan _____ .
- Galat 5.22-23** Lespri Bondye a kapab ede mari a gen bon manyè paske Lespri a va ranpli l' avèk :


- Jak 3.2** Si pou l' gen bon manyè, yon mari bezwen kontwole _____ .

Devwa Pou W' Fè



Pou Kont Ou

Repase sou lis la nan lesyon 4 sou kijan pou w' kontwole kòlè. Èske ou te repase sou pwen sa yo avèk fanmi ou ?



Avèk Madanm Ou

Mande l' si manyè ou gen jounen jodi a toujou bon menm jan yo te ye anvan ou te marye. Mande l' pou l' onèt avè w' yon fason pou l' di w' kijan ou kapab amelyore manyè ou.

Avèk Pitit Ou

Fè yo konnen ou vle amelyore manyè ou. Mande yo kisa ou konn fè ki rann yo santi yo pa alèz, oubyen wont.

MANYÈ MARYAJ

Lesson 23

Bon manyè vrèman enpòtan nan yon maryaj. Lè yon mari aji avèk madanm li avèk koutwazi, sa demonstre l' kijan li renmen l'. Madanm lan pral santi mari a va pran swen li epi pwoteje li. Gen anpil pwoblèm ki pa t'ap janm parèt nan yon maryaj si moun yo te gen bon manyè youn ak lòt.

Men kèk bagay ou kapab fè pou montre madanm ou ou vrèman renmen l'.

FÈ :

- Fè l' konnen kote ou prale ak sa w'ap fè
- Ouvri pòt la pou li epi kite l' antre anvan
- Leve chay lou pou li
- Pale avè l' anvan ou pran desizyon ki gen rapò avè l'
- Kenbe kò ou nan bon eta ijenik
- Ede l' moute epi desann machin oubyen moto
- Ranmase bagay ou konn lage atè nan kay la
- Bat pou w' rive alè lè manje kwit, epi lè w' gen lòt randevou

PA :

- Fè diskisyon avè l' oubyen korije l' an piblik
- Pale avè l' sou lòt fi ou te renmen
- Kritike fanmi li an piblik
- Fawouche l'
- Vwayaje pou kont ou ak lòt fi
- Kale blag sou relasyon ou ak lòt fi
- Pale ak lòt moun sou bagay pèsonèl li pataje avè w'
- Dekoupe pawòl li oubyen kale l' vag lè l'ap pale avè w'

PWOWÈB 15.4 ; GALAT 5.26 ; KOLOSYEN 4.6 ; JAK 3.2

MENM JAN AN TOU, NOU MENM MARI...BA YO TOUT RESPÈ YO MERITE, PASKE YO MENM TOU Y'A RESEVWA MENM LAVI AVÈK NOU TANKOU YON FAVÈ NAN MEN BONDYE. (1 PYÈ 3.7)

ANN GADE LAVI A

Kawolèn te marye avèk David depi kenzan pase. Lè yo te marye, Kawolèn te vle fè yon gran fèt ak yon bèl gato. David pa t' sou bagay sa yo menm. Apre yon gran diskisyon, Kawolèn te di li tapral achte tout bagay sa yo ak lajan pa l'. Te toujou genyen kalite diskisyon sa yo nan maryaj la. Madanm lan te vle simante kizin lan, men mesye a pa t' vle. Konsa, madanm lan te achte siman ak pwòp lajan pa l', men mari a pa t' janm brase yon ti mòtye menm.

Kawolèn pa t' janm enterese nan travay mari li. Okontrè, li t'ap toujou pale sou sa li te gen pou l' fè. Kawolèn te menm konn tonbe plenyen akòz li te santi David ta pito ranje yon bagay kay yon vwazen olye pou l' ranje yon bagay lakay.

Kawolèn ak David pa t' janm aprann kijan pou yo genyen bon manyè youn ak lòt. Konsa, maryaj yo bay yo anpil pwoblèm.

**Pratike bon
manyè se yon
fason pou
demonstre
renmen.**

**Bon manyè kapab
epànye ou devan
anpil pwoblèm.**

**Sa ki fè pati bon
manyè :**

- aksyon
- santiman
- pawòl
- aparans

**Bon manyè montre
madanm ou sa ou
panse konsènan li
menm.**

**Nou dwe toujou aji
ak bon manyè. Se pa
sèlman lè gen yon
fèt, oubyen lè nou
devan sosyete a.**



Etid Pou Mesye Marye : Relasyon Mari Avèk Madanm

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 24

Fè Kè MADANM OU KONTAN

BI LESON AN : Pou aprann kijan pou w' fè kè madanm ou kontan lè w' reponn avèk kèk nan bezwen espesyal li yo.

Vèsè Kle :

- 1 Korent 7.33** Yon mari dwe chache _____ plezi.
- Detewonòm 24.5** Bondye te fè pèp Li konnen sa pi enpòtan pou yon gason fè kè madanm li kontan pase pou li _____.
- Sòm 101.2-3** David te anvi dirije fwaye lakay li, epi li te vle fè sa san l' pa fè peche. Li te di li p'ap mete _____ nan tèt li, epi li t'ap rayi _____.
- Kantik 7.1-9** Yon madanm toujou renmen lwanj ak admirasyon. Wa Salomon te konpare madanm li ak pi bèl bagay li te konnen yo. Site kat (4) nan yo :

Devwa Pou W' Fè



Pou Kont Ou

Chache yon kopi nan pwomès maryaj ou te fè yo. Memorize yo, epi repete yo chak jou pandan w'ap priye.



Avèk Madanm Ou

Li Sòm 101 devan l'. Fè l' konnen se yon lidè konsa ou anvi devni.

Avèk Pitit Ou

Pandan madanm ou ap koute, pataje istwa a sou kijan ou te fè konesans ak madanm ou bay timoun yo. Fè yo konnen sa k' fè ou konnen se sèl madanm ou ki vrè fanm nan tout lemonn.

FÈ KÈ MADANM OU KONTAN

Lesson 24

Lèzòm toujou kontan lè bezwen yo konble. Pou yon mari kapab fè kè madanm li kontan, fòk li konprann bezwen li yo. Bezwen yo kapab fizik, espirityèl, oubyen emosyonèl. Men kèk nan pi gwo bezwen emosyonèl yo yon madanm konn genyen :

FÒK LI KONNEN PA GEN LÒT FI KAPAB PRAN PLAS LI. Yon madanm bezwen konnen li se yon moun espesyal devan mari li. Li kapab santi sa fasil lè mari li fokis sou yon lòt fi. Si ou oblige travay kole ak yon fi (pa egzanp : yon sekretè), chache kèk fason espesyal pou asire madanm ou se li menm ki nan premye pozisyon.

FÒK OU KONPRANN LI. Èske ou kapab site kèk pwen kote madanm ou fò espirityèlman, emosyonèlman, mantalman, epi fizikman ? Sèl fason ou kapab bay li bon konsèy se si ou konnen kote li fò ak kote li fèb.

LI BEZWEN SANTI PWOTEKSYON. Li anvi santi ou antoure li avèk pwoteksyon. Li bezwen konfye ou pou pwoteksyon kont danje espirityèl ak danje naturel yo tou. Li anvi konnen ou pral fè tout sa k' posib pou bay li manje, rad, ak yon kote pou l' dòmi. Sa rann li santi li an sekirite epi kontan.

LI ANVI ATENN AVÈK BI LI YO. Yon madanm genyen rev ak bi. Yon mari ki saj va konnen kisa rèv ak bi sa yo ye, epi li va fè tout sa l' kapab pou l' ede madanm li reyalize yo. Li va ede l' wè ki valè travay l'ap fè nan kay la gen tou.

LI GEN BEZWEN YON LIDÈ ESPIRITYÈL. Li bezwen konsèy espirityèl nan men mari li, epi li bezwen jwenn yon bon egzanp nan men l' tou. Si mari a toujou ap grandi nan relasyon li avèk Bondye, si l' renmen epi obeyi Pawòl Bondye a, si l' rete djanm nan konviksyon l' yo, epi si li gen fwi Lespri a nan lavi li, lè sa a, madanm lan va santi li fyè epi l'ap kontan.

1 TIMOTE 5.8 ; 1 PYÈ 3.7

YON MOUN KI MARYE...AP CHACHE FÈ MADANM LI PLEZI. (1 KORENT 7.33)

ANN GADE LAVI A

Denni te marye avèk yon fi ki te sòti nan yon lòt zòn. Apre yo te marye, fi a te vin rete nan zòn Denni a. Malerezman, apre yon tan Denni pa t' renmen pase tan lakay avèk fi a ankò. Leplisouvan, li te toujou sòti avèk zanmi li yo. Denni te egojis anpil.

Sepandan, madanm li te chita lakay avèk timoun yo. Li te tris epi tou sèl. Li te anvi tounen lakay fanmi li.

Lè Denni te konvèti, li te kòmanse wè tò li. Oparavan, li te wè tèt li ase. Li pa t' konn enterese nan bezwen madanm li menm. Lè l' te kòmanse enterese nan bezwen madanm li yo, lè sa a ni maryaj la, ni fanmi an te kòmanse kontan ankò.

**Yon madanm
bezwен konnen li
se yon moun
espesyal devan
mari li.**

**Yon madanm bezwen
santi mari li konprann li.**


**Yon madanm bezwen
pwoteksyon :**

- espirityèlman
- fizikman
- emosyonèlman

**Fòk yon madanm santi
travay li ap ede l' atenn
avèk objèktif li yo.**

**Yon madanm gen bezwen
yon lidè espirityèl ki :**

- toujou ap grandi
nan relasyon li avèk
Bondye
- obeyi Pawòl Bondye a
- gen fèm konviksyon
espirityèl
- pote fwi Lespri
Bondye a nan lavi li



Etid Pou Mesye Marye : Relasyon Mari Avèk Madanm

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 25

YON LESPRI BRIZE

BI LESON AN : Pou konprann kèk fason lespri yon madanm kapab brize.

Vèsè Kle :

- Pwovèb 18.14** Yon moun kapab sipòte anpil bagay, men lè yon moun _____ sa pa fasil pou _____ .
- Pwovèb 15.4** Move pawòl _____ .
- Pwovèb 15.13** Lapenn rann yon moun _____ .
- Rit 1.20–21** Nayomi te tris epi te ranpli avèk amètim (mo Mara a vle di : amètim) akòz Bondye te _____ .
- Jak 5.16** Ou kapab geri yon lespri brize lè ou _____ peche w' youn bay lòt, epi priye _____ .

Devwa Pou W' Fè



Pou Kont Ou

Veye pou kèk siy ki kapab demonstre lespri madanm ou gentan brize. Kèk siy se : lè w' pa gade moun nan je, lè l' plede bay soupi, epi lè l' toujou rele sou moun. Chache konn sa k' fè kè l' brize konsa.



Avèk Madanm Ou

Mande l' pou l' pataje kèk bagay ou gentan fè, oubyen te di ki te brize li. Si ou santi lè a bon, ou kapab pataje kèk nan tèt chaje ou yo ansanm avè l' tou. Mete tèt nou ansanm epi fè sa Bib la mande ou fè nan Jak 5.16—fè youn lòt konnen kijan nou regrett sa nou fè ki mal.

Avèk Pitit Ou

Swiv byen pou wè si y'ap fawouche youn lòt, oubyen ap pase youn lòt nan betiz. Bagay sa yo ka brize youn lòt. Fè yo konn kijan langaj konsa konn frape lòt moun, epi fè yo konnen kisa Bondye panse sou langaj konsa tou.

Yon lespri ki ansante kapab ranfòse yon maryaj ; yon lespri ki brize kapab rann li fèb.

Lè ou blese dwèt ou, li fè w' mal epi li senyen. Lè lespri ou brize, li fè w' mal tou, men akòz se kè w' k' ap senyen, pa gen moun ki kapab wè sa. Si lespri w' pa jwenn gerizon, sa kapab afebli maryaj ou, epi li ka menm rive kraze l' tou. Sa ka fè w' mal andedan, epi li ka rann ou fè kòlè, li ka mennen amètim, epi menm vyolans membran.

Souvan, se moun ki pi pwòch ou ki brize lespri w' plis. Men kèk fason yon mari kapab brize madanm li souvan :

1. Lè l' kite lòt moun, oubyen lòt bagay pran premye plas nan lavi li. Yon madanm vle pran premye plas epi li kapab santi sa lè gen yon lòt bagay oubyen yon lòt moun ki sanble pi enpòtan nan lavi mari a pase li menm membran.
2. Lè l' fè kòlè. Lè l' enpasyan. Oubyen lè l' ofanse fasil.
3. Lè l' konpare madanm li avèk lòt fi nan fason li chante lwanj lòt fi pou kèk kalite yo gen lakay yo poutan madanm pa l' la pa gen menm kalite sa yo.
4. Lè l' pa bay opinyon madanm li valè.
5. Lè l' korije l' an publik oubyen lè l' pase l' nan jwèt pou yon bagay li anvi chanje lakay madanm lan.
6. Lè l' pa okipe yon efò madanm lan fè pou fè kè l' kontan.
7. Lè l' pa fè lwanj madanm li, oubyen lè l' manke apresye l' pou sa l' ye ak pou sa l' fè.
8. Lè l' pran ka timoun yo olye li pran ka madanm li.

Si ou panse lespri madanm ou te brize, chache yon kote trankil pou w' pale avè l' sou sa. Mande l' pou l' pataje santiman l' yo ansam avèk ou. Si se ou menm ki te lakòz lespri li te brize, pran tò ou epi mande l' eskiz pou sa. Apre sa, bati yon plan pou fè sèten ou p' ap pral brize lespri li menm jan an ankò.

...SI LI DEKOURAJE, KI MOUN KI KA REMOUTE KOURAJ LI ? (PWOVÈB 18.14)

ANN GADE LAVI A

Yon jou yon jèn koup te al' chache yon ti konsèy pou maryaj yo a. Pandan yo t'ap pale, mesye a te tonbe pale sou yon relasyon li te genyen oparavan avèk yon lòt fi. Se kòmsi li te renmen bay tout detay yo nèt.

Madanm lan te déjà padone l' pou relasyon sa a, men konseyè a te remake kijan sa te toujou fè l' mal. Pandan gason an t'ap bay istwa a, madanm lan t'ap vin pi chagren. Lè istwa a te fini, sa te pran yon bon ti tan pou fè kè madanm lan kontan ankò.


Konseyè a te travay avèk mari a pou ede l' konprann kijan sa te fè madanm lan mal lè l' te pale konsa. Li te fè mari a konnen kijan bagay ki gentan jwenn padon pa dwe leve ankò.

**Yon lespri ki
brize rann yon
maryaj febli.**

**Yon lespri ki brize ka
mennen amètim.**

**Yon lespri konn brize
poutèt :**

- move priyorite
- kòlè ak enpasyans
- wont devan moun
- mank apresyasyon
- pran ka lòt moun



Etid Pou Mesye Marye : Relasyon Mari Avèk Madanm

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 26

BAY KONSEY MADANM OU VALÈ

BI LESON AN : Pou konprann ki valè konsèy madanm ou genyen.

Vèsè Kle :

- Pwovèb 31.10-12** Yon mari kapab konfye yon bon madanm paske madanm sa a _____ .
- Pwovèb 31.26** Yon bon madanm bay _____ ak _____ .
- Pwovèb 18.1-2** Gen kèk gason ki renmen bay ide pa yo, men ki pa vle tande lòt moun. Yon moun konsa se yon _____ .
- Matye 27.15-19** Pilat te jwenn bon konsèy konsènan sa l' pou l' fè avèk Jezi. Kilès ki te bay li konsèy sa a ? _____
- 2 Wa 4.8-10** Fanm lavil Chounèm lan te bay mari li bon konsèy pou l' bati _____ pou pwofèt Elize.

Devwa Pou W' Fè



Pou Kont Ou

Panse avèk yon lè madanm ou te bay ou bon konsèy. Chita epi ekri l' yon ti nòt pou renmèsyé li pou konsèy sa. Fè sa kounyeya menm.



Avèk Madanm Ou

Mande l' ki konsèy li ta renmen ba ou (pa egzanp : sou afè lajan, kay la, oubyen timoun yo). Fè l' konnen ou p'ap pral pase l' nan rizib pou konsèy li ba ou a.

Avèk Pitit Ou

Li istwa Woboram lan avèk yo nan 1 Wa chapit 12. Woboram se te yon nèg ki te fè yon move chwa konsènan ki konsèy li te dakò koute.

BAY KONSEY MADANM OU VALÈ

Lesson 26

Bondye te gen plizyè bi pou yon mari ak yon madanm ini yo nan maryaj. Youn nan bi sa yo se pou madanm lan te kapab bay mari a konsèy.

Yon gason pa ka konnen epi konprann tout bagay. Nan kèk domèn, Bondye bay fi yo yon konprann gason yo pa genyen. Men nan kèk lòt domèn, Bondye bay gason yo yon konprann medam yo pa genyen. Konsa, lè gason ak fi a fè yon sèl epi koute konsèy youn lòt, lè sa a yo kapab pran bon desizyon ansanm.

Lè yon madanm bay konsèy, sa pa vle di se chèf li anvi chèf pou sa. Mari a toujou dwe pran desizyon final la. Menmsi li pa fè egzakteman sa madanm lan te konseye li fè, li kapab fè yon pi bon desizyon kounyeya akòz li jwenn plis donnen pou l' rive pran yon pi bon desizyon.

Poukisa konsèy yon madanm tèlman gen valè ?

LI KONPRANN BAGAY YO YON LÒT JAN. Lè yon mari panse ak yon bagay, li wè l' op-wendevi pa l' sèlman. Madanm li kapab genyen yon lòt pwendvi. Souvan, li kapab wè kèk bagay mari a pa t' wè.

LI PI PRIDAN. Akòz madanm lan bezwen sekirite, li pa prese aji. Souvan madanm lan kapab wè kèk danje gason an pa wè. Madanm lan anvi pran plis tan pou reflechi epi priye sou sa.

SA FÈ L' SANTI LI FYÈ LÈ MARI A AKSEPTÉ KONSEY LI. Si yon mari pa janm koute konsèy madanm li, lè sa a madanm la pral santi li sòt. L'ap santi kòmsi li pa gen valè menm. Lè bagay yo pa mache byen, li pral blanmen mari a.

MEN, KONSEY LI YO PA TOUJOU BON. Si konsèy la kontrè avèk Pawòl Bondye a, konsèy sa a pa bon. Abraram pa t' dwe koute konsèy madanm li pou l' fè yon pitit avèk Aga (Jenèz chapit 16). Pafwa, madanm lan manke sajès ak konesans pou l' bay yon bon konsèy. Malgre sa, yon bon mari va toujou koute konsèy la avèk respè, epi apre sa, li pral pran yon pi bon desizyon jan l' kapab.

1 SAMYÈL 25.3-38 ; JÒB 2.9-10 ; PWOVÈB 31.10-31

MARI L' METE TOUT KONFYANS LI NAN LI... MADANM LAN P'AP JANM AJI MAL AK MARI L', L'AP PASE TOUT LAVI L' AP FÈ L' BYEN. (PWOVÈB 31.11-12)

ANN GADE LAVI A

Anri ansanm avèk madanm li te deplase al' rete nan yon zòn ki te byen lwen. Apre kenzan ap viv nan zòn sa a, te gen yon moun ki te ofri yo yon woulib pou al' vizite ansyen zòn lan—san yo pa bezwen depanse yon goud. Anri te kontan. Li te anvi wè manm yo nan legliz kote li te dirije oparavan. Li te vle ale touswit.

Madanm li pa t' gen menm lide. Li te vle al' vizite pitit yo ki te reskonsab epi ki te rete nan yon lòt zòn ki te yon bèl distans pito.

Anri te priye sou sa. Li te deside pou l' fè sa madanm li te vle fè malgre sa te yon baf pou li. Vizit la te byen pase epi yo te etabli yon pi bon relasyon avèk pitit yo. Vizit sa a avèk pitit yo te vo plis pase lòt vizit yo tapral fè a, epi Anri te kontan dèské li te koute konsèy madanm li.


**Bondye bay
gason ak fi
konprann nan
domèn diferan.**

Lè w' bay konsèy, sa pa vle di se ou ki chèf.

Yon madanm :

- kapab konprann bagay yo yon lòt jan
- gen plis pridans
- santi li fyè lè yo bay konsèy li valè

Konpare tout konsèy yo avèk Pawòl Bondye a, epi sèvi avèk sajès Bondye bay la.



Etid Pou Mesye Marye : Relasyon Papa Avèk Pitit

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 27

PITIT-YON KADO BONDYE BAY

BI LESON AN : Pou byen akeyi timoun epi aji avèk yo kòm yon kado Bondye ba ou.

Vèsè Kle :

- Sòm 127.3** Vèsè sa a fè nou konnen pitit se _____.
- Jenèz 33.5** Lè Ezaou te mande Jakòb pou kiyès bann moun sa yo te ye, Jakòb te reponn li konsa : « Tout se pitit _____ . »
- 1 Samyèl 1.27-28** Bondye te bay Ana yon pitit gason ki te rele Samyèl epi Ana te _____ nan men Bondye.
- Jan 3.16** Jezi, Pitit Bondye a, se yon kado espesyal Bondye ban nou. Tèlman Bondye te renmen lemonn Li te _____ .
- Jenèz 25.21, 24** Lè Rebeka pa t' ka fè pitit, Izarak, kòm mari li, te priye epi Bondye te bay yo _____ .

Devwa Pou W' Fè



Pou Kont Ou

Bondye te fè chak gress ptit ou, epi Li te prepare yo kòm yon kado espesyal pou ou. Pran tan jodi a pou w' renmèsyé Li pou chak kado sa yo. Nonmen non yo devan Bondye.



Avèk Madanm Ou

Li istwa Elkana, Ana, avèk Samyèl ansanm avèk madanm ou. W'ap jwenn istwa sa a nan 1 Samyèl chapit premye.

Avèk Pitit Ou

Si w' poko fè sa, prezante pitit ou yo nan legliz la. Asire ou fè yo konnen kijan ou renmèsyé Bondye pou lavi yo.

PITIT-YON KADO BONDYE BAY

Lesson 27

Bondye gentan bay pitit Li yo anpil kado, men pou chak papa, Li bay yon kado ki vrèman espesyal—se pitit yo Li fè w' kado. Bondye te fè chak nan pitit sa yo epi Li te mete l' nan men paran yo kòm yon kado espesyal. Lèfini, Li gen yon plan espesyal pou chak timoun sa yo tou. Nou kapab wè sa nan lavi Jezi a. Kòm yon tibebe, Jezi se te yon kado pou manman l' ak papa l', ansam avèk tout limanite anjeneral. Jezi te grandi epi Li te akonpli travay la Bondye te vle pou L' fè a.

YON PITIT—YON KADO BONDYE BAY. Bib la genyen anpil ansèyman sou zafè timoun. Nan Sòm 127.2-5, li di pitit se « yon kado Bondye bay ». Pasaj sa a konpare pitit avèk zam nan men yon sòlda tou. Yon zam se yon bagay ki vrèman efikas lè l' byen itilize. Lè yon sòlda tire yon zam, se nan direksyon li lonje zam lan bal la va tonbe. Se konsa tou, yon pitit va swiv direksyon paran. Yo kapab rive pi lwen pase paran yo, epi yo kapab pote verite Pawòl Bondye a bay lòt moun, ak lòt jenerasyon depi paran yo te byen enstwi yo. Konsa, yon timoun kapab fè plis pou Senyè a pase sa paran an te ka janm fè.

RENMÈT KADO A BAY BONDYE ANKÒ. Bondye genyen yon plan pou lavi chak timoun. Pa gen eksepsyon ! Bondye vle pou paran yo pran swen timoun yo epi bay yon bon levasyon tout jan sa posib. Yo dwe anseye pitit la pou l' pa gaspiye lavi li. Konsa, lè yo prepare yon timoun pou l' sèvi Bondye, se renmèt paran yo renmèt Bondye kado a Li te bay yo.

VALÈ YON PITIT. Kòm pitit se yon kado Bondye bay, kado sa a san pri. Bondye konn sa. Men, sèl fason yon timoun kapab rive konprann sa se si paran l' moutre l' sa. Se sèl fason sa a yon timoun kapab rive konprann ki valè li genyen. Chak timoun bezwen aprann ki gwo wòl li jwe nan fwaye a. Menm lè yon timoun pa gen anpil laj, depi lè l' touputi li gentan sansib anpil sou fason lòt moun gade l'. Konsa, sa vrèman enpòtan pou toude paran yo montre timoun yo kòman yo renmen yo ak kijan yo akeyi yo depi yo touputi.

Lè paran yo fè timoun yo konnen se yon kado yo ye ki sòt nan men Bondye, lè sa a, l'ap santi li fyè.

JENÈZ 48.9 ; JOZY 24.3-4 ; SÒM 113.9 ; 1 SAMYÈL CHAPIT 1

**Pitit...yon kado
espesyal avèk
yon plan
espesyal.**

**Pitit yo va swiv direksyon
paran yo epi yo kapab
pote verite Bondye a bay
lòt moun**

**Bondye vle pou paran yo
renmèt timoun yo bay Li.**

**Timoun yo santi yo fyè
lè yo santi moun bezwen
yo epi byen akeyi yo.**

PITIT SE KADO BONDYE BAY, SE YON REKONPANS POU MANMAN AK PAPA. (SÒM 127.3)

ANN GADE LAVI A

Nan Ansyen Testaman an nou jwenn istwa a sou Ana avèk Samyèl. Ana te priye pou Bondye bay l' yon pitit pou plizyè ane. Finalman, Bondye te bay l' yon pitit gason ki te rele Samyèl. Nanpwen moun ki te kontan pase Ana. Samyèl se te yon kado Bondye te bay.

Apre detwa zan, Ana te renmèt Samyèl bay Bondye. Samyèl te al' travay nan tanp lan ap ede granprèt Eli. Li te ede Eli pandan plizyè ane. Apre Eli te mouri, Samyèl te vin youn nan pi gwo reskonsab yo nan peyi Izrayèl la.



Etid Pou Mesye Marye : Relasyon Papa Avèk Pitit

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 28

TRANSMÈT YON BENEDIKSYON

BI LESON AN : Pou montre kijan sa enpòtan pou transmèt yon priyè benediksyon bay pitit ou ak pitit pitit ou.

Vèsè Kle :

- MAK 10.14-16** Jezi te invite timoun yo pou yo vin jwenn Li. Apre sa, Li te mete men L' sou tèt yo epi Li te _____.
- Jenèz 27.38** Ezaou te vrèman chagren lè papa l' pa t' ka bay l' benediksyon an. Se paske li te gentan _____ li.
- Jenèz 49.28** Pa lontan anvan Jakòb te mouri, li te _____.
- Lik 2.34** Simeyon te _____ Jezi, ansanm avèk paran l' yo, lè li te pwofetize sou sa Jezi tapral fè nan ministè Li.

Devwa Pou W' Fè



Pou Kont Ou

Aprann Mak 10.14-16 pa kè.



Avèk Madanm Ou

Antann ou avèk madanm ou pou n' priye ansanm pou chak nan timoun yo omwen yon fwa chak semenn.



Avèk Pitit Ou

Fè yon priyè benediksyon espesyal pou chak pitit ou. Fè l' yon fason espesyal kote timoun yo va toujou chonje sa avèk yon kè kontan.

TRANSMÈT YON BENEDIKSyon

Lesson 28

Mesye C.T. Stòd te bay ti powezi sa a : « Yon sèl lavi, byento l'ap fini. Se sèl sa ou fè pou Kris ki va reyisi. »

Kòm yon papa, souvan ou kapab panse sou sa ou va kite dèyè. Ou swete timoun ou yo va kontinye travay sou kèk pwojè ou gentan kòmanse. Ou swete yo va kenbe menm kwayans, ansanm avèk menm ideyal ansanm avè w'. Ou swete yo va onèt, va travay di, epi va aji byen avèk lòt moun. Ou swete ptit ou pral gen lafwa nan Bondye menm jan avè w'.

Gen kèk papa nan Ansyen Testaman an ki te bay ptit yo yon benediksyon espesyal. Izarak te genyen de (2) ptit gason—Ezaou avèk Jakòb. Nan Jenèz chapit 27 nou kapab wè kijan Izarak te beni yo. Nan Jenèz chapit 48-chapit 49, nou kapab li kòman Jakòb te beni douz (12) ptit gason l' yo, ansanm avèk de (2) ptit ptit li yo.

Benediksyon sa yo papa yo te bay ptit yo, se te benediksyon ki te vrèman espesyal. Benediksyon sa yo te gen kat (4) pati diferean nan yo.

1. MANYEN. Papa a te mete men l' sou tèt ptit la. Sa vrèman enpòtan lè yon moun manyen yon lòt. Petèt se yon akolad, yon lamen, yon ti bo, oubyen sèlman depoze ou depoze men w' sou zepòl li. Lè ou manyen ptit gason ou konsa, ou gentan di anpil bagay san w' pa ouvri bouch ou.

2. PAWÒL. Papa a te genyen yon mesaj espesyal li te pataje avèk chak ptit gason l'.

3. ANPIL VALÈ. Pawòl papa a te pale yo te mete anpil valè sou sila a ki t'ap beni a. Benediksyon an te dekri kòman chak ptit gason te gen anpil valè pou paran l' ansanm avèk lòt moun.

4. YON AVANGOU KONSÈNAN YON AVNI ESPESYAL. Izarak te pale sou yon bèl avni pou ptit li Jakòb (Jenèz chapit 27). Jakòb te kontinye koutim sa a nan jenerasyon pa l' la tou kote li te pale sou kijan avni ptit li yo tapral pase tou (Jenèz chapit 49).

Pawòl ou, avèk aksyon ou, aji sou ptit ou yo anpil. Nou vle poze chak papa yon kesyon : « Èske ou itilize pawòl ou, ansanm avèk aksyon ou yo, pou w' transmèt yon benediksyon bay ptit ou ?

SÒM 127.3-5

APRE SA, DAVID AL' LAKAY LI POU L' BENI FANMI PA L' TOU. (2 SAMYÈL 6.20)

ANN GADE LAVI A

Kèk ane pase te gen yon ti grannmoun gason ki te deside li tapral pase ti rès lavi li ap priye pou ptit li, ptit ptit li, avèk ptit ptit li.

Li te mete inèdtan apa chak jou pou l' mande Bondye pou chak ptit li, ptit ptit li, avèk ptit ptit li bay lavi yo nan yon ministè kretyen. Pa lontan anvan li te mouri, li te fè fanmi li konnen kijan Bondye te pwomèt li tout desandan li yo nèt tapral sèvi Bondye nan ministè a jiska katriyèm jenerasyon an.

Tradisyon sa a te pase bay chak jenerasyon nan desandan ti papi a. Tout timoun yo, rive nan katriyèm jenerasyon an, te antre nan sèvis kretyen, swa kòm yon pastè, oubyen yon madanm pastè.

**Yon papa espere
pou ptit li swiv
tras pye li.**

**Benediksyon yon papa
genyen kat (4) pati
ladan l' :**

- manyen
- pawòl
- mete valè sou ptit la
- yon avangou sou avni a



Etid Pou Mesye Marye : Relasyon Papa Avèk Pitit

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 29

YON PAPA-YON PWOFESÈ

BI LESON AN : Pou montre papa yo sa k' fè se yo menm ki dwe anseye pitit yo espirityèlman.

Vèsè Kle :

- EFEZYEN 6.4** Kisa yon papa dwe fè pou pitit li ? _____
- Jenèz 18.19** Abraram se te « papa anpil nasyon ». Bondye te konnen Abraram tapral _____ pou yo fè sa ki dwat devan L' .
- Detewonòm 11.18-19** Dapre pasaj sa a, site kèk lè yon papa jwenn okazyon pou l' anseye pitit li nan Pawòl Bondye a :


- Pwovèb 4.1-4** Mesye sa a te ka anseye pitit li paske _____ l' te byen anseye l' dabò.
- Pwovèb 3.1-2** Ansèyman yon papa kapab rann pitit li _____ .

Devwa Pou W' Fè



Pou Kont Ou

Swiv yon kou, oubyen yon etid biblik pou w' kapab agrandi konesans ou nan Pawòl la.



Avèk Madanm Ou

Chache kèk bon liv kreyen pou li epi achte yon Bib pou li si l' pokò gen youn.

Avèk Pitit Ou

Sa vo anpil lè ou li avèk pitit ou—sitou lè yo piti. Mande kèk pwofesè kreyen pou ede w' chwazi kèk bon liv. Toujou li avèk yo nan Bib la tou.

YON PAPA-YON PWOFÈSÈ

Leson 29

Bib la fè konnen papa yo dwe anseye pitit yo nan Pawòl Bondye a, ak sou kijan Bondye mande yo pou yo viv. Papa yo dwe anseye pitit yo verite espirityèl yon fason pou jenerasyon k'ap vini yo p'ap janm blyiyo.

Byen petèt genyen de (2) kesyon k'ap pase nan tèt ou : « Kisa m' dwe anseye ? » ak « Kòman pou m' anseye ? »

SA OU DWE ANSEYE

KONESANS BIBLIK. Kòmanse avèk istwa yo. Timoun renmen istwa. Atravè istwa yo, timoun yo kapab aprann kòman mond la te fèt, ki kote peche te sòti, plan sali a, epi menm kèk bagay sou lavni an, tankou retou Kris la avèk sa ki genyen apre lanmò. Yo kapab menm aprann anpil sou istwa, jeyografi, avèk lasyans atravè Bib la tou.

YON VI APA. Istwa biblik yo montre kijan kèk moun te swiv prensip Bondye yo nan lavi yo. Pafwa, istwa yo montre sa ki rive yon moun lè yo pa viv selon prensip Bondye yo tou. Montre pitit ou kòman Bondye fè moun kontan lè yo fè sa L' mande yo fè. Planifye ansanm avèk yo kijan nou kapab pi obeyisan avèk Bondye kòm yon fanmi.

KONVIKSYON Ki Fò. Leplisouvan, si w'ap reyisi ou non chita sou sa ou kwè konsènan tèt ou, mond la, ansanm ak Bondye. Sèvi avèk kèk egzanz nan Bib la, oubyen avèk kèk moun ou rekonèt, pou montre pitit ou verite sa. Bat pou w' devlope bon jan konviksyon tankou : Bib la se Pawòl Bondye a ; Bondye te fè kò ou epi se pou Bondye li ye ; vrè bi lavi a se pou renmen epi sèvi Bondye.

JAN OU DWE ANSEYE

Fòk ou itilize metòd diferan pou timoun ki gen laj diferan. Men kèk fason ou kapab anseye :

PALE OUBYEN LI. Planifye pou w' fè sa lè n'ap manje ansanm, nan devosyon familyal, lè n'ap chita ap bay blag, oubyen lè gen yon fèt oubyen yon lòt bèl moman konsa. Eseye fè tout sa ki rive w' nan lavi w' devni yon leson pou timoun yo. Gade Detewonòm 6.6-9.

MP3 OUBYEN PWOGRAM RADYO KRETYEN. Bagay sa yo kapab pale avèk pitit ou menm lè ou pa ka la.

KOTE OU ALE. Mennen fanmi ou nan kèk konferans biblik, oubyen nan kèk sèvis. Chita ansanm epi lè sèvis la lage, pale ansanm sou sa ou te tande.

LIV AVÈK FOTO. Mete bon kalite liv ak foto nan kay la pou timoun yo kapab li epi gade. Pale ansanm avèk pitit ou sou kijan fanmi an pral itilize bagay tankou telefòn, entènèt, avèk FACEBOOK.

DETEWONÒM 4.9-10, 6.20-25 ; TIT 2.7 ; 1 TESALONISYEN 2.10-12

...BA YO BON LEVASYON, KORIJE YO, PALE AK YO DAPRE PRENSIP SENYÈ A. (EFEZYEN 6.4)

ANN GADE LAVI A

Nan sezon plante a, Ronal te nan yon konbi ansanm avèk de (2) pitit gason l' yo. Malgre yo te vrèman okipe nan dat sa, yo pa t' janm neglige pou yo toujou mete Bondye anpremye nan lavi fanmi an.

Chak maten anvan yo te al' nan konbi, tout fanmi an te reyini pou yo adore Bondye ansanm. Yo te mande Bondye pou L' pwoteje yo pandan jounen an, sitou nan travay la.

Lèfini, chak swa, Ronal t'ap reyini fanmi an ansanm pou yo pase yon tan nan lapriyè, pou yo li Bib la, epi pou yo chante ansanm. Yo te toujou pale sou kòman jounen an te pase ak sou jan Bondye te ede yo, oubyen sou sa Li te anseye yo. Apre sa, yo t'ap renmèsyé Li pou jan Li te pran swen yo. Ronal t'ap anseye pitit li yo ni nan pawòl, ni nan aksyon.

**Se papa yo ki
dwe transmèt
verite espirityèl
bay timoun yo.**


**Anseye yo konesans
biblik.**

**Anseye yo kòman pou yo
mennen yon vi apa.**

**Anseye yo pou yo gen
konviksyon ki fò.**

Anseye yo pamwayen :

- dyalòg
- lekti
- egzanz ou
- kote ou ale
- liv
- mizik
- elatriye...



Etid Pou Mesye Marye : Relasyon Papa Avèk Pitit

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 30

PECHE KI DEVNI YON ERITAJ

BI LESON AN : Pou konprann kijan peche yon papa aji sou desandan li yo.

Vèsè Kle :

- DETEWONÒM 5.9** Dapre vèsè sa a, konbyen jenerasyon ki va peye pou peche yon papa ? _____
- 2 Wa 23.37** Jojakim se te yon wa nan peyi Izrayèl ki te fè _____ menm jan avèk zansèt li yo.
- Nonm 14.33** Paran Izrayelit sa yo pa t' rete fidèl anvè Bondye. Ki efè sa te pote sou pitit yo ?

- Jij 6.25, 27** Papa Jedeyon te konn sèvi zidòl. Bondye te vle pou Jedeyon debarase l' avèk zidòl sa yo. Kisa Bondye te di Jedeyon pou l' fè avèk lotèl Baal la ansanm avèk poto Achera a papa l' te moute a ?

- Ezekyèl 18.19–20** Malgre peche yon papa aji sou yon pitit li, Bondye p'ap pini pitit la poutèt peche papa a. Bondye va sèlman pini yon moun pou _____ .

Devwa Pou W' Fè



Pou Kont Ou

Si fanmi w' te konn sèvi lwa, fè yon priyè espesyal kote w' mande Bondye pou L' retire tout move enflyans sa yo nèt.



Avèk Madanm Ou

Mande li si l' konnen kèk peche nan lavi w' ki kapab sòti nan peche zansèt ou yo. Si l' mande w' pou w' pataje kèk ide sou lavi pa l' la tou, ou dwe tou prèt pou w' fè sa. Fè sèten ou dyaloge avèk jantiyès. Lèfini, priye ansanm pou n' kapab venk peche sa yo.

Avèk Pitit Ou

Kite yo ede w' fouye kay la pou wè si genyen kèk vye bagay lwa nan kay la. Esplike yo kijan bagay sa yo gen fòs pou yo mare yon moun nan peche. Fè yo konnen poukisa ou vle debarase w' avèk tout kalite bagay sa yo.

PECHE KI DEVNI YON ERITAJ

Leson 30

Menm jan genyen bon bagay nan lavi paran ou yo ki aji sou ou yon fason ki bon, konsa tou, fòt yo avèk peche yo aji sou ou yon fason ki pa bon tou. Si w' jwenn gen kèk peche nan lavi w' ki sòti nan paran w', fòk ou debarase ou avèk bagay sa yo atravè lapriyè. Apre sa, ou kapab jwenn èd nan men Bondye pou w' venk peche sa yo nan lavi ou.

Lavi paran ou yo kapab aji sou ou nan twa (3) fason diferan :

PECHE. Jwif yo ki te kite peyi Lejip nan Egzòd chapit 13 te fè peche. Konsa, Bondye te pini yo. Li te fè yo mache nan dezè a pandan karant (40) ane. Malgre timoun yo pa t' fè peche, yo te oblige mache ansanm avèk paran yo. Se konsa tou jounen jodi a. Timoun yo pral sibi poutèt kòlè, vis (tafyatè, vòlè, elatriye), abi, avèk dezinyon nan kay la kote paran yo pa ka byen boule ansanm.

Ou pa ka chanje tan pase a, men ou kapab reklame pouvwa Bondye a pou L' libere w' anba efè a peche sa yo pote nan lespri ou. Ou kapab sispann fè bagay sa yo, epi ou kapab rann pitit ou p'ap jwenn peche sa yo kòm yon eritaj

FEBLÈS FAMILYAL. Gen anpil fanmi ki genyen feblès ki toujou mache jwenn timoun yo. Se kapab kèk bagay tankou : mank komunikasyon, gason ki pa konn pran devan, mank jesyon, ak fanm k'ap pase gason yo lòd. Ou kapab renmèt Bondye tout feblès sa yo pamwayen lapriyè. Apre sa, ou kapab bat pou peche sa yo pa devni yon eritaj pou pitit ou.

SÈVIS LWA. Si zansèt yon Kretyen te konn sèvi lwa, te konn mache kay bòkò, te konn voye (oubyen resevwa) espedisyon, Kretyen sa a dwe sakre yon tan espesyal pou l' priye. Nan priyè sa a, li dwe reklame pouvwa Bondye a sou tout move lespri yo. Lè w' kanpe kont Satan, pa antann li pral bay legen fasil. Okontrè, li pral goumen avè w' rèd. Sèl bagay, ou kapab venkè pamwayen non avèk san Jezi a. Vye sèvis lwa zansèt ou yo te konn fè pa oblige domine sou fanmi pa w' la.

DETEWONÒM 18.9-11 ; LAMANTASYON 5.7 ; TRAVAY 16.16-18 ; EBRE 2.14

MWEN SE YON BONDYE KI FÈ JALOUIZI ANPIL. LÈ YON MOUN RAYI M', MWEN FÈ PITIT LI, PITIT PITIT LI AK PITIT PITIT LI YO PEYE SA. (DETEWONÒM 5.9)

ANN GADE LAVI A

Gen yon fanmi ki te konvèti, epi ki te manm legliz, depi ventan. Yon jou, youn nan mesye yo te fè konnen pandan li te al' lachas li te wè gwo bonnanj Granpapa a. Li te di gwo bonnanj a te pran fòm yon gwo zwazo. Lè sa a, papa a te reyini tout fanmi an ansanm epi te fè yo konnen kijan tapral genyen yon ban pwoblèm ki tapral tonbe sou yo akòz yo te wè gwo bonnanj Granpapa a. Sa te fè l' pè anpil. Vrèmanvre, nan mwa ki te swiv yo, te gen yon bann move bagay ki te rive fanmi sa a.

Kisa ki tapral rive si papa a pa t' pale konsa ak fanmi an ? Kisa ki tapral rive si l' te deklare yon moman jèn ak lapriyè ansanm avèk frè legliz yo pou yo te ka renmèt bagay sa a nan men Bondye ? Lè sa a, li te ka di fanmi an konsa : « Se vre. Gwo bonnanj Granpapa a te parèt vre. Pral gen pwoblèm. Men, se Kretyen nou ye. Mwen te reyini avèk legliz la. Nou te renonse Satan avèk tout pouvwa li genyen sou fanmi mwen. Mwen te mande Bondye pou L' kouvrir fanmi an avèk san Jezi a. » Si li te pale konsa pito, bagay yo te ka mache pi byen. Malerezman, akòz li pa t' fè sa, dyab la ap toujou bat fanmi sa jis jounen jodi a.

**Ni bon aksyon,
ni move aksyon
paran ou yo va
aji sou ou.**

**Renmèt feblès ou yo
nan men Bondye atravè
lapriyè.**

**Bat pou w' venk peche
sa yo.**

**Renonse tout vye
koutim lwa ak koutim
familyal.**

**Reklame viktwa a nan
non Jezi.**



Etid Pou Mesye Marye : Relasyon Papa Avèk Pitit

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 31

KORIJE PITIT OU

BI LESON AN : Pou konprann poukisa yon timoun bezwen koreksyon.

Vèsè Kle :

1. **Pwovèb 29.15** Yon baton vrèman itil timoun yo (lè l' byen itilize), epi li bay yo konprann. Kisa ki rive lè yon timoun toujou fè sa li pi pito ? _____

2. **Pwovèb 13.24** Si ou renmen pitit ou, ou va _____.

3. **Pwovèb 22.15** Bon jan koreksyon va ede pitit ou _____

4. **Pwovèb 3.11-12** Bondye bay koreksyon paske Li _____ pitit Li.

5. **Ebre 12.11** Site yon gwo rekonpans yon kwayan jwenn pamwayen koreksyon : _____

Devwa Pou W' Fè



Pou Kont Ou

Si pou n' chanje move abitid nou, fòk nou jwenn koreksyon. Èske Bondye ap chanje move abitid ou yo ? Kijan L'ap fè sa ? Site kèk fason L'ap fè sa. Si w' pa konnen, mande fanmi w' pou ede w'.



Avèk Madanm Ou

Chita ansanm epi chwazi kèk abitid nou ta renmen wè chanje nan pitit nou. Fè yon plan sou kijan nou pral korije yo yon fason ki va ede yo chanje.

Avèk Pitit Ou

Esplike yo plan an ou gentan fè avèk madanm ou. Chonje pou w' esplike yo bi plan an ak kijan plan sa a se pou byen yo.

KORIJE PITIT OU

Leson 31

Bondye korije pitit Li paske Li renmen yo. Li vle pwoteje yo kont sa ki mal, epi Li vle pou yo mennen yon bél lavi. Ou dwe korije pitit ou pou menm rezon sa yo.

KOREKSYON GEN TWA (3) PATI LADAN L' :

1. ENSTRIKSYON Asire pitit la byen konnen sa l' ka fè ak sa l' pa ka fè. Si l' gen ase lespri, asire li konn poukisa tou.

2. AVÈTISMAN Si pitit la pa obeyi, pale avè l'. Fè l' konnen pral gen yon konsekans si l' pa obeyi.

3. KONSEKANS Pa franchi etap sa a si w' poko pase nan premye de (2) etap yo. Konsekans la kapab plizyè bagay. Petèt ou va revoke yon dwa pitit ou te gen. Oubyen, ou kapab mande pitit la fè yon travay li pa renmen fè. Konsekans lan dwe mache avèk dezobeyisans lan. Sa vle di, konsekans la pa dwe twò gwo si ofans lan piti.

MEN KÈK PRENSIP POU W' SWIV LÈ W'AP KORIJE PITIT OU :

1. Pa fè kòlè. Fòk pitit la santi ou renmen l'. Yon paran ki ankòlè va rann pitit li fè kòlè tou (gade Efezyen 6.4).

2. Pa joure pitit ou dezòd. Ou kapab fè konnen aksyon pitit la poze a pa bon, men pa fè pitit la santi se li menm ki pa bon.

3. Kenbe l' sekrè. Si ou korije pitit ou devan lòt moun, li pral panse avèk lòt moun yo plis pase pou l' panse ak sa l' fè ki pa bon an.

4. Itilize yon pinisyon ki koresponn avèk dezobeyisans lan. Petèt ou kapab defann pitit la fè yon bagay li renmen fè jiskaske li konprann dezobeyisans pote konsekans. Yon lòt pinisyon ki kapab bon pafwa se pou defann pitit la jwe avèk lòt timoun, oubyen avèk tèl jwèt pou yon tan byen detèmine (pa egzanp, yon semenn konsa).

5. Soulaje pitit la lè w' fin korije l'. Kenbe yo, oubyen manyen yo avèk lamou.

6. Priye avèk pitit la sou pwoblèm la ak sou avni li.

7. Toujou retejis epi konstan. Si w' korije pitit la pou tèl bagay jodi a, men denmen ou pa korije l' pou menm aksyon an, sa rann pitit la manke konprann. Pitit yo santi yo plis an sekirite lè l' konprann kisa pou l' fè.

PWOVÈB 6.20-23, 19.18 ; EBRE 12.5-8 ; PWOVÈB 22.6, 23.13-14

PASKE SENYÈ A KORIJE MOUN LI RENMEN, MENM JAN YON PAPA KORIJE PITIT LI RENMEN ANPIL LA. (PWOVÈB 3.12)

ANN GADE LAVI A

Jan te di pitit fi li pinga li manje sirèt anvan yo te soupe. Lè l' te antre nan kay la, li te wè l' ap veye sache sirèt la. Jan te fè l' konnen tapral gen konsekans si l' ta al' ladan l'. Pita konsa, sache a te vid epi tifi a t'ap manje yon bagay. Lè Jan te mande l' si l'ap manje sirèt, tifi a te di : « Non ! » Men apre yo te fè yon ti pale ansanm, tifi a te vin admèt li te manje sirèt yo.

Jan te mennen tifi a nan chanm li. Pandan tifi a te chita sou jenou li, Jan te fè l' sonje ki konsekans yo te gentan etabli depi semenn pase pou yon manti. Tifi a tapral oblige chita nan chanm li pandan inèdtan. Poutan, lòt timoun yo t'ap lib pou y'al jwe deyò a. Tifi a te kriye anpil, men Jan te rete la avè l' jiskaske tifi a te soulaje. Apre sa, li te kite tifi a nan chanm lan epi te sòti. Apre yon inèdtan, Jan te tounen nan chanm lan. Li te mete tifi a chita ankò epi te priye avè l' pou Bondye te ka ede l' toujou rete obeyisan pandan rès jounen an. Lèfini, tifi a te sòti pou l' al' jwe.


**Korije pitit ou yo
poutèt renmen ou
genyen pou yo.**

**Koreksyon gen twa (3)
pati :**

- enstriksyon
- avètismans
- konsekans

Lè w'ap korije yo :

- pa fè kòlè
- aji avèk jistis
- pa joure yo dezòd
- kenbe l' sekrè
- soulaje yo lèfini
- priye



Etid Pou Mesye Marye : Relasyon Papa Avèk Pitit

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 32

FASON TIBEBE Yo FÈ FÈT

Bi LESON AN : Pou aprann kèk fason yon papa kapab anseye pitit li sou zafè seksyèl.

Vèsè Kle :

- Sòm 139.13-14** Se _____ ki te fè kò ou. Tout sa Bondye fè yo _____ , menm pati prive nou yo.
- Tit 1.15-16** Si pou lavi w' rete pwòp, sa vle di san peche, fòk _____ w' rete pwòp tou.
- 1 Korent 6.19-20** Kò yon Kretyen se yon kay kote _____ abite. Konsa, ou dwe itilize l' _____ .
- 1 Tesalonisyen 4.3** Bondye vle pou w' sen epi pou w' rete lwen _____ .
- Jenèz 39.6-10** Malgre li te yon jèn gason ki patko marye, _____ pa t' chwazi sede anba tantasyon seksyèl.

Devwa Pou W' Fè



Pou Kont Ou

Mande Bondye pou l' ede w' bati yon plan pou kijan ou kapab anseye pitit ou yo sou zafè seksyalite.



Avèk Madanm Ou

Pale avèk madanm ou sou plan an, epi chache kèk fason li kapab ede w' anseye timoun yo tou.

Avèk Pitit Ou

Kòmanse pale avèk pitit ou yo sou zafè seksyalite menm depi avan yo kòmanse fòme. Travay ansanm kòm manman avèk papa pou chache kèk bon liv, epi pou anseye timoun yo yon fason pou yo kapab konprann kwasans. Ede yo santi yo alèz avèk jan Bondye te fè yo a.

FASON TIBEBE YO FÈ FÈT

Lesson 32

Timoun yo bezwen, epi anvi jwenn dirèksyon nan zafè seksyalite avèk kwasans. Sa se yon si gwo pati nan lavi yo. Kalite ansèyman sa yo vrèman enpòtan, sitou lè timoun yo rive nan laj kwasans kote kò yo ap devlope. Men menm anvan sa, fòk paran yo devlope bon atitud lakay timoun lan. Lèfini, yo bezwen devlope bon jan dyalòg avèk timoun yo sou zafè seksyalite tou. Timoun yo pral devlope anpil move konsèpsyon konsènan zafè seks pamwayen liv, pibliste, televizyon, fim, avèk mizik. Se sa k' fè li vrèman enpòtan pou papa yo bay pitit yo verite sou sijè sa yo :

- kòman tibebe konn fèt ak chanjman yo nan laj kwasans
- prensip Bondye yo sou zafè seksyèl
- bon fason pou jwenn epi chwazi yon madanm ou mari
- pran dezisyon pou yo pa peche seksyèlman

FÈ SÈKS DEVNI YON SIJÈ NOU KONN PALE ANSANM ALÈZ. Pa fè kòmsi sèks se yon move bagay ki dwe kache epi ki fè moun wont. Reponn kesyon pitit ou yo onètman yon fason ki senp. Fè yo abitye avèk vrè non pati prive yo. Toujou kenbe yon atitud respè lè n'ap pale sou sèks. Pa fè blag sou zafè sèks ditou.

PALE ANSANM SOU PRENSIP BONDYE YO NAN ZAFÈ SÈKS. Montre pitit ou yo kòman Bib la pale souvan sou sijè sa a. Fè yo konnen Bondye te etabli prensip sa yo yon fason pou yo pa sibi onivo sijè sa a.

KREYE KÈK OPÒTINITE ESPESYAL POU ANSEYE YO. Lè timoun yo antre nan kwasans, pale avèk yo sou chanjman k'ap fèt nan kò yo. Si madanm ou ansent, fè timoun yo konnen kijan tibebe a fè devlope nan vant madanm ou. Sanble kèk gason ak kèk jèn gason (ant dis [10] pou kenzan) epi fè yon ti konferans espesyal avèk yo. Chache yon kote pou pase detwa jou ansanm. Tcheke yon anseyan pou vin pale avèk nou si nou vle. Mete yon tan apa pou pale avèk chak pitit ou konsènan chanjman k'ap fèt lakay li.

FÈ RENMEN OU GEN POU MADANM OU SÈVI YON BON EGZANP. Montre jantiyès, tandrè, avèk renmen devan pitit ou nan fason aji avèk madanm ou. Konsa, y'ap konprann kòman yon bon relasyon gason ak fi dwe mache.

PWOVÈB CHAPIT 5 AK CHAPIT 6 ; WOMEN 6.12–13 ; EFEZYEN 5.3–5

M'AP FÈ LWANJ OU, PASKE OU PA MANKE FÈ BÈL BAGAY. TOU SA OU FÈ SE BÈL BAGAY. MWEN KONN SA BYEN. (SÒM 139.14)

ANN GADE LAVI A

Gen anpil papa ki pa pale avèk pitit yo sou zafè sèks paske yo santi yo manke fòmasyon. Olye pou n' bay yon istwa nan lesoun sa a, nou vle fè ou konnen gen kèk liv ki kapab ede fòme w' yon fason pou w' kapab pale avèk pitit ou sou sijè sa a pi byen :

Etid pou Jèn yo se yon etid nan menm seri sa a ki kapab ede w' fè kèk etid ansanm avèk jèn ou yo.

Pwòpte Moral se yon liv ki montre nou kòman pou nou jwi pwòpte moral nan lavi nou chak jou.

Pyèj Malpwòpte Seksyèl la se yon ti bwochi ki montre nou kòman imoralite se yon pyèj dyab la tann pou kretyen yo.

Si w' ta renmen jwenn youn nan ti liv sa yo, ou kapab kontakte nimewo 4690-7362, oubyen voye yon imel nan *livkretyen@gmail.com*.


Timoun yo bezwen konnen :

- **kòman kò a devlope**
- **prensip Bondye yo**
- **kijan pou kenbe pwòpte moral yo**
- **kijan pou chwazi yon madanm oubyen yon mari**

Sèks ta dwe yon sijè ki natirèl epi ki fasil pou abòde.

Twouve kisa Bondye gen pou di sou zafè sèks.

Pran devan—pa chita tann pou yo poze ou kesyon.



Etid Pou Mesye Marye : Relasyon Papa Avèk Pitit

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 33

BON KONPRANN POU JÈN YO

BI LESON AN : Pou konsidere kèk pwen bon konprann pou jèn yo dapre Bib la.

Vèsè Kle :

- EKLEZYAS 12.1** Sa bon pou w' pa blyie _____ pandan ou _____.
- 2 Kwonik 34.1-3** Ki laj Jozyas te gen lè l' te kòmanse chache Bondye ? _____
- Pwovèb 20.29** Pandan yon gason jèn, se _____ ki fè valè li.
- 2 Timote 2.22** Timote se te disip Apòt Pòl, epi Apòt Pòl te di li pou l' rete lwen _____ epi pou l' chache _____.
- Sòm 119.9** Sa vrèman enpòtan pou jèn yo viv selon _____ Bondye, yon fason pou lavi yo kapab rete pwòp.

Devwa Pou W' Fè



Pou Kont Ou

Pale avèk lòt paran ki pi gran pase w' ki gentan leve kèk jèn ki fin devni bon jan Kretyen vivan. Chache konprann sa k' fè yo te reyisi.



Avèk Madanm Ou

Pale ansanm sou kijan nou te santi, ak kijan nou te aji lè nou te jèn. Sa kapab ede w' konprann pwòp pitit pa ou yo pi byen.

Avèk Pitit Ou

Pran yon ti tan pou w' pale avèk chak jèn ou yo apa. Pale sou nenpòt sa ki nan lide yo.

Bon Konprann Pou Jèn Yo

Lesson 33

Gen pafwa paran yo tranble devan lè timoun yo ap devni jèn. Gen yon afè « rebelyon » ak « pèdi jèn yo » ki rann nou pè. Li sanble komsi laj jèn yo se yon lè konfli l'ap ye menm. Se vrè, bagay yo ka pa fasil, men gen anpil travay ou kapab fè pou rann li mache pi byen.

1. Fason ou konprann jèn yo gen anpil enpòtans.

A. Yon Jèn :

- Se yon granmoun ki nan wout pou l' fèt
- Nan yon pozisyon antrede. Yo pa timoun ankò, men yo poko granmoun tou.
- Ap bat pou l' reskonsab tèt li, pou l' pa rete sou kont granmoun ankò.
- Plen enèji ak vigè, epi sa mande fòk pran yo dirije enèji sa a.
- Se yon zanno ofèv la ap travay pou fè l' bèl nèt.

2. Sa bon tou si nou kapab sonje ki kalite presyon yon jèn rankontre.

B. Presyon Jèn yo Sibi :

- Presyon pou yo sanble avèk kanmarad yo—presyon sa a pi fò pandan yon moun jèn.
- Relasyon gason ak fi—jèn yo ap devlope seksyèlman epi yo kòmanse anvi koze youn ak lòt.
- Yo kòmanse reflechi sou yon metye ak yon dyòb.
- Yo anvi chwazi sa yo kwè ak sa ki gen valè pou yo.
- Yo anvi jwenn libète pou yo deside pou kont yo.

3. Men kèk bagay ki kapab ede w' travèse lanne difisil sa yo :

- Kòmanse depi toupiti—Bati bon jan relasyon pwòch kòm yon fanmi, anvan menm timoun lan devni yon jèn. Esplike zafè kwasans la pou yo anvan yo pase ladan l'. Ede l' santi li alèz kòm yon timoun nan fwaye a.
- Toujou dyaloge—Pa sispann, menmlè sa pa fasil.
- Toujou koute—Jèn yo ap kòmanse reflechi pou tèt pa yo. Mete w' nan pozisyon pou w' aprann yon bagay nan men yo.
- Pa brinnen nan konviksyon ou—Jèn yo va pase w' nan eprèv, men yo santi yo plis ansekirite lè w' pa brinnen pase lè ou vasiye. Kanpe djanm san ou pa fè tèt di.
- Bay renmen ak akèy a gogo. Pa antann pou yo fè menm jan avè w'. Fè yo santi w'ap toujou renmen yo kèlkeswa sa k' rive yo. Eseye aji avèk jèn lan menm jan Bondye aji avèk li. Sonje byen, lè yon timoun santi papa l' renmen l', lè sa a l'ap anvi fè papa a plezi tou (Efezyen 5.1–2).

PA KITE PÈSONN PASE OU NAN BETIZ PASKE OU TWÒ JENN. MEN, SE POU OU TOUNEN YON EGZANP POU MOUN KI KWÈ YO...NAN JAN W'AP MENNEN YON LAVI KI DAKÒ AK VOLONTE BONDYE. (1 TIMOTE 4.12)

ANN GADE LAVI A

Wolan ak madanm li te gen yon jèn tifi katòz (14) an ki te rele Vivyàn. Yon bèl sware, apre yo te fin kouche, paran yo te tande Vivyàn ap kriye. Wolan ak madanm li te al' bò kote l' epi te mande l' sa l' te genyen.

Vivyàn te di konsa : « Ou toujou di m' gen yon Bondye, men kòman m' ka konn sa toutbonvre ? »

Wolan pa t' moute sou li. Okontrè, li te pran pasyans epi te esplike Vivyàn sa Bib la di sou Bondye. Wolan te fè l' sonje tout priyè yo Bondye te gentan reponn pou yo, ak tout bèl fason yo te wè Bondye te travay nan lavi lòt moun tou. Apre sa, yo te pale sou kèk lòt dout Vivyàn te genyen tou. Lèfini, yo te priye ansanm.

Konsa, Vivyàn te vin konnen li te ka pale avèk paran l' sou tout sijè nèt.

Yon jèn se yon granmoun ki nan wout pou l' fèt.

Presyon jèn yo sibi :

- presyon kanmarad
- dezi seksyèl
- avni a
- lafwa pèsònèl yo
- libète
- desizyon

Jèn yo bezwen yon bon relasyon solid avèk papa a :

- relasyon ki pwòch
- santi yo alèz
- renmen ak akèy
- konviksyon
- koute epi pale



Etid Pou Mesye Marye : Relasyon Papa Avèk Pitit

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 34


BON ZANMI

BI LESON AN : Pou montre ki enpòtans sa gen pou fè bon kalite zanmi.

Vèsè Kle :



- Pwovèb 17.17** Yon vrè zanmi p'ap janm _____ ou. Okontré, l'ap tankou yon _____.
- Pwovèb 27.10** Sa pa bon pou w' _____ yon zanmi.
- 1 Samyèl 18.3** Jonatan te renmen David tankou _____.
- Pwovèb 13.20** Lè ou fè zanmi ak moun ki gen konprann, se konsa w'ap _____.
- Jak 4.4** Sa pa bon pou w' fè zanmi ak yon payen, paske yon moun ki fè zanmi ak payen yo se _____.

Devwa Pou W' Fè



Pou Kont Ou

Si ou pa gentan fè zanmi ak yon lòt mesye ki vrèman respektab, mande Bondye pou L' ede w' devlope yon zanmitay konsa, yon fason pou w' kapab pataje kèk bagay enpòtan ansanm avè l'.



Avèk Madanm Ou

Asire madanm ou jwenn tan pou l' devlope zanmitay ak lòt medam.

Avèk Pitit Ou

Palè avèk pitit ou yo sou kijan sa vrèman enpòtan pou fè kèk bon zanmi. Si ou kapab ede yo fè sa, pa neglige. Mennen yo kèk kote kote yo kapab kontre ak kèk lòt bon jenn pou yo kapab gen bon zanmi.

Gen yon pwovèb ki di gen zanmi ki pi pwòch, epi pi fidèl, pase yon frè. Pwovèb sa a montre nou kòman yon bon zanmitay ale lwen. Zanmi yo vrèman enfliyanse youn lòt. Ou kapab enfliyanse zanmi ou, epi zanmi w' kapab enfliyanse ou tou.

Pou yon fanmi rete ansante, fòk papa yo sansib pou afè zanmitay. Premyeman, fò l' gen zanmi pou tèt pa l'. Sa vrèman bon lè yon gason gen yon lòt gason kòm bon zanmi li. Sa enpòtan pou yon mesye marye gen yon lòt zanmi pase madanm li sèlman pou l' pataje gwo evènman ki rive nan lavi li.

Aprè sa, yon papa dwe dirije fanmi li pou yo kapab fè zanmi ak kèk lòt fanmi. Fanmi yo gen anpil bagay yo kapab fè ansanm. Yo kapab manje ansanm, fè yon ti sòti ansanm, al' travay ansanm, epi menm jwe ansanm. Fanmi yo kapab aprann anpil bagay nan men youn lòt. Yo kapab ankouraje youn lòt. Lè yon timoun santi kanmarad li yo ap pouse l' pou l' fè sa k' pa bon, sa ede l' anpil pou l' wè lòt fanmi ki pataje menm kwayans ak fanmi pa l' la.

Finalman, yon papa dwe ede pitit li yo fè zanmi. Papa yo dwe fè efò pou twouve ak kilès pitit li fè zanmi. Yo dwe fè efò pou envite zanmi yo vin lakay. Li dwe pale avèk yo epi chache konnen plis sou lavi yo.

Konsa, ou kapab dirije chwa pitit ou ap fè nan afè zanmi. Konsa tou, ou kapab kontribye yon bon enfliyans nan lavi zanmi sa yo. Fè efò pou mennen pitit ou kèk kote kote yo kapab fè bon zanmi. Mennen yo nan konferans legliz, seminè, gwoup jenn, epi mete yo nan yon lekòl kretyen. Pandan pitit ou nan laj jenn, se zanmi l' yo ki pral egzeze plis enfliyans sou li. Yon papa ki saj va fè tout sa k' posib pou enfliyans sa a kapab yon bon enfliyans.

Zanmi ou yo kapab menm rive chanje direksyon lavi w'.

Mete anpil anfaz sou
zanmitay sa yo :

- **zanmi pa ou yo**
- **zanmi fanmi ou yo**
- **zanmi pitit ou yo**

LÈ YON ZANMI AP RALE ZÒRÈY OU, SE BYEN OU LI VLE WÈ... (Pwovèb 27.6)

ANN GADE LAVI A

Wobè te gen setan. Fanmi li te vin achte yon kay epi te bwote ale nan yon lòt zòn. Wobè pa t' vle kite ansyen zòn lan. Li te fè papa l' konnen li pa t' vle kite zanmi li yo. Papa l' te fè l' konnen tout bagay t'ap mache kanmenm. Li te di Wobè li tapral fè zanmi nan nouvo zòn lan tou.

Yon jou swa, apre yo te fin bwote, papa Wobè te wè Wobè t'ap chita sou galeri a. Sanble ti gason an te tris e chagren. Papa Wobè te mande l' sa l'ap fè. Wobè te reponn : « M'ap tann pou tout nouvo zanmi yo vin jwenn mwen. »

Papa Wobè te fè Wobè konnen se sòti li t'ap oblige sòti pou l' al' chache kèk zanmi. Li te di l' se lè l' fè zanmi ak lòt tigason, se lè sa a li t'ap gen zanmi.



Etid Pou Mesye Marye : Relasyon Papa Avèk Pitit

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 35

EDIKASYON

BI LESON AN : Pou aprann sa ki vrèman enpòtan nan edikasyon yon timoun.

Vèsè Kle :


- EFEZYEN 6.4** Papa yo dwe anseye timoun yo pandan y'ap grandi. Kòman li dwe fè sa ? _____
- Pwovèb 22.3** Si ou byen anseye yon timoun pandan li piti, kisa k'ap rive lè l' fin gran ? _____
- Lik 2.52** Edikasyon Jezi a te rann Li t'ap devlope, t'ap gen plis lespri, epi t'ap aji yon jan ki te fè ni _____, ni _____ plezi.
- Pwovèb 2.6** Konesans, lespri, ak konprann sòti nan _____ .
- 2 Pyè 3.18** _____ fè pati yon bon edikasyon pou pitit ou yo.

Devwa Pou W' Fè



Pou Kont Ou

Fè yon lis tout metye, prensip, atitud, karaktè, ak konesans ou ta renmen pou pitit ou yo aprann nan edikasyon yo. Etid biblik sa a kapab ede w' fè sa.



Avèk Madanm Ou

Pran lis ou te fè a, epi mache avè l' pandan ou al' vizite salklas timoun ou yo. Pale avèk pwofesè a tou. Èske gen kèk fòmasyon pitit la pa jwenn nan lekòl la ? Chache kèk fason nou kapab ranpli vid sa yo lakay.

Avèk Pitit Ou

Pale souvan avèk pitit ou yo sou sa y'ap aprann nan lekòl la. Li nan liv klas timoun ou yo. Gade devwa y'ap fè yo. Lèfini, ankouraje yo pou bèl efò, bon atitud, ak bon nòt yo fè yo.

Bi yon paran dwe genyen pou edikasyon se pou devlope bon karaktè lakay pitit li. Si ou mete pitit ou lekòl, fòk ou asire lekòl la pa detwi kwayans ou, moral ou, ak bi ou yo. Fòk ou konnen kilès k'ap anseye pitit ou paske kwayans ak karaktè pwofesè a va pote yon gwo enfilyans sou pitit ou. Fòk ou konnen sa y'ap anseye nan lekòl la : Èske li ann akò avèk sa Bib la anseye ? Plis pase sa, fòk ou asire lekòl la pa pran plas ak otorite yon papa nan lavi pitit ou yo.

Sa pa fè sans pou yon paran mete pitit li nan yon lekòl san l' pa konnen sa lekòl la ap anseye yo. Sa toujou pi bon si paran yo kapab annafè avèk pwosesis edikasyon an. Men kèk fason yon paran kapab fè sa :

FÈ KONESANS AK PWOFESÈ YO. Chache konnen sa yo kwè ak ki moral yo genyen. Envite yo vin lakay ou. Fè yo konpliman lè yo travay byen.

REPONN PREZAN NAN REYINYON LEKÒL YO. Pataje opinyon pa ou. Ou kapab ede lekòl la pran kèk bon desizyon.

PRAN KOPI ORÈ YO AK KALANDRIYE LEKÒL LA. Chache konnen sa k'ap pase lekòl la. Si gen kèk matyè oubyen kèk aktivite ou santi k'ap pote yon move enflyians sou pitit ou, pale avèk reskonsab lekòl la sou sa.

BAY KOUT MEN. Dispoze w' pou w' sèvi nan komite lekòl la. Chache bay kout men nan aktivite lekòl yo. Pote yon bon enflyians nan lekòl la.

GADE LIV PITIT OU YO. Chache konnen sa pitit ou ap aprann.

RANN VIZIT NAN LEKÒL LA. Mande administratè a ak pwofesè a pèmision anvan.

ANSEYE RESPÈ. Si pitit ou kritike pwofesè a, oubyen si l' tonbe anba disiplin nan lekòl la, pale avèk pwofesè a anvan ou kouri apiye pitit ou. Pwofesè yo kapab travay pi byen si yo jwenn sipò ni paran yo, ni elèv yo tou.

ANVI APRANN POU TÈT PA OU. Mande pitit ou pou montre ou devwa y'ap fè yo. Mete ou sou sa y'ap aprann.

SE NAN LI TOUT RICHÈS KI NAN BON KONPRANN AK KONESANS BONDYE A KACHE.
(KOLOSYEN 2.3)

ANN GADE LAVI A

Toma gentan fè netwayaj nan Lekòl Kominotè Bon Jaden depi ventan. Men sa l' di sou chanjman yo ki te pote nan lekòl la :

« Lè m' te kòmanse travay isi a, se te yon lekòl anba pay. Sa pa t' mande anpil tan menm pou netwaye lekòl la epi chache bwa chak jou. Jounen jodi a, gen ven (20) salklas. Kounyeya m'ap travay anplantan epi gen yon moun k'ap ede m' tou. Edikasyon vin devni yon gwo bagay pou nou. Lontan te sèlman genyen douz (12) elèv ki te rive nan lekòl segondè. Jounen jodi a, gen anpil timoun ki ale lavil pou chache yon pi gwo nivo. Gen sa ki nan lekòl segondè, gen sa ki nan inivèsite. Anpil nan moun sa yo tou rete lavil paske yo jwenn djòb. Gen lòt k'ap plede mache pasipala. Bagay yo vin chanje nèt. Kisa pwochèn kenz (15) ane yo va pote ? »

Edikasyon fòme lespri yon timoun.

Edikasyon dwe konstwi
bon jan konviksyon ki
kòrèk.

Lekòl la pa dwe pran
otorite final la nan men
yon papa.


Konnen pwofesè pitit ou
yo.

Poze kesyon sou aktivite
ou pa renmen oubyen pa
konprann.

Eseye antre nan aktivite
lekòl yo.

Respekte pwofesè yo.

Devlope yon dezi pou w'
aprann pou tèt pa ou.



Etid Pou Mesye Marye : Relasyon Papa Avèk Pitit

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 36

Ewo TIMOUN yo

BI LESON AN : Pou ede papa yo wè kisa yon bon ewo kapab fè pou pitit li.

Vèsè Kle :



- 1 Wa 9.4-5** Senyè a te di Salomon pou li _____ menm jan papa li te fè sa avèk _____. Bondye te pwomèt pou Li toujou mete youn nan pitit li yo gouvènè peyi Izrayèl la depi Salomon ta toujou obeyi Li.
- 2 Timote 1.5** Se te _____ ak _____ Timote ki te enfliyanse li.
- Filipyen 2.5-11** Pi bèl egzanz yon timoun kapab swiv sòti nan _____.
- 2 Pyè 2.18-19** Bay jèn yo avètisman pou yo pa swiv moun k'ap pale bèl pawòl epi k'ap pwomèt yo _____ poutan yo se esklav pou tèt pa yo.
- 1 Timote 4.12** Menm yon jèn kapab sèvi kòm yon ewo, oubyen yon egzanz, nan fason li _____
_____.

Devwa Pou W' Fè



Pou Kont Ou

Chache yon foto Jezikris. Mete foto pa ou sou foto Jezi a. Eseye mete w' tankou Jezi.



Avèk Madanm Ou

Pale ansanm sou ki kalite moun ou ta renmen pou pitit ou imite. Chache reyini avèk menm moun sa yo lè pitit ou preznan pou yo kapab abitye avèk yo epi pou yo kapab fè konesans youn ak lòt.

Avèk Pitit Ou

Mande pou yo ekri non twa (3) moun yo admire ki pa fè pati fanmi an. Mande yo sa k' fè yo admire moun sa yo. Mande yo si yo panse Jezi t'ap renmen brase ak moun sa yo nan sa y'ap fè.

Ewo TIMOUN YO

Lesson 36

Yon jèn gason trèzan te vin gen yon abitid ki te dwòl. Tout jounen, kelkeswa kote li te pase, li t'ap plede fè Tonton Palmis. Manman li pa t' konprann poukisa li t'ap fè sa. Lè manman an te mande li, ti gason an te fè l' konnen te gen youn nan pwofesè li yo ki te yon gwo jwè, epi se sa li te abitye fè tou. Ti gason an te anvi devni menm jan ak pwofesè sa a, epi se sa k' fè li t'ap plede fè Tonton Palmis tout jounen.

Nou tout conn imite lòt moun pafwa, sa nan san nou. Yon ewo vrèman empòtan pou yon timoun paske l'ap chache konpran lavi a. Pou yo menm, yon ewo se yon moun ki konprann lavi a. Pifò nan sa yon timoun fè sòti nan dezi li genyen an pou l' sanbe ewo li. Nou ka wè sa nan abiman yo, foto yo, langaj yo, atitud yo, ak kwayans yo tou. Se sa ki fè yon timoun dwe brase plis avèk lòt moun ki kretyen. Sa bay yo chans pou yo chwazi yon bon ewo.

KIYÈS TIMOUN YO ADMIRE ? Yo te fè yon etid avèk elèv lekòl yo, kote yo te mande elèv yo kiyès yo te admire plis. Men lis moun yo te plis site. Sa yo te site plis w'ap jwenn yo nan tèt lis la :

- fanmi, tankou : paran, pi gran frè ak pi gran sè, granparan
- zanmi : lòt timoun menm laj avèk yo ki popilè
- pwofesè
- moun ki popilè, tankou : aktè, chantè, ak jwè

FÈ KONESANS AK EWO KRETYEN. Timoun yo bezwen egzant kèk bon Kretyen yo kapab admire epi imite. Yon papa dwe chache fason pou pitit li kapab fè konesans ak kèk lidè kretyen, oubyen lòt Kretyen ki djanm, ki kapab sèvi ewo pou yo. Gen kèk bon liv ki ekri sou kèk Kretyen, epi liv sa yo kapab ede pitit ou yo chwazi yon bon ewo. Men sa ki pi empòtan, yon papa dwe sèvi yon bon egzant, yon ewo kretyen, ak yon bèl egzant vivan pou pitit li kapab swiv.

1 KORENT 4.16 ; EBRE 13.7 ; 2 TESALONISYEN 3.7

**Timoun eseye devni
tankou ewo yo.**

**Timoun yo panse ewo yo
vrèman konnen kòman
yo dwe viv.**

Timoun admire :

- fanmi
- zanmi
- pwofesè
- moun ki popilè

**Yon timoun bezwen kèk
ewo kretyen. Papa a dwe
sèvi yon ewo konsa pou
pitit li.**

**...PRAN EGZANT SOU MWEN. KENBE JE NOU FIKSE SOU MOUN K'AP SWIV EGZANT MWEN
TE BAY LA. (FILIPYEN 3.17)**

ANN GADE LAVI A

Yon jou, anvan manje a te fin kwit, Krismon t'ap maltrete ti frè l' la. Papa Krismon te di l' pou l' ret nan wòl li, men Krismon pa t' okipe l' ditou. Apre yon titan, papa Krismon te ennève epi te ba l' yon kalòt nan figi l'.

Pandan yo t'ap manje, Krismon pa t' di anyen menm, epi li te chagren anpil. Apre yo te fin manje, papa a te vin santi li te mal aji avèk Krismon, epi li te al' mande l' eskiz. Touswit, Krismon te vin pi kontan. Konsa, papa l' te jwenn chans pou pale avè l' tou sou fason li t'ap malmennen ti frè l' la.

Krismon te al' mande ti frè l' la eskiz. Li te wè egzant papa a, epi li te tou prèt pou l' swiv li tou.



Etid Pou Mesye Marye : Relasyon Papa Avèk Pitit

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 37

MIZIK

BI LESON AN : Pou ede papa yo chwazi bon jan mizik pou fwaye yo.

Vèsè Kle :

1. **EFEZYEN 5.19** Ki kalite chan yon Kretyen dwe chante ? _____
2. **Sòm 149.1-3** Bon mizik se pou _____.
3. **1 Samyèl 16.23** Bon mizik David te jwe a te rann Sayil _____.
4. **1 Kwonik 25.5-6** Eyman te dirije pitit li pou yo _____ nan Tamp Bondye a.
5. **Filipyen 4.8** Pawòl ki dwe ranpli lespri yon kwayan se pawòl ki _____,
_____, _____, _____,
_____, _____, _____.
Pawòl chan nou koute yo dwe konsa tou.

Devwa Pou W' Fè



Pou Kont Ou

Byen gade mizik fanmi ou ap koute a. Èske li mache dapre prensip yo ki nan Filipyen 4.8 ?



Avèk Madanm Ou

Achte yon CD pou madanm ou. Chwazi gwoup kretyen li pi renmen an.

Avèk Pitit Ou

Koute mizik yo pi renmen an ansanm avèk yo. Lèfini, pale ansanm sou mizik la. Mande yo si lafwa yo ak lajwa yo ap ranfòse pamwayen mizik sa a.

Kisa ki rele « bon » mizik ? Kòman ou kapab konnen lè yon mizik « bon » ?

Gen anpil moun ki di konsa : « Depi ou renmen l', li bon. » Gen lòt moun k'ap di : « Sa sa fè si l' bon ak si l' pa bon ? »

Fè atansyan, paske mizik se yon bagay ki vrèman pisan ! Li kapab kontwole aksyon ou yo. Li kapab mete bon lide nan tèt ou. Konsa tou, li kapab mete move lide nan tèt ou tou. Li kapab pouse ou fè bon bagay, epi li kapab pouse ou fè move bagay tou. Lè Bondye te kreye mizik, Li te kreye l' kòm yon bon bagay. Men, lè Satan mele nan afè mizik, li rann li devni yon move bagay.

MIZIK BONDYE

Li vrè. Li respektab. Li pi. Li bèl. Li pa fè moun wont. Li se yon bagay ki merite lwanj (Filipyen 4.8)

Li espirityèl, epi li fè lafwa ou ogmante. Li ogmante lajwa ou, lapè ou, pasyans ou, bonte ou, ak tanperans ou tou (Galat 5.22-23)

Li pale Jezi byen, epi li egzalte Li (Kolosyen 3.16)

Li se yon chan « tounèf » (Sòm 40.3, 149.1)

MIZIK LEMONN

Li ranpli ak dezi lachè, ak tout sa ou wè, ak sa ou anvi posede. Li plen ak awogans lavi a tou (1 Jan 2.16)

Li chanèl epi li rann ou pi fache. Li gate santiman ou yo, epi li rann ou pale, epi aji yon fason ki blese lòt moun (Efezyen 4.31)

Li vante tèt li, li pleyen, li flate (Jid 16)

Se toujou menm vye ide yo, menmsi yo prezante ak yon nouvo rit (Eklezyas 1.9-10)

Lè ou fin li vèsè sa yo, mande Bondye pou L' ede w' konprann ki mizik ki fè L' plezi ak ki mizik ki pa fè L' plezi tou. Satan ap toujou bat pou l' fofile vye mizik antre nan fwaye ou. L'ap fò e difisil pou w' wete tout vye tras sa yo nan fwaye ou, men mete gason sou ou. Bondye va ede ou.

Mizik aji sou jan ou reflechi.

Mizik aji sou sa ou fè.

Mizik aji sou nanm ou.

Bon mizik ogmante lafwa ou ak lajwa ou.

Bon mizik egzalte Kris.


Bondye kapab ede ou genyen batay la kont move mizik.

CHANTE YON CHANTE TOU NÈF POU LI. WI, JWE BÈL MIZIK, CHANTE BYEN FÒ. (SÒM 33.3)

ANN GADE LAVI A

Kou pitit Jozèf yo te kòmanse fè kòb, yo te kòmanse achte yon bann mizik. Gen nan mizik yo te achte yo, se konpa yo te ye. Jozèf te kòmanse remake kèk chanjanan nan atitud ak aksyon timoun yo. Jozèf te al' mande pastè a yon ti konsèy. Li te fè yon ti rechech sou zafè konpa a, epi te vin wè kalite mizik sa yo pa t' bon menm.

Apre Jozèf te pase yon tan ap priye sou sa, li te reyini fanmi an. Li te pale avèk yo, epi te montre yo sa li te aprann sou zafè konpa. Pou kòmanse, timoun yo pa t' dakò avè l' menm. Men, apre detwa jou, yo te vin wè sa papa te di a te yon reyalite. Konsa, yo te tonbe dakò pou yo jete vye mizik sa yo, epi mete pi bon mizik nan plas li.



Etid Pou Mesye Marye : Relasyon Papa Avèk Pitit

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 38

Sa Ki Pouse Timoun yo Rebèl

Bi LESON AN : Pou aprann poukisa timoun renmen fè rebèl.

Vèsè Kle :


- EFEZYEN 6.4** Fason papa yo aji avèk timoun yo kapab rann yo _____.
- Detewonòm 21.18** Yon timoun k'ap fè rebèl p'ap dakò pou l' obeyi paran l' yo, menm lè yo _____.
- 1 Samyèl 15.53** Bondye rayi rebelyon. Li te di rebelyon se menm bagay ak _____.
- Sòm 78.5-8** Rebelyon se yon bagay nou aprann nan men youn lòt. Se sa k' fè, li vrèman enpòtan pou yon papa _____ pitit yo sou lalwa Bondye a.
- Ezekyèl 12.4-5** Rebelyon se yon chwa. Menm lè yon moun jwenn bon levasyon, fòk li toujou chwazi si l'ap _____ ou non.

Devwa Pou W' Fè



Pou Kont Ou

Sonde kè ou. Mande Bondye pou L' montre ou si ou gen menm yon gress santiman rebelyon nan kè ou, swa kont Li, oubyen swa kont yon lòt moun. Mande Bondye pou L' chase rebelyon sa a nan lavi ou yon fason pou pitit ou yo pa aprann li nan men ou.



Avèk Madanm Ou

Pale ansanm sou lis bagay yo ki nan lesон an ki kapab rann pitit ou yo fè rebèl. Gade pou wè si nou koupab sou pwen sa yo.

Avèk Pitit Ou

Souvan, rebelyon parèt akòz yon echèk yon timoun sibi, oubyen akòz santiman l' ki te brize. Bay pitit ou yo chans pou yo pale w' sou nenpòt bagay konsa ki rive nan lavi pa yo.

SA KI POUSE TIMOUN YO REBÈL

Lesson 38

Anpil papa tonbe fè kòlè lè ptit yo fè rebèl. Yo gentan fè anpil pou ptit yo, epi kounyea, se rebèl timoun lan ap rebèl senp. Se sa k' fè, pafwa yo reyaji avèk kòlè, epi eseye korije yo tou ankòlè tou. Se vre, lè yon timoun fè rebèl, ou dwe korije l'. Men, si ou fè sa ak kòlè, oubyen yon fason brital, se rebèl w'ap voye ptit la fè rebèl plis toujou.

Anvan yon papa korije ptit li, li dwe chache konnen sa k' fè ptit sa a ap fè rebèl. Gen anpil bagay ki kapab rann yon timoun fè rebèl. Gen pafwa yon timoun vrèman vivan, epi gen lòt timoun ki yon ti jan tèt di. Bagay sa yo kapab rann li tonbe fè anpil bagay li pa t' dwe fè. Men, yon timoun ki vrèman rebèl, se yon timoun ki ranpli ak kòlè, epi souvan se papa a ki lakòz kòlè sa a. Men kèk fason yon papa kapab simen rebelyon lakay ptit li :

- Enpasyan.** Lè yon papa pa gen pasyans, sa rann timoun yo fè kòlè.
- Pa dakò pran tò li.** Lè yon papa pa dakò pran tò li, sa rann timoun yo vin pa gen respè pou li ankò.
- Move priyorate.** Lè papa a kite lòt bagay ak lòt moun pran plas fanmi an nan lavi li, sa pral rann timoun lan fè yon bann bagay pou papa a kapab okipe li tou.
- Konpare ptit la ak lòt moun.** Lè sa a, timoun lan pral fè rebèl pou l' kapab demonstre enpòtans ak pouvwa li genyen an.
- Lè w' twò sevè.** Lè sa a, timoun lan pral fè rebèl pou l' tire revanj.
- Pa kenbe pawòl ou.** Sa rann timoun yo dezespere, epi se komsi rebelyon tounen yon soulajman pou yo.
- Mank konfyans.** Lè yon paran pa kite timoun yo pran okenn desizyon menm, lè sa a yo fè rebèl pou montre yo kapab pran desizyon pou tèt pa yo kanmenm.
- Lè papa a pale pwòp paran l' mal.** Sa rann ptit la pral fè menm jan tou.
- Kite timoun yo ranpli lespri yo avèk rebelyon.** Televizyon, mizik, jounal, ak fim kominike rebelyon souvan. Ewo sa yo fè rebelyon sanble yon bon bagay.
- Mank komunikasyon.** Sa lakòz timoun yo pa byen konprann poukisa papa a mande yo pou yo fè tèl bagay.

Gen anpil bagay ki kapab lakòz rebelyon. Menmsi yon papa fè tout sa li kapab, yon timoun kapab toujou chwazi pou l' rebèl. Ptit Bondye yo te rebèl kont Li pafwa (gade Detewonòm 32.11-15). Konsa, pa sezi si ptit pa ou fè menm jan tou.

KANTA NOU MENM, MANMAN AK PAPA, PA AJI AK TIMOUN NOU YO YON JAN POU EKSITE YO... (EFEZYEN 6.4)

ANN GADE LAVI A

Toma te gen dizan. Li te anvi al' lachas avèk de (2) zanmi li yo. Yo tapral moute bato pou yo ale yon kote Toma te ale ane pase avèk papa li. Men, papa Toma te di l' pinga l' ale, epi pinga li mande l' ankò nonplis.

Pita, papa Toma te wè sousi Toma te mare. Lè sa a, li te konsyan li te pale twò di ak tigason an. Li te fè yon ti mache ak Toma, epi te fè l' konnen sa k' fè li pa t' dakò pou Toma ale. Li te fè l' konnen rivyè a te gen de (2) move toubouyon ladan l'. Tigason yo pa t'ap gen ase fòs pou yo pote bato a sou tèt yo pou pase sou kote toubouyon yo, epi dlo a te kouri twò fò nan toubouyon yo pou yo ta eseye janbe yo. Si yo ta eseye janbe yo, yo te ka chavire. Lèfini, te gen de (2) jenn gason ki te al' lachas pou kont yo tou dènyèman, epi youn nan yo te tire lòt la pa neglijans. Lè papa Toma te fè Toma wè rezon sa yo, Toma te konprann desizyon sa a se te pou byen li. Konsa, Toma te wè papa l' te gen rezon, epi li admèt avè l' ak yon kè kontan.

**Yon papa dwe
chache konnen sa
k' fè ptit li ap fè
rebèl.**

**Se pa tout dezobeyisans
ki egal ak rebelyon.**

**Souvan, yon timoun
kapab fè rebèl akòz
papa l' pale epi aji avè l'
jan li vle.**

**Se desizyon pa ptit la si
l'ap fè rebèl ou non.**



Etid Pou Mesye Marye : Relasyon Papa Avèk Pitit

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 39

GRANPARAN

BI LESON AN : Pou montre ki wòl granmoun yo jwe nan lavi jenn yo.

Vèsè Kle :

1. **LEVITIK 19.32** Pèp Izrayèl la te jwenn lòd pou yo _____ granmoun yo.
2. **Tit 2.2** Ansyen granmoun gason yo dwe bay yon bon egzanz. Yo dwe :

3. **Egzòd 10.2** Bondye te di Moyiz pou l' fè _____ li ak _____ li konnen istwa a sou kijan Bondye te fè wè pouvwa Li nan peyi Lejip la.
4. **2 Wa 17.41** Moun sa yo te gen krentif pou bondye, men yo te adore zidòl tou. _____ yo ak _____ yo te fè menm jan an tou.
5. **2 Timote 1.5** Manman ak _____ Timote te jwe yon gwo wòl nan lavi Timote, yon fason pou l' vin gen yon bon lafwa.

Devwa Pou W' Fè



Pou Kont Ou

Egzaminen santiman ou yo anvè paran ou. Èske atitud pa ou yo rann pitit ou gen plis respè pou granparan yo ?



Avèk Madanm Ou

Planifye ansanm pou envite paran nou yo vin vizite nou, epi fè plan pou n' al' vizite yo tou.

Avèk Pitit Ou

Chache fason pou pitit ou yo kapab reyini ansanm ak granparan yo. Ekri lèt, voye foto oubyen SMS si yo pa rete pre. Bay pitit ou yo kèk istwa sou granparan yo ki demonstre kèk bon kalite granparan yo genyen lakay yo.

Granparan yo vrèman enpòtan pou chak fanmi. Nou kapab di yo se « kado Bondye pou sante fanmi an ».

Granparan yo gentan fè anpil eksperyans nan lavi a. Yo gentan fè anpil erè, se vre, men konsa tou, yo gentan fè anpil bon chwa tou. Pamwayen eksperyans sa yo, yo gentan aprann anpil bagay nan lavi a, epi yo konprann anpil nan fason Bondye sèvi avèk lèzòm. Yo kapab ankouraje epi anseye pitit pitit yo lè yo bay yo istwa sou pwòp lavi pa yo. Si timoun yo aprann lesounnan men granparan yo, sa va rann yo p'ap oblige fè yon pakèt erè nan pwòp lavi pa yo yo menm. Konsa, yon granparan kapab sèvi yon sous kouraj dapre eksperyans li gentan fè yo.

Men kèk fason ou kapab chache fè paran w' sèvi kòm « kado Bondye a » pou pitit pa ou yo :

Sèvi Konseyè. Granparan yo kapab di : « Dapre eksperyans nou gentan fè, nou panse ou t'a dwe fè tèl bagay. »

Kòm Èd Grann. yo kapab montre ti pitit yo kijan pou yo mache. Granpapa yo kapab ede yo fè travay. Sa ede bati bon jan relasyon.

Kòm Anseyan. Lè granparan yo montre pitit pitit yo kòman sa te ye lè yo te pitit, yo kapab montre yo anpil bagay yo pa t' janm konnen deja. Yo kapab anseye yo pamwayen dyalòg tou.

Ap Bay Istwa. Timoun yo renmen istwa, epi yo kapab aprann anpil bagay dapre istwa granparan yo, sitou sou kòman lavi te ye nan tan lontan.

Bay Ankourajman. Jenn yo konn dekouraje pafwa, sitoun nan lavi espirityèl yo. Granparan yo kapab ede yo pou yo pa bay legen dapre dousè yo ak jantiyès yo.

Kòm Zanmi. Yon zanmi se yon moun ou kapab pale avè l'. Se yon moun ou renmen pase tan w' avè l'. Gen pafwa granparan yo kapab konble vid sa a nan lavi timoun yo lè paran yo pa disponib.

Kòm yon Istoryen. Lè jenn yo konnen istwa ras yo, sa ede yo konprann kilès yo ye ak kibò yo kapab pi alèz. Sa ede relasyon familyal yo vin pi solid tou. Granparan yo kapab rakonte pi fò nan istwa familyal la bay timoun yo.

Kòm Ewo, epi Kòm Egzanp. Timoun yo aprann pandan y'ap swiv. Granparan yo kapab anseye timoun yo anpil bagay atravè lavi yo san yo pa bezwen di menm yon sèl mo.

...SE POU NOU MOUTRE PITIT NOU AK PITIT PITIT NOU YO TOUT BAGAY SA YO. (DETÉWONÒM 4.9B)

ANN GADE LAVI A

Aleks vle pou pitit li yo aprann tout sa k' posib nan men granpapa yo. Aleks te fèt andeyò, men kounyeya l'ap viv lavil poutèt yon bon djòb li te jwenn. Men, li pa vle pou pitit li yo rate tout bon bagay yo yo kapab aprann nan men granpapa yo.

Papa Aleks, ansanm avèk de (2) frè Aleks rete nan menm vil la avèk li. Konsa, Aleks konn reyini tout fanmi sa yo ansanm lakay li. Apre yo fin manje ansanm, Aleks konnen fè papa l' chita sou yon chèz sou galeri a. Apre sa, tout timoun yo vin chita atè pandan paran yo chita pou yo koute tou.

Lè sa a, Granpapa kòmanse bay kèk istwa sou lè l' te timoun. Li toujou fè anpil lesounnan sou sa l' te aprann. Li pale sou erè li te gentan fè yo ak kijan Bondye montre l' bon chemen an. Li fè sa yon fason pou ankouraje pitit li, ansanm ak pitit pitit li yo, pou yo pa fè menm erè sa yo tou.

**Granparan—yon
kado Bondye bay
chak fanmi.**

**Granparan yo se yon
sous kouraj ki la depi
byen lontan.**

Granparan yo kapab :

- **bay konsèy dapre eksperyans yo**
- **anseye nan aksyon yo**
- **fè kè n' kontan ak yon seri istwa**
- **sèvi yon zanmi**
- **devlope bon relasyon familyal**
- **sèvi egzanp**



Etid Pou Mesye Marye : Reskonsabilite Familyal

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 40

FANMI K'AP BRASE ANSAM

BI LESON AN : Pou montre kijan sa enpòtan pou fanmi yo brase ansanm.

Vèsè Kle :


- Lik 1.17** Bib la di youn nan travay yo Jan Batis te gen pou l' fè pou l' prepare pèp la pou Senyè a se pou l' ini _____ yo ak _____ yo.
- Travay 21.5** Lè Apòt Pòl tapral pati pou Lazi, tout gason yo ki te konvèti te reyini ansanm ak tout _____ yo ak _____ yo pou yo priye ansanm.
- Jozye 24.15** Jozye te demonstre kijan li menm ak fanmi li te pran desizyon pou yo kanpe ansanm, kote li te di : « Pou mwen menm ansanm ak tout moun lakay mwen, _____ . »
- Travay 16.34** Gad filipyen an te mennen Pòl ak Silas ale lakay li. Li menm, ansanm ak _____ li te jwenn vrè lajwa lè yo te mete konfyans yo nan Senyè Jezikris.
- Efezyen 5.32-6.1** Fanmi yo va renmen brase ansanm lè chak gason _____ madanm li, lè chak madanm _____ mari li, epi lè chak pitit _____ paran yo.

Devwa Pou W' Fè



Pou Kont Ou

Kontwole chak èdtan ou pase ansanm avèk fanmi ou pandan tout yon semenn—lè dòmi pa ladan, sòf si se sòti nou te sòti ansanm. Chache kèk fason ou kapab ogmante kantite tan sa a.



Avèk Madanm Ou

Mande li pou l' drese yon lis sou tout sa li anvi fè avèk fanmi an. Chita avè l', epi etabli yon dat pou fè chak bagay sa yo.

Avèk Pitit Ou

Chita ansanm epi brase lide sou kèk aktivite nou kapab fè ansanm. Pa meprize kèlkeswa ide timoun yo te met bay. Mande timoun yo pou yo planifie aktivite sa yo.

FANMI K'AP BRASE ANSANM

Lesson 40

Bondye vle pou fanmi yo brase ansanm. Jan fanmi yo te viv nan tan kontan te rann fanmi yo te brase ansanm plis pase tan modèn sa a. Nan tan lontan, fanmi yo te travay ansanm pou yo te ka viv. Papa yo te pran ti gason yo pou y'al lachas, pou peche pwason, pou fè chaloup, pou fè jaden, epi pou fè kay ansanm. Manman yo te travay ansanm ak tifi yo pou yo prepare manje, epi pou fè rad tou.

Jounen jodi a, tout bagay sa yo ap chanje nèt. Gen anpil izin k'ap pwodwi bagay sa yo. Gen plis moun ki rete lavil pase ki rete andeyò kote yo kapab travay tè. Edikasyon vin rann sa nou ba valè ap chanje tou. Moun kapab fè plis kòb, epi gen plis plezi moun kapab pran tou. Lèzòm vin pa gen tan menm, epi aktivite chak moun rann fanmi yo prèske pa brase ansanm menm. Si pou nou brase ansanm, sa mande plis efò pase oparanvan. Jounen jodi a, fòk papa yo chwazi pou yo fè sa, epi fòk yo bati yon plan pou fanmi an kapab rete kole ansanm.

KÈK AKTIVITE KI KAPABINI FANMI AN PLIS

Istwa Familyal. Chache konnen zansèt ou yo. Chache konnen ki kote, epi kòman yo te viv. Drese yon chema ki gen tout non yo nèt, epi plake l' nan kay la. Lè nou konnen ras nou, sa ede nou konnen kiyès nou ye ak ki kote nou prale.

Sware Familyal. Chak semenn, mete yon sware apa pou tout fanmi an pase l' ansanm. Plannifye sa nou pral fè. Se yon sware pou n' kontan epi pou n' pataje ansanm.

Bi Familyal. Chak premye Janveye, plannifye kèk aktivite pou fanmi an, epi tou shwazi nan ki dat w'ap fè sa. Lè sa a, fanmi an ap byen espere dat sa yo.

Ministè Familyal. Vizite moun ki malad, granmoun yo, vèv yo, ak moun ki andikape yo nan kominate ou a. Fè tout sa ki posib pou yo.

Adorasyon Familyal. (Gade Leson 44). Pran tan chak jou pou li Bib la, pou priye, epi pou chante ansanm.

Souvni Familyal. Toujou kenbe foto yo byen ranje nan yon katab. Toujou repran istwa sou kijan nou te pase kèk bèl moman ansanm.

LI GEN POU L' FÈ PAPA BYEN ANKÒ AK PITIT, PITIT VIN BYEN ANKÒ AK PAPA... (MALACHI 4.6)

ANN GADE LAVI A

Wodrig te sòti andeyò pou l' al' rete lavil. Li te jwenn yon djòb, epi li t'ap antre ase kòb pou pran swen fanmi an byen. Men apre dizan lavil, Wodrig te vin kon-syan te gen anpil move bagay lakay fanmi li. Li pa t' konn chita menm. Timoun yo pa t' konn chita nonplis poutèt bann aktivite yo t'ap mennen nan vwazinay la. Lekòl la t'ap pote yon move enflyans sou timoun yo tou. Wodrig prèske pa t' konnen pitit li menm.

Wodrig te priye sou sa avèk madanm li. Yo te deside pou yo pase plis tan ansanm avèk timoun yo. Yo te mete timoun yo nan yon lekòl kretyen. Nan lekòl sa a, paran yo te pi angaje nan zafè edikasyon timoun yo. Chak Samdi, Wodrig te toujou pran youn nan timoun yo pou l' al' travay avè l'. Chak semenn, yo te pran yon sware pou yo brase ansanm. Kounyeya, fanmi a pi kole, epi tout timoun yo anvi pase tan avèk papa a chak fwa sa posib.

**Bondye vle pou
fanmi yo brase an-
sanm.**

**Papa yo oblige chwazi,
planifie, epi travay pou
fanmi an resi pase tan
ansanm vre.**



Etid Pou Mesye Marye : Reskonsabilite Familyal

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 41

MARI A KÒM YON LIDÈ

BI LESON AN : Pou konprann poukisa Bondye antann pou gason an sèvi lidè nan fwaye a.

Vèsè Kle :


- 1 Timote 3.4-5** Yon lidè espirityèl dwe dirije _____ li byen.
- Travay 10.1-2** Konèy se te yon bon nèg ki te dirije fanmi li nan _____ ak nan _____.
- Jeremi 35.18-19** Bondye te chonje moun Rekab yo epi Li te rekonpanse yo paske yo te swiv tout sa _____, ki se te papa yo, te di yo pou yo fè.
- Detewonòm 32.46-47** Yon papa ki kenbe pawòl Bondye a nan _____ li kapab transmèt yo bay _____ epi konsa yo kapab obeyi yo ansanm.
- Efezyen 5.23, 25** Mari a se _____ madanm lan. Mari a dwe _____ madanm li menm jan Kris te renmen legliz la tou.

Devwa Pou W' Fè



Pou Kont Ou

Chache yon pwen nan fanmi ou kote ou manke dirije yo byen. Fè yon plan sou kijan ou pral amelyore sa.



Avèk Madanm Ou

Pifò medam swete mari yo t'ap dirije fwaye a pi byen nan kèk pwen. Kisa madanm ou panse ? Mande li. Priye sou sa l' di a.

Avèk Pitit Ou

Jwe yon ti jwèt kote timoun yo dwe fè tout sa ou fè a. Fè yo konnen ou vle dirije fwaye a byen nan tout aspè. Mande yo pou yo ede ou. Yo kapab bay kèk sijesyon epi yo dwe swiv egzanp ou byen tou.

MARI A KÒM YON LIDÈ

Lesson 41

Lè Bondye te kreye premye fanmi an, Li te mete mari a kòm lidè a. Bondye te kreye Adan anvan, epi te enstwi l' kòman pou l' pran swen jaden Edenn lan. Apre sa, Li te pran zo kòt Adan an, epi Li te fè Ev kòm yon èd pou li. Men plan Bondye a pou lidèchip :

1. Kris - lidè legliz la ak tout mari a
2. Mari - lidè fi a ak tout fanmi an
3. Madanm - li ede mari a dirije timoun yo

Souvan mari yo kite medam yo pran devan pou dirije fanmi an. Se pa plan Bondye a sa. Medam yo dwe sèvi yon ed nan fanmi an, men yo pa dwe pran devan. Se vre, gason ak fanm gen menm valè espirityèl devan Bondye, men nan fwaye a, Bondye bay yo chak devwa pa yo poutèt jan Li te kreye panse yo, kò yo, avèk santiman yo. Lè mari a dirije fanm lan, se swiv l'ap swiv plan Bondye a pou fanmi li.

LIDÈCHIP ESPIRITYÈL Bondye vle pou fanmi yo grandi espirityèlman. Li vle itilize papa a pou bay fanmi an dirèksyon espirityèl. Sa vle di li dwe ranpli kèk tach tankou : mennen fanmi an legliz, epi dirije devosyon familyal. Papa dwe anseye epi li dwe bay yon bon egzanp nan lavi espirityèl li tou.

DIRIJE MADANM LAN Mari a dwe dirije madanm li menm jan Jezikris dirije legliz la. Yon kwayan toujou ap gade Jezi Kris pou chache dirèksyon pou lavi li. Yon madanm dwe gade mari li tou pou l' chache dirèksyon. Lè mari a pran devan pou l' dirije, sa bay fanmi an sekirite.

DIRIJE NAN LAMOU Se pa plan Bondye a pou gason an dirije kòm yon chèf baton. Li pa dwe chita pase lòd. Okontrè, li dwe dirije yo pamwayen lamou. Yon lidè ki gen renmen va sèvi fanmi li. Li pa dwe antann pou fanmi an fè yon bagay si l' pa dakò fè l' li menm. Li dwe bay yon bon egzanp nan tout pati nan lavi li nèt.

Bondye te bay mari yo reskonsabilite pou yo dirije.

Yon madanm se yon èd, li pa yon lidè.

Lidèchip espirityèl dwe sòti nan papa a.


Fòk ou dirije avèk lamou.

PASKE, YON MARI SE CHÈF MADANM LI MENM JAN KRIS LA SE CHÈF LEGLIZ LA. (EFEZYEN 5.23)

ANN GADE LAVI A

Mak te kontre ak Cheli pandan yo t'ap mache na yon lekòl biblik, epi se nan epòk sa a menm yo te marye. Apre li te gradye, Mak te devni yon gran predikatè. Li te pase anpil tan ap vwayaje pou l' al' preche nan lòt legliz. Madanm Mak te vin pran reskonsabilite a pou l' dirije lakay la, epi pou l' elve timoun yo. Menm lè Mak te lakay, li te toujou kite madanm lan pran devan pou fè levasyon timoun yo. Pafwa, madanm lan te konn mande mari a pou l' ede elve timoun yo, men li pa t' janm fè sa vre.

Pandan timoun yo te toujou jenn, sanble sa te mache kanmenm. Men, lè timoun yo te vin gen laj, yo te kòmanse mele ak kèk move baz, epi yo te kòmanse dezòd. Mak pa t' ka rele apre yo paske yo pa t' koute li ditou. Lè sa a, li te twò ta pou Mak kòmanse fè tout sa l' te dwe fè depi lontan kòm lidè fwaye a.



Etid Pou Mesye Marye : Reskonsabilite Familyal

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 42

DIRIJE KÒM YON BÈJE

Bi LESON AN : Pou konprann kisa yon bon bèje ye, epi kòman yon mari kapab diriye konsa.

Vèsè Kle :

- Ezayi 40.11** Bondye se yon bon bèje. Li _____ ti mouton yo ak _____ yo ki plenn.
- Sòm 23.1-3** Kijan Senyè a, ki se Bon Bèje a, konn ede ou ?

- Jan 10.14** Yon bon bèje _____ mouton l' yo, epi mouton yo _____ li.
- Ezekyèl 34.2** Lidè Izrayèl yo se te kèk move bèje. Olye pou yo pran swen pèp la (mouton yo), kisa yo t'ap fè pito ? _____.
- 1 Pyè 5.2-3** Bondye vle pou lidè espirityèl yo sèvi kòm bon bèje. Site yon bagay yon bon bèje konn fè : _____

Devwa Pou W' Fè



Pou Kont Ou

Nan Jan 21.15-17, Jezi te di Pyè pou l' : « Pran swen ti mouton M' yo. » Jezi pa t'ap pale sou mouton toutbonvre, se sou moun Li t'ap pale lè sa a. Madanm ou ak pitit ou yo se mouton yo ye. Ekri twa (3) fason Jezi vle pou w' okipe yo.



Avèk Madanm Ou

Li Sòm 23 ansanm avè l'. Gade tout sa yon bèje fè pou mouton l' yo. Mande l' kiyès nan bagay sa yo li ta renmen pou w' fè plis toujou.

Avèk Pitit Ou

Nan 1 Samyèl 17.31-37, David fè konnen kijan li te pwoteje mouton l' yo. Li istwa sa a pou pitit ou yo. Mande yo ki « lyon » ak ki « lous » yo pè yo menm. Asire yo ou va fè tout sa k' posib pou pwoteje yo.

DIRIJE KÒM YON BÈJE

Lesson 42

Jezi te rele tèt Li « Bon Bèje » a. Bondye te rele Izrayèl « mouton » L' yo. Youn nan pasaj biblik ki pi konni se Sòm 23, epi li rele Senyè a « Bèje mwén » .

Touswit anvan Li te monte nan syèl la, Jezi te di Pyè : « Pran swen ti mouton M' yo. » Yon papa ki renmen fanmi li, epi ki renmen Jezi, va anvi pou l' pran swen fanmi li menm jan yon bèje pran swen mouton l' yo. Kijan li kapab fè sa ?

LI MACHE DEVAN YO (Jan 10.4). Yon bon bèje pa voye mouton yo pran devan pandan li mache dèyè li menm. Ni li pa kouri dèyè yo tankou yon moun k'ap pouse poul. Li pran mache devan yo epi mouton yo pran swiv li. Sa rann li toujou rete pre mouton yo. Yon papa ki se yon bèje va dirije fanmi li pamwayen egzanp li. Li pa sèlman di yo kòman pou yo mache, men li montre yo sa tou. Li chache bon wout la, epi li mache ladan l' li menm. Mouton l' yo swiv li paske yo renmen li.

LI KONNEN YO (Jan 10.3, 14). Li gen yon non pou yo chak. Li konnen pwen fò, pwen fèb, ak krentif yo chak. Li pa aji avèk yo tout menm jan. Okontrè, li ede yo chak selon pwòp bezwen pa yo. Yon papa ki se yon bèje konnen chak manm nan fanmi li yon fason espesyal.

LI PWOTEJE YO (Jan 10.11–13). Lè yon chen mawon vini, bèje a rete la pou li goumen olye pou l' kouri. Yon papa ki se yon bèje siveye epi li goumen ak tout « chen mawon » yo ki vini pou dechepiye fanmi li. Chen mawon sa yo se move lide ak move atitid, manti dyab la, ak lòt pisans espirityèl. Yo kapab antre nan kay la pamwayen liv, televizyon, mizik, move vizitè, epi kèk lòt fason tou. Fòk papa a kapab wè danjè espirityèl yo yon fason pou l' dirije fanmi li lwen danjè sa yo.

LI PASE MIZÈ (Jan 10.11). Pou l' kapab pran swen mouton l' yo, souvan yon bèje oblige manke dòmi, manke dòmi, manke manje, oubyen manke tan lwazi. Pafwa, li menm oblige mete lavi li an danje. Men, yon papa ki se yon bèje va fè sa paske li renmen fanmi li.

SÒM 23 ; LIK 15.3–7 ; JAN 10.1–16, 27–29 ; EBRE 13.20

Jezi se Gran Bèje a.

**Jezi vle pou papa yo
« pran swen mouton Li
yo » .**

**Yon bèje mache devan
mouton l' yo.**

**Yon bèje konnen
mouton l' yo.**

**Yon bèje pwoteje
mouton l' yo.**

**Yon bèje konn pase mizè
poutèt mouton l' yo.**

MOUTON M' YO KOUTE VWA M', MWEN KONNEN YO EPI YO SWIV MWEN. (JAN 10.27)

ANN GADE LAVI A

Lè Liknè te retounen lakay apre yon vwayaj ki te fè l' pase yon semenn deyò, li te jwenn madanm li te tou tris. Pou l' fè kè madanm lan kontan, Liknè te pran yon bon ti tan pou l' jwe avèk timoun yo. Apre sa, li te ede madanm li ranje kabann pou mete timoun yo kouche. Lèfini, Liknè te fè yon ti chita avèk madanm li pou yo bwe yon ti te ansam. Liknè te kòmanse poze madanm lan kèk kesyon sou kijan tan an te pase pou li. Pandan yo t'ap dyaloge ansam, karaktè madanm lan te kòmanse demare, epi distans pou yo al' kouche, madanm lan te santi li te kontan epi lib ankò.



Etid Pou Mesye Marye : Reskonsabilite Familyal

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 43

PWOTEKSYON ESPIRITYÈL

BI LESON AN : Pou aprann kijan pou w' pwoteje fanmi an espirityèlman kont fòs mechan an.

Vèsè Kle :


- EFEZYEN 6.10-12** Fòk yon moun mete _____ sou li si pou l' kanpe kont vye fòs espirityèl yo ki nan lemn.
- Pwovèb 14.26** Sila yo ki kwè nan Senyè a va jwenn _____.
- Jòb 1.9-10** Bondye te toujou _____ Jòb kont Satan.
- Sòm 91.4** Bondye va pwoteje ou anba zèl Li, epi se fason Li toujou kenbe Pawòl Li ki va sèvi _____ ou.
- Jozye 1.8** Lè nou konnen Pawòl Bondye a, sa rann lavi a byen mache. Kisa Bondye te di yon moun dwe fè avèk Pawòl Li lajounen kou lannwit ? _____

Devwa Pou W' Fè



Pou Kont Ou

Fè yon lis tout zam espirityèl yo nou jwenn nan Efezyen 6.13-17. Chak maten, rale lis sa a epi mete chak nan zam sa yo ou pandan w'ap priye.



Avèk Madanm Ou

Chita toupre youn lòt epi mete yon lenn sou tèt nou pandan n'ap li Sòm 91. Reklame pwomès sa yo. Fè kòmsi lenn lan se « zèl Senyè a » (vèsè 4).

Avèk Pitit Ou

Fè yon ti konkou avèk fanmi an. Bay chak moun ki aprann Sòm 91 pa kè yon ti prim.

PWOTEKSYON ESPIRITYÈL

Lesson 43

Se Bondye k'ap pwoteje fanmi nou yo. Li pa vle pou yo kraze. Si yon fanmi rete anba pwoteksyon Bondye a, Satan ak demon li yo p'ap ka fè yo anyen. Men, si fanmi an sòti anba pwoteksyon Bondye a, yo pral tonbe anba move atak vye fòs espirityèl yo kan-menm.

Bondye bay nou de (2) bèle egzanp sou pwoteksyon Li. Li montre nou kòman nou kapab jwi pwoteksyon sa a tou

ZÈL PWOTEKSYON (Sòm 91.4). Lè gen danje toupre, manman poul la kache ti poul yo anba zèl li pou pwoteje yo. Men fòk ti poul yo rete anba zèl manman poul la si pou yo jwenn pwoteksyon. Bondye pwomèt nou kalite pwoteksyon sa a pou yon papa ki dakò pou l' fè bagay sa yo :

- Chache pwoteksyon bò kote Bondye (vèsè 1). Se pou l' rete toupre Bondye, pale avèk Bondye, epi konfyé Bondye.
- Renmen Bondye (vèsè 14). Li dwe mete Bondye an premye pozisyon nan lavi li. Yon papa konsa va pataje renmen avèk sila yo ki bò kote li tou—ni fanmi li, ni lòt moun tou.
- Rele Bondye (vèsè 15). Li konnen Bondye ap dirije tout bagay nèt. Lè li nan pwoblèm, oubyen nan mitan danje, li pa pèdi tèt li, li pa krent, epi li pa fè kòlè. Okontrè, li mete tout konfyans li nan Bondye pou L' pran swen li.

Bondye pwomèt pou L' veye sou kay yon nonm konsa tou (vèsè 10). Akòz papa a rete anba pwoteksyon Bondye a, epi akòz fanmi an dakò rete anba lidèchip papa a, Bondye va pwoteje tout fanmi an nèt

ZAM PWOTEKSYON YO (Efezyen 6.10–18). Zam sa yo pwoteje yon papa pandan l'ap atake vye fòs fenwa yo. Yo pa pwoteje l' si l' kraze rak devan lènmi a, paske pa gen okenn pwotej pou do li. Zam pwoteksyon yo se verite a, mache dwat (jistis), aktivite pou anonse Levanjil la, konfyans, sali, Pawòl Bondye a, avèk lapriyè. Yon papa ki itilize tout zam sa yo va kanpe devan tout atak Satan.

Si pa gen yon papa nan fwaye a, fwaye sa a kapab pwoteje si lòt moun yo ki reskonsab nan fwaye a mete zam sa yo sou yo, epi si yo rete anba zèl pwoteksyon Bondye.

ZAM M'AP SÈVI NAN BATAY M'AP MENNEN AN...SE ZANM KI GEN POUVWA DEVAN BONDYE POU KRAZE TOUT GWO FÒ. M'AP KRAZE TOUT PAWÒL ESPLIKASYON KI PA BON. (2 KORENT 10.4)


ANN GADE LAVI A

Samyèl te marye epi li te gen senk (5) pitit. Li te renmen timoun yo epi li te sansib pou pwoteksyon espirityèl yo. Pandan timoun yo te piti toujou, Samyèl te dedye yo chak bay Senyè a. Pandan yo t'ap grandi, li te anseye yo pou yo gen krentif pou Senyè a. Tout timoun yo te fè fas avèk Kris kòm Sovè yo. Samyèl te anseye yo kijan pou yo rekonèt tantasyon Satan yo, ak kijan pou yo resite dyab la. Samyèl te toujou kanpe djanm nan lavi kretyen li, epi konsa lavi pa l' la te ede pwoteje timoun yo tou. Timoun yo pa t' fè rebel. Okontrè, yo te rete anba pwoteksyon sa a. Samyèl te priye ansanm ak madanm li, epi yo te mande Bondye pou pwoteje yo. Jounen jodi a, timoun yo tout reskonsab, epi yo tout ap venkè nan lavi kretyen yo.

**Bondye renmen
epi pwoteje fanmi
yo ki mete
konfyans yo nan
Li.**

**Bondye louvri zèl Li
anwo tèt chak fanmi ki
renmen Li.**

**Papa yo ki sèvi avèk
zam espirityèl yo
kapab kanpe anfas atak
mechan an.**



Etid Pou Mesye Marye : Reskonsabilite Familyal

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 44

DEVOSYON FAMILYAL

BI LESON AN : Pou aprann valè yon devosyon familyal.

Vèsè Kle :


- JAN 4.23-24** Moun Bondye vle pou _____ Li se moun k'ap _____
jan sa dwe fèt la.
- Women 12.1** Adorasyon ki fè Bondye plezi se pou n' ofri _____
tankou yon ofrann ki apa pou Bondye .
- Jenèz 22.5-6** Abraram te mache avèk ptit gason li _____ pou yo te rive kote
yo tapral _____ .
- 1 Samyèl 1.3-5** Chak ane Elkana te mennen fanmi li _____ pou
Senyè a lavil _____ .

Devwa Pou W' Fè



Pou Kont Ou

Bon jan adorasyon familyal dwe sòti nan bon
jan adorasyon pèsonèl. Pwograme yon tan chak
jou kote ou kapab li Bib la, priye, epi chante.



Avèk Madanm Ou

Lè nou priye ansanm anvan nou kouche, sa ba
nou yon fòs espirityèl. Sa kapab ede nou mete tèt
nou ansanm pi byen epi li kapab ranfòse maryaj
nou. Angaje nou pou n' fè sa chak swa.

Avèk Ptit Ou

Planifye yon bon lè pou n' fè devosyon
ansanm ak timoun yo. Yon bon lè kapab lè
nou fin manje kote fanmi an déjà reyini yon
jan alèz.

DEVOSYON FAMILYAL

Lesson 44

Bondye antann pou papa a dirije fanmi an espirityèlman, epi pou anseye Pawòl Bondye a. Yon fason li kapab fè sa se nan devosyon familyal. Sa se yon tan nou mete apa chak jou kote fanmi an kapab reyini pou jwenn ansèyman espirityèl, epi pou louwe ansann.

Pwograme yon lè kote tout fanmi an kapab reyini, epi kote lòt moun p'ap deranje nou twòp. Eseye fè l' yon ti jan brèf pou timoun yo pa santi yo annwiye.

Men kèk ide nou kapab sèvi nan devosyon familyal nou yo :

CHANTE. Kite timoun yo chwazi chan yo. Chante chan ki bon pou tout laj yo. Aprann kèk nouvo chan.

PRIYE. Kite timoun yo bay kèk rekèt priyè. Fè yon lis, epi chak fwa Bondye reponn yon priyè, bife l' sou lis la. Pran kèk rekèt nan legliz la tou, epi pa blyie priye pou misyon ak Kretyen nan lòt peyi.

LEKTI BIBLIK. Li yon chapit oubyen yon pasaj. Kite tout timoun yo ki kapab li pran yon chans pou li detwa vèsè. Tanzantan ou kapab fè yon ti jwèt kote ou site yon referans epi moun ki jwenn li anvan kapab li l'.

LI ISTWA. Anplis sou lekti biblik, li yon istwa biblik ki bay yon verite biblik. Mete ansann pou refè istwa sa a.

APRANN PA KÈ. Chwazi yon pasaj pou w' aprann pa kè. Resite vèsè sa yo nan devosyon familyal la. Aprann tout liv yo ki nan Bib la pa kè.

KESYON AK DISKISYON. Ankouraje timoun yo pou yo poze kesyon sou sa nou li. Diskite sou lekti biblik la ansannm pou wè kisa nou chak te tire nan istwa a.

Men kèk liv ki kapab ede nou nan zafè devosyon familyal :

25 Pi Bèl Istwa—Se Christian Aid Ministries ki pibliye liv sa a.

Tras Pyè Kris yo—Christian Aid Ministries te pibliye liv sa a tou.

Gen lòt liv ankò ou kapab jwenn an Kreyòl. Si ou vle plis enfòmasyon, voye yon imel nan livkretyen@gmail.com.

SÒM 23 ; LIK 15.3-7 ; JAN 10.1-16, 27-29 ; EBRE 13.20

TOUT NASYON OU TE FÈ YO VA VIN BESE TÈT DEVAN OU ! Y'A FÈ LWANJ OU. (SÒM 86.9)

ANN GADE LAVI A

Fritz se yon Kretyen ki gen yon gran dezi pou tout fanmi li sèvi Senyè a. Chak swa Fritz toujou reyini timoun yo ak madanm li pou devosyon familyal. Yo toujou kòmanse ak yon chan. Apre sa, madanm Fritz konn li yon istwa ak yon vèsè biblik. Apre sa, Fritz konn esplike vèsè a pou montre fanmi an kijan pou aplike verite sa a nan lavi yo. Lèfini, yo tèmine pa lapriyè.

Menmsi gen yon vizitè, fanmi an toujou reyini pou devosyon an nan menm lè a. Lè sa a, yo envite vizitè yo pou yo patisipe tou. Fritz pa janm santi l' alèz si tout moun nan fwaye a pa reyini pou devosyon an.


Sa vin bay timoun yo yon gran respè pou devosyon familyal, pou Pawòl Bondye a, ak pou sa ki dwat.

**Devosyon
Familyal—yon
bagay ki fèt chak
jou.**

**Pa fè l' dire twòp, men fè
l' yon jan ki sensè.**

**Itilize plizyè metòd
diferan.**

**Chache jwenn kèk liv ki
kapab bon pou timoun
tout laj.**



Etid Pou Mesye Marye : Reskonsabilite Familyal

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 45

PAPA A—YON NÈG KI RESKONSAB

BI LESON AN : Pou montre kijan Bondye vle pou mari yo pran swen fanmi yo.

Vèsè Kle :

- 1 Tesalonisyen 4.11–12** Si yon mari _____, fanmi li p'ap nan bezwen.
- 1 Timote 5.8** Bondye antann pou yon mari pran swen fanmi li. Si l' pa fè sa, li pi mal pase _____.
- 2 Tesalonisyen 3.10–12** Si yon mari pa travay, epi si l' pa chache pran swen fanmi li, nèg sa a pa dwe _____.
- Matye 6.25** Se vre, Bondye vle pou ou travay, men Li pa vle pou ou _____.
- Efezyen 4.28** Bondye vle pou yon gason travay yon fason pou li kapab _____.

Devwa Pou W' Fè



Pou Kont Ou

Kòmanse remmèsy Bondye chak jou pou jan ou kapab pran swen fanmi ou. Si ou pa ka pran swen yo, remmèsy Bondye pou pwomès Li te fè w' pou L' pran swen yo.



Avèk Madanm Ou

Travay ansanm pou bati yon bidjè. Yon bidjè se yon plan sou kijan nou pral itilize lajan nou pou n' pran swen fanmi an.



Avèk Pitit Ou

Pale avèk yo sou kisa ou konn fè pou antre kòb. Mennen yo nan travay la ansanm avè w'. Chache kèk bagay yo kapab fè pou ede w' nan travay la.

PAPA A—YON NÈG KI RESKONSAB

Lesson 45

Se yon gran privilèj kote yon mari kapab pran swen fanmi li. Se pa tout mari ki kapab fè sa. Gen kèk gason ki kokobe. Gen kèk ki nan prizon. Gen kèk ki pa ka jwenn travay. Sante yon gason, abilite li, libète li, ak djòb li, tout bagay sa yo se yon kado Bondye bay. Lè Bondye bay yon gason kado sa yo, Li antann pou mesye a sèvi avèk yo.

Lè yon papa pran swen fanmi li pamwayen travay li fè yo, men sa ki rive :

LI BATI RESPÈ POU MOUN AK POU SA YO POSEDE. Papa a vin respekte lòt moun ak sa yo posede a plis paske li konprann kòman yon moun bezwen redi pou l' resi jwenn bagay sa yo. Apre sa, li transmèt respè sa a bay pitit li tou.

LI SANTI LI ITIL. Fanmi an depann sou li olye pou yo gade leta a pou pran swen yo. Yo bezwen li. L'ap redi pou l' fè fanmi an jwenn sa yo bezwen. Sa rann li santi li gen valè. Sa ede l' respekte pwòp tèt pa li tou.

LI FÈ FANMI LI RESPEKTE L'. Fanmi li vin respekte epi renmen l' plis paske l'ap pran swen yo. Lè yon papa kite lòt moun okipe fanmi li olye pou l' eseye fè sa li menm, sa vin rann fanmi li manke respè pou li.

Sa vle di lè yon gason pran swen fanmi li, sa fè l' santi li gason !

PWOWÈB 6.6-11, 13.11, 14.23, 20.13 ; 1 KORENT 4.12 ; KOLOSYEN 3.23

**Bondye te kreye
gason yon fason
pou l' ka pran
swen fanmi li.**

**Lè yon gason pran swen
fanmi li, sa rann :**

- li gen respè pou lòt yo
- lòt moun gen respè pou li
- li respekte tèt li
- li santi li gason


SI YON MOUN PA PRAN SWEN FANMI L', SITOU MOUN K'AP VIV LAKAY LI, LI NYE KONFYANS LI NAN BONDYE, LI PI MAL PASE YON MOUN KI PA JANM KWÈ NAN BONDYE. (1 TIMOTE 5.8)

ANN GADE LAVI A

Touswit apre Jòj te marye avèk madanm li, madanm lan te jwenn yon djòb nan yon magazen. Jòj te byen renmen sa, epi li te annik chita lakay san l' pa fè anyen.

Pa lontan yo te vin pa gen bon vi ansam ditou. Madanm lan prèske pa t' konn chita, epi lè l' te resi antre lakay, li te toujou fatige epi boude. Jòj pa t' gen djòb epi li te santi li pa t' itil. Madanm lan te gen pwòp lajan pa l' epi li te depanse l' jan l' te vle.

Yo te kòmanse priye ansam pou Jòj te ka jwenn yon djòb. Anvan lontan, Jòj te jwenn yon djòb. Madanm lan te vin kite djòb pa l' la epi te kite Jòj pran okipe fwaye a. Lè sa a, Jòj te kòmanse dirije fanmi an tou. Kounyeya yo santi yo kontan, epi yo santi yo gen lapè.



Etid Pou Mesye Marye : Reskonsabilite Familyal

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 46

BYEN JERE LAJAN

BI LESON AN : Pou aprann kijan pou evite pèlen lajan.

Vèsè Kle :

- 1 Timote 6.10** Lajan se pa yon mal, men _____ lajan fè moun fè tout kalite bagay ki mal.
- 1 Timote 6.9** Yon moun ki vle vin rich va tonbe nan tantasyon epi nan _____.
- Pwovèb 22.7** Lè ou prete lajan nan men yon moun, ou tounen _____.
- Matye 17.24–27** Jezi te anseye disip yo pou yo peye _____ san yo pa plenyen.
- 1 Korent 4.7** Tout sa ou posede, menm lajan ou, sòti nan men _____.

Devwa Pou W' Fè



Pou Kont Ou

Si ou pa konn kijan pou w' fè yon bidjè, mande yon moun pou ede w' fè sa. Bidjè sa a va ede w' pi byen itilize lajan w'.



Avèk Madanm Ou

Lè l' wè yon bagay li anvi achte, fè l' ekri l' sou yon lis epi ekri dat la bò kote l'. Tann trant (30) jou anvan pou w' achte bagay sa a. Apre trant (30) jou, si w' pa deside achte bagay la ankò, retire l' sou lis la.

Avèk Pitit Ou

Ede yo devlope yon kapasite pou byen jere lajan. Bay yo yon ti kòb chak semenn epi ede yo chache kèk ti djòb pou yo fè kòb. Montre yo kijan pou yo fè ekonomi pou yo kapab achte yon bagay ki pral itil yo pou yon bon ti tan.

Kisa dèt ye menm ? Tout alantou nou, gen moun, biznis, epi menm peyi ki mare nan zafè dèt. Se kòmsi yon moun pa ka viv san l' pa prete lajan. Tout moun, ni rich, ni pòv, yo tout anvi viv anba esklavaj lajan.

Bondye pa vle pou n' vin esklav pèsonn. Okontrè, nou dwe sèvi Bondye kòm esklav. Lè w' prete kòb, ou vin gen mwens bagay ou kapab fè nan lavi a, epi li vin pi difisil pou w' sèvi Bondye. Ou devni esklav moun ki prete w' lajan an.

Men kèk bagay ou kapab fè pou w' evite esklavaj sa a :

ANGAJE W' pou w' sèvi Bondye olye pou w' sèvi lajan. Chwazi pou w' renmen Li plis pase bagay terès, epi plis pase nenpòt eksperyans lajan kapab bay (Matye 6.24).

ITILIZE LAJAN W' NAN LÈV BONDYE. Itilize lajan w' pou montre lòt yo renmen Bondye a. Itilize l' pou fanmi yo ki nan bezwen, bezwen nan legliz la, epi pou ede lòt yo tou (Pwovèb 3.9-10).

PRETE LAJAN AVÈK ANPIL PRIDANS, OUBYEN PA PRETE MENM. Poze tèt ou kesyon. Èske ou dwe prete kòb pou achte bagay ki pèdi valè yo, oubyen bagay ki p'ap antre lajan ? Yon kat kredi, ak achte kredi, se menm bagay ak prete lajan. Si ou pa gen kòb labank pou peye dèt sa yo anvan dat la rive, pa itilize bagay sa yo menm. Depi ou prete kòb, ou vin anba pouvwa sila a ki prete ou kòb la (2 Wa 4.1).

ALE DOUSMAN EPI APRANN DI : « NON ! » Lè w' achte san reflechi, se pral lage ou dwat nan pwoblèm. Byen reflechi sou chak depans anvan ou depanse. Si yon machann ap chofe tèt ou pou w' achte, di « Non ! » Se pou w' pridan lè w' bay yon moun kòb. Pa bay moun kenbe lajan fasil. Si fanmi w' egzije w' pou w' fè plis pou yo pase sa ki posib, pran tan pou esplike yo kòman sityasyon an ye (2 Pyè 1.6).

FÈ YON BON ACHA. Pran tan pou pran pri bagay yo. Chache kote ou kapab jwenn pi bon pri. Disipline tèt ou. Pa kite santiman w' pote w' ale (Pwovèb 21.17).

BAY BONDYE SA KI POU LI. Bondye pwomèt pou L' pran swen nou si nou bay ak tout kè nou (2 Korent 9.7).

CHACHE FÈ ZANMI, PA CHACHE FÈ KÒB. Gen kèk moun ki pèdi zanmi yo nan kouri dèyè lajan. Gen moun ki menm pèdi madanm yo ak pitit yo. Sa pi bon lontan pou w' gen zanmi ak fanmi menmsi ou malere (Pwovèb 22.1).

MATYE 6.19-20 ; 1 KORENT 16.2 ; LIK 12.15 ; EKLEZYAS 5.10

POUKISA N'AP DEPANSE LAJAN ACHTE MANJE KI PA KA FÈ ANYEN POU NOU ? POUKISA N'AP DEPANSE LAJAN TRAVAY NOU POU BAGAY KI PA KA PLEN VANT NOU ? (EZAYI 55.2)

ANN GADE LAVI A

Pastè a te prêt pou l' preche nan Dimanch maten, men li te santi Bondye t'ap pale avè l'. Li te santi Bondye t'ap di l' : « Pa preche yon nouvo mesaj toutotan moun yo poko mete sa ou gentan preche a ann aplikasyon. » Konsa li te di moun yo : « Mesaj la Senyè a voye pou nou maten an se : 'Renmen youn lòt.' » Apre sa, pastè a te chita.

Apre yon ti silans, tout moun nan sal la te kòmanse pale youn ak lòt. Yo te mande youn lòt ki bezwen yo te genyen, epi yo te chache fason pou jere bezwen sa yo. Sou ban devan, te gen yon koup etranje. Pastè a te mande yo : « Èske nou gen bezwen maten an ? » Mesye a te reponn : « Wi. Nou te vle vin tande w' preche maten an. Nou pa t' gen ase kòb pou n' peye aleretou a. Kanmenm nou te deside vini, men nou pa gen kòb pou n' tounen lakay. » Konsa, pastè a, ansanm ak detwa lòt moun, te bay yo kòb pou yo tounen lakay.


Kretyen sa yo te itilize lajan yo pou yo montre amou Bondye a youn pou lòt.

**Renmen Bondye,
pa renmen lajan.**

**Bondye rekonpanse
moun k'ap bay.**

**Bati yon bon plan sou
kijan ou pral itilize lajan
w'.**

**Zanmitay vo plis pase
lajan.**



Etid Pou Mesye Marye : Reskonsabilite Familyal

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 47

MINISTÈ FAMILYAL

BI LESON AN : Pou ankouraje papa yo pou yo dirije fanmi yo pou yo rann lòt moun sèvis.

Vèsè Kle :

- TRAVAY 21.8-9** Filip se te yon _____ . Pitit fi li yo te angaje yo nan _____ .
- Jak 1.27** Jan pou nou sèvi ki dakò ak volonte Bondye a se pou n' pran swen _____ ak _____ yo.
- Matye 20.28** Jezi pa t' vini pou moun te ka rann li sèvis. Okontrè, Li te vini pou L' _____ .
- Matye 25.38-40** Dapre Bondye, si nou ede sila yo ki nan bezwen, se kòmsi se _____ n'ap sèvi.
- Travay 16.33-34** Gad filipyen an, ansanm ak tout fanmi li, te ranpli avèk jwa apre yo te mete konfyans yo nan Jezi, epi apre yo te _____ Pòl ak Silas .

Devwa Pou W' Fè



Pou Kont Ou

Mande Bondye pou L' montre ou kèk fason fanmi ou kapab ede lòt moun.



Avèk Madanm Ou

Fè l' konnen w'ap ede l' fè kèk travay yon fason pou l' kapab jwenn tan pou l' ekri detwa lèt, oubyen pou rann yon lòt moun sèvis.

Avèk Pitit Ou

Ankouraje yo epi montre yo kijan pou yo dou, sitou avèk timoun pitit, granmoun, moun ki malad, ansanm ak moun ki kokobe. Fè sa pamwayen egzanp ou. Chache yon okazyon kote tout fanmi an nèt kapab ede yon moun ki nan bezwen.

MINISTÈ FAMILYAL

Lesson 47

Lè nou sèvi lòt moun ansanm kòm yon fanmi, sa pote anpil benefis. Sa bati inyon familyal paske fanmi an ap travay ansanm. Sa bati bon jan prensip lakay timoun yo kote li montre yo kijan pou yo sèvi Bondye epi ede lòt moun. Sa bati zanmitay avèk lòt moun. Epi, se yon fason pou n' temwaye pou Senyè a.

Yon ministè familyal pa mande pou ou genyen yon fòmasyon oubyen yon don espesyal. Tout fanmi yo kapab travay ansanm pou glwa Senyè a. Sèl bagay, sa mande tan, planifikasyon, ak angajman.

Men kèk fason fanmi ou kapab devlope yon ministè.

VIZITE MOUN KI MALAD Moun ki malad toujou bezwen ankourajman. Granmoun yo renmen sa sitou lè gen timoun ki vin wè yo. Vizite moun malad lakay yo epi nan lopital tou. (Matye 25.35-36)

ENVITE MOUN VIN LAKAY OU Yon fwaye kretyen dwe sèvi yon sant akèy. Ou kapab pataje manje, yon kote pou dòmi, epi ankourajman avèk sila yo ki nan bezwen. Tout moun nan fanmi an kapab ede nan travay sa a. (Lik 14.13 ; Ebre 13.2)

PATAJE AVÈK YON VÈV Voye manje bay li. al' chache bwa pou li lè l' pa genyen. Toujou rete disponib pou ede li. (Jak 1.27)

VIZITE LÒT FANMI Ede lòt fanmi yo grandi pandan ou montre yo kijan fanmi pa w' la ap grandi.

CHANTE ANSANM POU LÒT YO Chante nan sèvis legliz yo. Chante pou granmoun yo. Chante pou moun malad yo. Yon chan ki sòti nan kè nou va touche kè lòt yo tou. (Kolosyen 3.16)

NETWAYE LEGLIZ LA Ofri sèvis fanmi ou pou netwaye legliz la. Si ou p'ap ka fè l' pou kont ou, chache yon lòt fanmi ki vle ede w' nan travay sa a.

...SI YOUN NAN NOU TA VLE VIN GRANNÈG, SE POU L' SÈVI NOU TOUT. (MATYE 20.26)

ANN GADE LAVI A

Fanmi Dyegran te konn koupe bwa pou yo viv. Lè yo sot nan bwa, yo konn pote yon ti bwa bay fanmi pastè a paske yo pa gen tan pou yo al' chache bwa. Apre sa, yo konn pote yon ti bwa pou grann tou paske li pa ka al' chache bwa ankò poutè li twò granmoun.

Se pamwayen travay koupe bwa a Dyegran te devlope yon ministè familyal. Pamwayen bwa yo konn koupe a, fanmi li jwenn kichòy pou yo bay nan lèv Senyè a. Yo jwenn pou yo ede granmoun yo ak sila yo kin nan bezwen. Lèfini, yo jwenn pou yo pran swen tèt yo tou.

Benefis yon ministè familyal :

- li ini fanmi an
- li devlope bon prensip
- li sèvi Bondye ak lòt moun
- li bay yon temwanyaj pou Kris

Yon ministè familyal pa mande yon fòmasyon oubyen yon don espesyal.

Yon ministè familyal mande :

- tan
- planifikasyon
- angajman

Kèk metòd yon ministè familyal :

- rann vizit
- bon akèy
- pataje
- chante
- travay



Etid Pou Mesye Marye : Reskonsabilite Familyal

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 48

RELASYON AK FANMI MADANM OU

BI LESON AN : Pou jwenn kèk fason ou kapab byen viv ak fanmi madanm ou.

Vèsè Kle :


1. **Egzòd 18.7, 24** Moyiz te respekte bòpè li, epi lè Jetwo te bay Moyiz yon konsèy, Moyiz te _____ .
2. **1 Samyèl 18.20–21** _____ te vle pou David devni bofis li yon fason pou li te ka peze li.
3. **Jenèz 26.34–35** Ezaou te marye avèk fi lòt nasyon epi medam sa yo te rann lavi Izarak ak Rebeka _____ .
4. **Rit 2.11–12** Bòz te fè lwanj Rit poutèt tout sa li te fè pou _____ li.

Devwa Pou W' Fè



Pou Kont Ou

Èske ou gen konfli ak bèlmè oubyen bòpè ou ? Chache rekonsilye avèk yo. Chache konnen sous konfli a. Si ou te fè yon bagay ki pa bon, mande eskiz. Chache kèk okazyon kote ou kapab renmèsyé yo tou pou sa yo fè.



Avèk Madanm Ou

Èske paran w' gen bon relasyon ak fanmi madanm ou ? Chache kreye kèk okazyon kote de (2) fanmi sa yo kapab reyini ansanm pou yo kapab rekonèt youn lòt pi byen.

Avèk Pitit Ou

Li istwa Rit ak bèlmè li nan Rit chapit 1 jiska chapit 4 pou yo. Kòmanse montre yo kijan yo pral jwenn lòt paran, lòt frè, ak lòt sè lè yo marye. Anseye yo kòman yo dwe renmen epi respekte yo.

RELASYON AK FANMI MADANM OU

Lesson 48

Souvan moun conn bay blag sou bèlmè yo. Dapre anpil moun, yon bèlmè se yon polis ki pa ka boule avèk moun menm. Yon bèlmè konsa kapab aji konsa yon fason pou pwoteje pitit li kont gason li te marye a.

Li pa bezwen konsa menm. Paran madanm ou kapab pi bon zanmi ou. Pa blyi, se « moun » yo te ye anvan yo te devni bòpè ou ak bèlmè ou, epi yo toujou rete moun. Men kèk fason ou kapab bati bon jan relasyon avèk fanmi madanm ou, epi lè ou fè sa, sa ap ranfòse maryaj ou tou.

KITE PARAN W' Kite paran fi a tou. Chache yon kote pou kont ou kote ou kapab jere lavi pwòp fanmi pa ou. Anpil paran toujou bat pou yo kontwole lavi pitit yo apre yo fin marye. Lè ou kite avèk yo, sa rann sa pa ka fèt menm jan. Lè ou kite fizikman, ou vin gen pwòp pozisyon pa ou. Lè ou kite emosyonèlman, sa vle di ou gen lapè avèk paran ou, epi yo santi yo alèz avèk madanm ou tou. Lè ou kite paran ou, sa pa vle di ou sispann renmen yo epi sispann ede yo. Kite paran ou vle di maryaj ou vin pran premye pozisyon anvan tout lòt relasyon familyal yo.

PA KONPARE. Yon madanm santi li ofanse lè mari li pale konsa : « Manje sa pa gou menm jan ak manje manman m'. » oubyen « Paran ou yo parese. Poukisa yo pa travay di tankou paran pa m' yo. » Pawòl konsa va rann madanm lan santi fòk li sanble ak paran w'. Yon konparezon konsa va detwi inyon maryaj la.

PA ATAKE L' AVÈK PAWÒL OU. Gen anpil dega ki kapab fèt avèk detwa pawòl, epi sa ka blese yon moun anpil. Pa kritike fanmi madanm ou. Fè lwanj yo epi ankouraje yo pito. Si gen kèk bagay ki bezwen regle avèk yo, fè sa an prive, pa janm fè sa an pubblik.

PA FÈ PATIPRI Aji avèk fanmi madanm ou menm jan ou aji avèk fanmi pa ou. Pase lakay yo menm jan. Akeyi yo menm jan. Lè w'ap pale sou yo, pale sou yo menm jan tou.

PADONNEN—PA KENBE NAN KÈ Gen pafwa kapab gen pwoblèm ant ou menm avèk fanmi madanm ou kanmenm. Pale avèk yo sou sa. Mande Bondye pou l' ede w' padonnen yo menmsi pwoblèm lan pa ka rezoud.

EGZÒD CHAPIT 18 ; RIT 1-4 ; 1 SAMYÈL CHAPIT 18

SE POU NOU AJI BYEN YOUN AK LÒT, SE POU NOU GEN BON KÈ YOUN POU LÒT, POU NOU YOUN PADONNEN LÒT, MENM JAN BONDYE TE PADONNEN NOU NAN KRIS LA. (EFEZYEN 4.32)

ANN GADE LAVI A

Alen te rete lakay paran l' jouk li te gen vennsenk (25) ane sou tèt li. Apre sa, li te marye avèk yon fi ki te sòti nan yon lòt zòn. Yo te bati yon ti kay toupre lakay paran Alen, epi se la yo te rete.

Manman Alen te toujou fouye bouch nan zafè Alen. Se kòmsi manman an te toujou gade l' kòm timoun lakay li. Sa te deranje Madanm Alen epi li te santi yon gwo dezespwa lakay li. Li te anvi kite Alen pou l' tounen lakay li.

Apre detwa mwa, manman Alen te kòmanse konprann li pa t' dwe fouye bouch li nan zafè yo. Alen te kòmanse konprann li te dwe viv avèk manman l' nan sans yon granmoun. Ni Alen, ni madanm li, ni manman l', te kòmanse dyaloge ansam plis sou zafè relasyon yo. Yo touletwa te vin santi yon pi gwo kontantman poutèt sa.

**Relasyon maryaj
la dwe pran
devan tout lòt
relasyon
familyal yo.**

**Fè konparezon kapab
detwi inyon yon maryaj.**

**Itilize pawòl pou
ankouraje, pa pou detwi.**

**Aji avèk toude fanmi yo
menm jan—ni fanmi
mari a, ni fanmi fi a.**

**Padonnen kote te gen
erè.**



Etid Pou Mesye Marye : Reskonsabilite Familyal

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 49

YON PAPA K'AP PRIYE

Bi LESON AN : Pou montre papa yo kijan lapriyè vrèman enpòtan.

Vèsè Kle :


- FILIPYEN 4.6** Menm pi bon papa a ki genyen nan tout lemonn pa ka bay pitit li tout sa yo bezwen. Sa pa dwe enkyete ou. Okontré, ou dwe _____ epi fè Bondye konnen kisa ou bezwen.
- Esdras 8.21** Esdras te mande Bondye pou L' pwoteje li menm, fanmi li, avèk tout fanmi yo ki te nan gwoup la pandan yo t'ap _____.
- Jenèz 26.23-25** Lè Izarak te rive nan yon nouvo zòn, premye sa li te fè a se pou l' moute yon _____ kote li te kapab rele _____.
- Jòb 1.5** Jòb te konn leve granmaten pou l' chache padon Bondye pou pitit li yo. Li te toujou _____ pou yo.
- Efezyen 6.18** Kilè ou dwe priye ? _____ Kòman ou dwe priye ?

Devwa Pou W' Fè



Pou Kont Ou

Mete yon foto fanmi ou nan Bib ou. Pran tan chak maten pou w' priye pou chak gress moun nan fanmi ou. Nonmen non yo devan Bondye.



Avèk Madanm Ou

Lapriyè se youn nan pi bon fason pou rann de (2) moun santi yo ini ansanm. Pran yon tan chak jou pou n' priye ansanm nou de (2).



Avèk Pitit Ou

Priye pou yo. Priye avèk yo tout ansanm.
Priye avèk yo chak apa. Fè sa souvan.

YON PAPA K'AP PRIYE

Lesson 49

Yo konn di konsa : « Yon fanmi ki toujou priye ansanm p'ap gaye fasil. » Kòm lidè fwaye a, papa a dwe pran devan nan zafè lapriyè. Yon manman kapab montre timoun yo kijan pou yo priye, men se lè yon papa pase tan nan lapriyè fanmi li va jwenn yon koken-nchenn fòs espiriyèl.

Petèt kèk nan disip Jezi yo te gen pitit tou. Disip Jezi yo te priye akòz yo te konn swiv Mèt la. Lè yo te wè ki kantite pouvwa Jezi te jwenn pamwayen lapriyè, yo te mande Jezi pou L' montre yo priye tou. Jezi te bay yon bèl modèl sou lapriyè pou disip Li yo. Nou jwenn priyè sa a nan Matye 6.9-13.

LOUWE BONDYE EPI RENMÈSYE LI « Papa nou ki nan syèl la, Nou mande pou yo toujou respekte non Ou... » Lè ou louwe Bondye, se sonje w' sonje ki moun Bondye ye. Si w' bliye ki moun Bondye ye, ou p'ap lwen bliye kòman Li vle pou w' viv.

FÈ L' DEMANN POU SA OU BEZWEN « Manje nou bezwen an, ban nou l' jodi a... » Lè w' mande Bondye pou L' ba ou sa ou bezwen, epi lè w' kwè L'ap fè sa toutbon, ou pa bezwen enkyete. Jezi te di yon moun ki enkyè pa vrèman mete konfyans li nan Bondye toutbon (Matye 6.25-34).

KONFESE PECHE W' EPI MANDE BONDYE PADON « Padonnen tout sa nou fè ki mal... » Lè ou fè yon bagay ou santi ou pa t' dwe fè, se sa ki rele peche (Jak 4.17). Sa konn rive tout moun. Se sèlman Jezi ki te mennen yon vi pafè, san L' pa t' fè okenn peche. Li te fè tout sa Li te konnen Li te dwe fè. Alò, akòz ou fè peche souvan, w'ap oblige mande padon souvan tou.

CHACHE PWOTEKSYON ESPIRITYÈL « Pa kite nou nan pozisyon pou n' tonbe nan tantasyon, men, delivre nou anba Satan... » Tantasyon sòti nan Satan, men li pa ka tante ou si Bondye pa kite l' fè sa. Bondye gentan pwomèt pou L' pwoteje ou epi pou L' bay ou yon fason pou w' chape lè w' tonbe anba tantasyon (1 Korent 10.13).

RESPEKTE BONDYE KÒM WA « Se pou ou tout otorite, tout pouvwa ak tout lwanj, depi tout tan ak pou tout tan... » Se Bondye k'ap kontwole tout bagay, ni nan syèl la, ni sou tè a. Lè w' kite Bondye pran sa ki pou Li, lè sa w'ap jwenn lapè nan kè ou.

Lapriyè bay pouvwa.

Yon priye ki efikas gen plizyè pwen ladan l', tankou :

- Adorasyon—kote ou admire karaktè Bondye a
- Konfese peche ou
- Renmèsye Bondye pou sa L' fè
- Fè demann kote ou mande Bondye pou L' bay ni ou menm, ni lòt moun, sa nou bezwen

PA BAY KÒ NOU TRAKA POU ANYEN. MEN, NAN TOUT SIKONSTANS MANDE BONDYE TOU SA NOU BEZWEN NAN LAPRIYÈ. TOUJOU CHONJE DI L' MÈSI TOU LÈ N'AP LAPRIYÈ. (FILIPYEN 4.6)

ANN GADE LAVIA

Pandan Jak t'ap vwayaje, li te wè kèk lou ki t'ap kouri dèyè kat (4) sèf ki pa t' ka kouri vit poutèt nèj la. Youn apre lòt, sèf yo te tonbe anba dan lou yo. Lou yo te chire sèf yo epi sèf yo te senyen jiskaske yo te mouri frèt.

Imaj sa a te rete nan lespri Jak pandan tout jounen an. Lè li te rive lakay, li te gade pitit li yo tankou sèf sa yo. Li te konnen lou mechanste yo ak lou peche yo te vle antre nan fwaye li pou detwi pitit li yo. Swa sa a, Jak te pran desizyon pou l' pase plis tan ap pale avèk pitit li yo. Li te pran desizyon pou l' pase plis tan nan lapriyè pou yo tou, yon fason pou pwoteje yo kont lou yo.



Etid Pou Mesye Marye : Reskonsabilite Familyal

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 50


YON PAPA KI KOUTE

BI LESON AN : Pou devlope yon abitid pou koute yon fason k'ap ede fanmi an kominike pi byen.

Vèsè Kle :


- Jak 1.19** Yon fason ou kapab demonstre renmen se pou w' prese _____
epi pa prese _____ .
- Pwovèb 18.13** Gen kèk paran ki rele apre timoun yo, ki akize yo, ki blanmen yo, epi ki bay timoun yo konsèy menm anvan yo byen tandem tout koze a. Bib la di moun sa a _____ .
- Pwovèb 15.31** Yon papa ki _____ se yon papa ki saj.
- 1 Samyèl 19.4, 6** Wa Sayil te koute lè pitit li, _____ te mande l' pou l' fè pa zanmi li.
- Sòm 34.15** Yon papa dwe pran lesion nan men Bondye nan fason Li toujou koute lè pitit Li _____
_____ .

Devwa Pou W' Fè



Pou Kont Ou

Anvan ou kouche aswè a, ekri twa (3) bagay madanm ou ak pitit ou te di w' pandan jounen an.



Avèk Madanm Ou

Èske ou konn koute byen ? Mande madanm ou pou l' pale sou nenpòt sijè li vle. Eseye koute li pandan kenz (15) minit san w' pa dekoupe pawòl li. Lèfini, eseye rezime sa l' te di w' bay li ankò.

Avèk Pitit Ou

Koute byen pandan y'ap jwe. Pafwa yo konn di zanmi yo kèk bagay yo santi yo pa ka di ou. Konsa tou, pandan y'ap jwe yo konn pale lib tou.

YON PAPA KI KOUTE

Lesson 50

Yon papa ki saj va aprann kòman pou l' « Koute Byen » .

KOUTE BYEN = KOUTE + FÈ ATANSYON

Men kèk fason ki kapab ede w' aprann koute byen :

1. PRETE ATANSYON. Depoze liv ki nan men w' lan. Fèmen televizyon an ak radyo a. Si gen twòp bri, chache yon kote trankil pou w' pale. Gade moun k'ap pale a nan je. Moun lan kapab wè si w'ap vrèman koute ou non dapre kote ou voye je w'. Si w'ap pale nan telefòn, epi w' pa ka koute byen akòz gen anpil lòt bagay ki mande prete atansyon w', fè moun lan konnen w'ap rele l' bak.

2. REZIME PI GWO PWEN YO NAN SA MOUN LAN TE DI. Eseye esplike sa li te di dapre sa ou konprann. Eseye konprann santiman moun lan k'ap pale avèk w'. Swiv fason li kenbe kò l'. Men yon ti egzanp : Si ptit ou ta di konsa : « Ou pa janm fè anyen avèk nou. Nou poko janm wè yon lòt peyi menm. » Lè sa a, ou kapab reponn konsa : « Èske ou santi nou dwe vwayaje plis ansanm ? »

3. EVITE KRITIK, FAWOUCH, JIJMAN, AVÈK JOUMAN. Si lòt moun lan fè yon erè oubyen si bouch li chape l', pa prese korije l'. Bat pou w' evite tout diskisyon avèk lòt moun nan fanmi an. Byen petèt ou kapab « genyen » yon diskisyon avèk ptit ou akòz ou gen plis laj avèk plis eksperyans, men si w' plede fè diskisyon avè l', ptit la ka pa gen respè pou ou ankò.

4. PATAJE PWENDVI PA W' APRE. Apre ou fin bay lòt moun lan tan pou l' pataje pwendvi pa l', ou kapab pataje pa ou. Eseye fè sa yon fason pou moun lan konnen ou bay pwendvi pa l' la menm valè ak pwendvi pa w'. Pa prese pale. Si w' twò prese, ou kapab dekoupe moun lan epi pa ba l' chans pou l' fin pale. Chonje byen, komunikasyon an kapab bloke si w' pale twò vit, bay konsèy, repons, oubyen menm preche twò rapid.

Èske ou pa wè kijan yon moun ki vrèman koute oblige fè plis pase koute sèlman ? Gen kèk telefòn ki kapab kapte vwa yon moun men bagay sa yo pa ka tandé toutbon. Se sèlman lòm ki kapab koute epi fè atansyon yon fason pou yo koute toutbon.

**Koute Byen =
Koute +
Fè Atansyon.**

Eseye konsantre sou
moun k'ap pale a
sèlman, san ou pa fè lòt
bagay.

Reponn nan yon fason ki
montre ou konprann.

Pa jije, pa kritike, epi pa
pase moun nan rizib.

**FRÈ MWEN RENMEN ANPIL YO, MEN YON BAGAY POU NOU TOUJOU CHONJE. SE POU TOUT MOUN
PRESE LOUVRI ZORÈY YO POU YO KA TANDE. MEN, PA KOURI PALE... (JAK 1.19)**

ANN GADE LAVI A


Estannle ak madanm li te toujou ap fè diskisyon depi yo te fin marye. Prèske chak fwa yo te eseye pale sou yon bagay ansanm, yo te tonbe fè diskisyon.

Tèlman bagay la te dejener, yo te al' kot pastè a pou yo jwenn yon ti èd sou pwen sa a.

Lè yo te rive kay pastè a, yo toulede te tonbe pale anmenmtan. Pastè a se te yon nonm ki te saj. Li te fè yo pe, epi li te di : « Estannle, m'ap ba ou kenz (15) minit pou w' bay pwendvi pa ou. Apre sa, m'ap bay madanm ou kenz (15) minit tou. Epi, pandan nou chak ap pale, fòk lòt la koute san l' pa di anyen. »

Yo te fè sa a plizyè repriz epi yo te kòmanse konprann kijan sa vrèman enpòtan pou koute youn lòt. Apre sa, relasyon yo te kòmanse mache pi byen epi yo toulede te pi kontan.

Eseye konprann
santiman moun lan.



Etid Pou Mesye Marye : Reskonsabilite Familyal

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 51

PRAN DESIZYON

BI LESON AN : Pou aprann kèk prensip sou kòman pou nou pran bon desizyon.

Vèsè Kle :

1. **JOZYE 24.15** Jozye te di pèp Izrayèl la pou yo _____ . Li te di li menm ak fanmi li tapral _____ .
2. **Danyèl 1.8** Danyèl se te youn nan pi gran sèvitè Bondye yo. Li te _____ pou li pa manje manje wa a, epi pou li pa bwè bwason wa a.
3. **Neyemi 2.4-5** Neyemi se te yon lidè Jwif yo epi li te pran yon desizyon byen fèm pou l' mande wa a _____ .
4. **Jòb 29.25** Anpil moun te respekte Jòb. Li te _____ epi li te dirije yo.
5. **Egzòd 18.24-25** Moyiz te koute konsèy bòpè li. Li te _____ epi li te mete yo kòm lidè.

Devwa Pou W' Fè



Pou Kont Ou

Li liv Neyemi a nan Ansyen Testaman an epi make chak kote Neyemi te pran yon gwo desizyon. Konbyen desizyon ou jwenn konsa ?



Avèk Madanm Ou

Pale avè l' sou fason ou pran desizyon nan fwaye a. Mande l' pou l' ede w'.

Avèk Pitit Ou

Li istwa Jozye a pou pitit ou kote li te mande pèp Izrayèl la kiyès yo tapral sèvi. Nou jwenn istwa sa a nan Jozye chapit 24.

Bon lidè konn pran bon desizyon. Yon fanmi ki kontan epi ki byen òganize, se yon fanmi ki konn sa li vle. Desizyon yon papa va ede fanmi an konnen kote l'ap prale.

Gen yon nèg save ki te di : « Sa pi bon pou w' riske pran yon move desizyon pase pou ou pa pran okenn desizyon menm. » Ou kapab tire anpil gwo lesion nan yon move desizyon. Lè pa gen desizyon ki pran, sa rann fanmi an santi yo malalèz epi pa kontan ditou.

PREPARASYON Premye etap la nan zafè bon desizyon se pou w' ranmase tout donneñ ki posib. Neyemi se te yon ofisyen nan leta peyi Pès la. Li te sansib anpil pou Jerizalèm. Se nan vil sa a pèp la te sòti lontan pase. Frè Neyemi a te vizite Jerizalèm epi te pote yon rapò bay Neyemi sou kijan eta vil la te ye. Neyemi te poze l' plizyè kesyon yon fason pou l' te ka ranmase anpil donneñ (Neyemi 1.1-3).

PRIYE Neyemi te pote tout chay li yo bay Bondye nan lapriyè. Li te dekri movèz eta Jerizalèm lan bay Bondye, epi li te fè Bondye sonje pwomèz Li te fè pou byen Jerizalèm. Apre sa, li te mande Bondye pou bay li sajès pou l' te ka aji pou byen lavil la tou (Neyemi 1.4-11).

PLANIFIKASYON. PNeyemi te pase tan ap panse epi ap planifye. Li te konnen fòk li te tann pou yon bon lè pou l' mande pou èd wa a. Pandan li t'ap tann, li t'ap planifye kijan li tapral fè pwojè a mache. Planifikasyon se yon travay ki di epi ki mande tan. Sa te pran kat (4) mwa anvan Neyemi te jwenn chans pou l' pale avèk wa a sou lavil Jerizalèm lan.

Lè wa a te bay Neyemi chans pou l' pale, Neyemi te gentan bati yon plan. Li te di wa a kilè li te vle pati, ak konbyen tan travay Jerizalèm lan t'ap pran. Li te mande wa a pou l' ekri kèk lèt pou otorize vwayaj la ak pwojè konstriksyon an Youn nan lèt yo te bay li otorizasyon pou l' pase nan tout pwovens yo pandan li t'ap prale Jerizalèm. Yon lòt lèt te bay li dwa pou l' koupe pyebwa nan fore wa a. Yo tapral itilize pyebwa sa yo pou fè kay avèk baryè nan vil la (Neyemi 2.1-8).

Lè Neyemi te kòmanse travay selon plan an, Bondye te ede l' rebati miray lavil Jerizalèm yo.

Bon lidè konn pran bon desizyon.

Twa (3) « P » yon bon desizyon :

- Prepare
- Priye
- Planifye


LÈZÒM PÈ PLAN TRAVAY YO NAN KÈ YO. MEN, SE SENYÈ A K'AP DIRIJE SA Y'AP FÈ A. (PWOVÈB 16.9)

ANN GADE LAVI A

Toma ak madanm li te gen yon pwoblèm ki te plede repete tanzantan. Gen yon fwa yo pa t' fè anyen pou vakans lan paske yo pa t' ka deside kisa yo tapral fè. Lè yo rive pran yon desizyon, li te deja twò ta pou yo fè aranjman yo pou sa. Pafwa yo te fete san yo pa t' envite lòt moun nan fèt la paske yo pa t' diskite sou sa, epi yo pa t' deside sa yo t'ap fè. Pafwa yo te konn sote reyinyon legliz tou paske yo pa t' konn deside si yo taprale depi davans, epi lè lè a te rive, yo pa t' konn prepare.

Toma ak madanm li te reyini ak yon konseyè. Madanm lan te santi Toma te neglige dirije fanmi an pou l' pran desizyon, epi li te santi se pa t' plas li pou l' pran desizyon pou kont li. Toma te dakò li pa t' renmen pran desizyon. Yo te rive dakò ansam, lè gen yon desizyon ki bezwen pran, madanm lan t'ap fè Toma konnen li te bezwen yon desizyon final. Toma te dakò, epi li te di li tapral fè tout sa k' posib pou l' dirije fanmi an pou yo pran desizyon.

Lè yo te swiv plan sa a, bagay yo te kòmanse mache pi byen pou tout fanmi an nèt.



Etid Pou Mesye Marye : Reskonsabilite Familyal

« Konsa, yon moun k'ap sèvi Bondye, li tou pare, li gen tou sa li bezwen pou l' fè tou sa ki byen. »

Leson 52

IMANIS-YON MANTI

Bi LESON AN : Pou konprann « Manti a » ak kijan li afekte fanmi nou.

Vèsè Kle :


- KOLOSYEN 2.8** Fòk ou fè atansyon pou w' pa kouri dakò avèk yon seri filozofi. Souvan filozofi sa yo pa sòti nan _____, men souvan yo sòti lèzòm .
- Women 1.25** Sila yo ki pi sousye pou sa Bondye te kreye a pase yo sousye pou Bondye, moun sa yo mete _____ nan plas verite Bondye a.
- Jenèz 3.4-5** Satan te twonpe Adan ak Ev kote li te di yo yo kapab vin _____.
- Mak 7.9-13** Jezi te di gen moun ki vire kòmandman yo Bondye te etabli pou fanmi an pou yo kapab kenbe _____ pito.
- 2 Pyè 2.2-3** Bondye avèti nou kont sila yo ki bay manti ak fo istwa pou yo kapab _____.

Devwa Pou W' Fè



Pou Kont Ou

Gade chak pwen nan dezyèm lis la ki so do fèy sa a. Chache yon vèsè biblik ki apiye chak fraz. Ekri referans lan bò kote chak fraz.



Avèk Madanm Ou

Esplike l' sa ki rele imanis ak kijan filozofi sa a fonksyonne. Apre sa, se pou n' mete tèt nou ansanm pou n' bagay kont vye filozofi sa a nan fanmi nou.

Avèk Pitit Ou

Montre yo kòman pou yo fè fas ak lide imanis yo. Li kèk nan liv lekòl yo ansanm avèk yo. Chache idantife kèk kote lide sa a parèt nan dokiman sa yo. Lis la ki sou do fèy la kapab ede w' fè sa.

Jounen jodi a, Kretyen yo kòmanse sezi pou yo wè kijan leta a, tribunal la, avèk ansèyman yo nan lise yo kontré avèk fanmi kretyen an ak legliz yo tou.

Youn nan rezon ki fè sa ap fèt jounen jodi a se poutèt yon kwayans ki rele IMANIS. Kwayans sa a ap bat pou l' ranplase doktrin kretyen yo nan lavi chak Kretyen.

Genyen kèk imanis ki gentan ôganize epi pibliye kèk literati sou kwayans yo. Y'ap si-men semans rebelyon kont kwayans kretyen yo. Bi yo se pou yo itilize edikasyon pou fè timoun yo reflechi nan yon fason imanis.

DOKTRIN IMANIS LA DI :

- se lòm ki alatèt
- lòm sanpousan bon
- lòm se yon bêt
- se evolye lòm te evolye sòt nan bêt
- se leta a ki reskonsab pou yo elve timoun yo
- mechanste vini apatide move sikons-tans
- sa ki byen ak sa ki mal chanje fasa sityasyon yo
- timoun yo dwe lib pou yo chwazi fè sa yo pi pito
- apre lanmò, pa gen anyen
- Bondye pa egziste

BIB LA FÈ KONNEN :

- se Bondye ki alatèt
- lòm fè peche epi yon bezwen yon Sovè
- lòm te kreye nan imaj Bondye a
- Bondye te kreye lòm
- se paran yo ki reskonsab pou elve timoun yo
- mechanste sòti nan Satan
- sa ki byen ak sa ki mal chita sou sa Bib la di
- paran yo reskonsab pou yo anseye epi discipline timoun yo pou yo fè sa ki byen
- lòm ap viv pou toutan, swa nan syèl la, swa nan lanfè a
- Bondye egziste, epi Li mande nou pou n' sanble avè L'

Kòm yon Kretyen, fòk ou byen konprann epòk sa a menm jan avèk moun Isaka yo nan 1 Kwonik 12.32. Fòk ou konprann kwayans imanis la ap inonde nou pamwayen radyo, televizyon, fim, edikasyon, leta, avèk literati. Kisa ou kapab fè pou pwoteje fanmi ou ?

1. Se pou w' konprann sa k'ap pase, epi ede lòt moun konprann zafè imanis yo.
2. Anseye fanmi ou konviksyon, karaktè, avèk fason pou viv ki sòti nan Bib la.
3. Chwazi pwofesè kretyen pou pitit ou.
4. Kanpe djamn sou lafwa ou ak sou kwayans ou nan verite Bib la.

2 TESALONISYEN 2.9-10 ; 1 JAN 4.1-3 ; JID 3-4

MEN, MECHAN K'AP FÈ BAGAY POU TWONPE MOUN YO PRAL PI LWEN TOUJOU NAN MECHANSTE YO, YO TOUJOU AP TWONPE MOUN, Y'AP KITE MOUN TWONPE PWÒP TÈT YO TOU. (2 TIMOTE 3.13)

ANN GADE LAVI A

Grègori te enkyete poutèt lekòl kote pitit li t'ap mache a. Gen kèk liv lekòl ki te fè santi Bib la t'ap bay manti. Egzanp pwofesè a t'ap bay la te yon move egzanp selon Bib la. Apre Grègori te pale avèk direktè lekòl la, li te deside pou l' retire pitit li nan lekòl la. Li te enskri l' nan yon lòt lekòl ki te respekte prensip kretyen yo. Kounyeaya li santi li satisfè paske pitit li p'ap jwenn ansèyman ki kontré avèk Bib la.

**Filozofi imanis la
ap bat pou l'
detwi fanmi ak
legliz kretyen yo.**

**Kwayans imanis yo
kontré avèk Bib la.
Konsa, kwayans imanis
yo se manti yo ye.**

Sa pou n' fè :

- konprann kwayans imanis yo
- anseye konviksyon biblik
- chwazi bon enfliyans kretyen
- kanpe djanm nan lafwa ou



